

सिरि उसहदेव सामिस्स णमो । सिरि गोडी - जिराउला - सव्वोदयपासणाहाणं णमो । नमोऽत्थुणं समणस्स भगवओ महइ महावीर वद्धमाण सामिस्स । सिरि गोयम - सोहम्माइ सव्व गणहराणं णमो । सिरि सुगुरु - देवाणं णमो । **𑖦𑖦𑖦 श्रीचन्द्रप्रज्ञप्त्युपाङ्गम् । 𑖦𑖦𑖦** 'जयइ नवणलिणकुवल्यविगसियसयवत्तपत्तलदलच्छो । वीरो गइंदमयगलसललियगयविक्रमो भयवं ॥१॥ णमिऊण असुरसुरगरूलभुयगपरिवंदिए गयकिलेसे । अरिहे सिद्धायरियउवज्झाए सव्वसाहू य ॥२॥ फुडवियडपायडत्थं वुच्छं पुव्वसुयसारणीसंदं । सुहुमं गणिणोवइडं जोइसगणरायपन्नतिं ॥३॥ णामेण इंदभूइत्ति गोयमो वंदिऊण तिविहेणं । पुच्छइ जिणवरवसहं जोइसरायस्स पण्णत्तिं ॥४॥ कइ मंडलाइं वच्चइ, तिरिच्छा किं च गच्छइ । ओभासइ केवइयं, सेयाइ किं ते संठिई ॥५॥ कहिं पडिहया लेसा, कह ते ओयसंठिई । किं सूरियं वरयते, कहं ते उदयसंठिई ॥६॥ कइकट्ठा पोरिसीच्छाया, जोएत्ति किं ते आहिए । १०॥ के ते संवच्छराणादी, कइ संवच्छराइ य ॥७॥ कहं चंदमसो वुड्ढी, कया ते दोसिणा बहू । के सिग्घगई वुत्ते, किं ते दोसिणलक्खणं ॥८॥ चयणोववाय उच्चत्ते, सूरिया कइ आहिया । अणुभावे केरिसे वुत्ते २०, एवमेयाइं वीसई ॥९॥१। वड्ढोवइढी मुहुत्ताणमद्धमंडलसंठिई । के ते चिन्नं परियरइ, अंतरं किं चरंति य ॥१०॥ ओगाहइ केवइयं, केवतियं च विकंपइ । मंडलाण य संठाणे, विक्रवंभो अट्ट पाहुडा ॥११॥२। छप्पंच य सत्तेव य अट्ट तिन्नि य हवंति पडिवत्ती । पढमस्स पाहुडस्स उ एयाउ हवंति पडिवत्ती ॥१२॥३। पडिवत्तीओ उदए, अदुव अत्थमणेसु य । भेयघाए कण्णकला, मुहुत्ताण गतीति य ॥१३॥ निक्खममाणे सिग्घगई, पविसंते मंदगईइ य । चुलसीइसयं पुरिसाणं, तेसिं च पडिवत्तीओ ॥१४॥ उदयम्मि अट्ट भणिया भेदग्घाए दुवे य पडिवत्ती । चत्तारि मुहुत्तगईए हुंति तइयंमि पडिवत्ती ॥१५॥४। आवलिय मुहुत्तगे, एवंभागा य जोगसा । कुलाइं पुन्नमासी य, सन्निवाए य संठिई ॥१६॥ तारगगं च नेता य, चंदमग्गत्ति यावरे । देवताण य अज्झयणे, मुहुत्ताणं नामया इय ॥१७॥ दिवसा राई वुत्ता य, तिहि गोत्ता भोयणाणि य । आइच्चवार मासा य, एवं संवच्छरा इय ॥१८॥ जोइसस्स य दाराइं, नक्खत्तविजयेऽविय । दसमे पाहुडे एए, बावीसं पाहुडपाहुडा ॥१९॥५। तेणं कालेणं तेणं समएणं मिहिलानामं नगरी होत्था, रिद्धि० वण्णओ, तीसे मिहिलाए नयरीए बहिया उत्तरपुरच्छिमे दिसिभाए एत्थ णं माणिभद्दे णामं चेइए होत्था, चिराइए वण्णओ, तीसे णं मिहिलाए णगरीए जियसत्तू राया धारिणी देवी वण्णओ, तेणं कालेणं० तंमि माणिभद्दे चेइए सामी समोसढे परिसा णिग्गया धम्मो कहिओ परिसा पडिगया । ६। तेणं कालेणं० समणस्स भगवओ महावीरस्स जेढ्ढे अंतेवासी इंदभूइनामं अणगारे गोयमगोत्तेणं सत्तूस्सेहे जाव पज्जुवासमाणे एवं वयासी । ७। ता कहं ते वद्धोवद्धी मुहुत्ताणं आहितेति वदेज्जा ?, ता अट्ट एकूणवीसे मुहुत्तसते सत्तावीसं च सत्तट्ठिभागे मुहुत्तस्स आहितेति वदेज्जा । ८। ता जया णं सूरिए सव्वब्भंतरातो मंडलातो सव्वबाहिरं मंडलं उवसंकमित्ता चारं चरति सव्वबाहिरातो मंडलातो सव्वब्भंतरं मंडलं उवसंकमित्ता चारं चरति एस णं अब्धा केवतियं रातिंदियग्गेणं आहि० ?, ता तिण्णि छावढ्ढे रातिंदियसए रातिंदियग्गेणं आहि० । ९। ता एताए णं अब्धाए सूरिए कति मंडलाइं चरति ?, ता चुलसीयं मंडलसतं चरति, बासीतिमंडलसतं दुक्खुत्तो चरति, तं०-णिक्खममाणे चेव पवेसमाणे चेव, दुवे य खलु मंडलाइं सइं चरति तं०-सव्वब्भंतरं चेव मंडलं सव्वबाहिरं चेव । १०। जइ खलु तस्सेव आदिच्चस्स संवच्छरस्स सइं अट्टारसमुहुत्ते दिवसे भवति सइं अट्टारसमुहुत्ता राती भवति सइं दुवालसमुहुत्ते दिवसे भवति सइं दुवालसमुहुत्ता राती भवति, ता पढमे छम्मासे अत्थि अट्टारसमुहुत्ता राती णत्थि अट्टारसमुहुत्ते दिवसे अत्थि दुवालसमुहुत्ते दिवसे णत्थि दुवालसमुहुत्ता राती भवति, दोच्चे छम्मासे अत्थि अट्टारसमुहुत्ते दिवसे णत्थि अट्टारसमुहुत्ता राती अत्थि दुवालसमुहुत्ता राती णत्थि दुवालसमुहुत्ते दिवसे भवति, पढमे वा दोच्चे वा छम्मासे नत्थि पण्णरसमुहुत्ते दिवसे णत्थि पण्णरसमुहुत्ता राती भवति, जं णं पढमे वा छम्मासे दोच्चे वा छम्मासे णत्थि पण्णरसमुहुत्ते दिवसे भवति णत्थि पण्णरसमुहुत्ता राती भवति तत्थ णं कं हेतुं वदेज्जा ?, ता अयण्णं जंबुदीवे सव्वदीवसमुद्दाणं सव्वब्भंतराए जाव परिकखेवेणं पं०, ता जता णं सूरिए सव्वब्भंतरमंडलं

सौ० :- अं. सो. श्रीमति डल्पनाजेन धीरज गंगर मेराठ (५२७)

उवसंकमिता चारं चरति तदा णं उत्तमकट्टपत्ते उक्को० अट्टारसमुहुत्ते दिवसे भवति जहणिया दुवालसमुहुत्ता राती भवति, से निक्खममाणे सूरिए नवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता चारं चरति, ता जया णं सूरिए अब्भितराणंतरं मंडलं उवसंकमिता चारं चरति तदा णं अट्टारसमुहुत्ते दिवसे भवति दोहिं एगट्ठिभागमुहुत्तेहिं ऊणे दुवालसमुहुत्ता राती भवति दोहिं एगट्ठिभागमुहुत्तेहिं अधिया, से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिता चारं चरति, ता जया णं सूरिए अब्भितरं तच्चं मंडलं उवसंकमिता चारं चरति तदा णं अट्टारसमुहुत्ते दिवसे भवति चउहिं एगट्ठिभागमुहुत्तेहिं ऊणे दुवालसमुहुत्ता राती भवति चउहिं एगट्ठिभागमुहुत्तेहिं अहिया, एवं खलु एणं उवाएणं णिक्खममाणे सूरिए तदाणंतराओ तयाणंतरं मंडलातो मंडलं संकममाणे २ दो दो एगट्ठिभागे मुहुत्ते एगमेगे मंडले दिवसखेत्तस्स णिवुड्ढेमाणे रतणिक्खेत्तस्स अभिवुड्ढेमाणे २ सव्वबाहिरमंडलं उवसंकमिता चारं चरति, ता जया णं सूरिए सव्वब्भंतरातो मंडलाओ सव्वबाहिरं मंडलं उवसंकमिता चारं चरति तदा णं सव्वब्भंतरमंडलं पणिधाय एगेणं तेसीतेणं राइंदियसतेणं तिणि छावट्टे एगट्ठिभागमुहुत्तसते दिवसखेत्तस्स णिवुड्ढित्ता रतणिक्खेत्तस्स अभिवुड्ढित्ता चारं चरति तदा णं उत्तमकट्टपत्ता उक्कोसिया अट्टारसमुहुत्ता राती भवति जहणिए बारसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमीणे (आयमाणे) पढमंसि अहोरत्तंसि बाहिराणंतरं मंडलं उवसंकमिता चारं चरति, ता जया णं सूरिए बाहिराणंतरं मंडलं उवसंकमिता चारं चरति तदा णं अट्टारसमुहुत्ता राती भवति दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवति दोहिं एगट्ठिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरति, ता जया णं सूरिए बाहिरं तच्चं मंडलं उवसंकमिता चारं चरति तदा णं अट्टारसमुहुत्ता राती भवति चउहिं एगट्ठिभागमुहुत्तेहिं ऊणा दुवालसमुहुत्ते दिवसे भवति चउहिं एगट्ठिभागमुहुत्तेहिं अहिए, एवं खलु एतेणुवाएणं पविसमाणे सूरिए तदाणंतरातो मंडलातो तयाणंतरं मंडलं संकममाणे दो दो एगट्ठिभागमुहुत्ते एगमेगे मंडले रतणिक्खेत्तस्स णिवुड्ढेमाणे २ दिवसखेत्तस्स अभिवुड्ढेमाणे २ सव्वब्भंतरं मंडलं उवसंकमिता चारं चरति, ता जया णं सूरिए सव्वबाहिराओ मंडलाओ सव्वब्भंतरं मंडलं उवसंकमिता चारं चरति तदा णं सव्वबाहिरं मंडलं पणिधाय एगेणं तेसीएणं राइंदियसतेणं तिणि छावट्टे एगट्ठिभागमुहुत्तसते रयणिक्खेत्तस्स निवुड्ढित्ता दिवसखेत्तस्स अभिवुड्ढित्ता चारं चरति तया णं उत्तमकट्टपत्ते उक्कोसिए अट्टारसमुहुत्ते दिवसे भवति जहणिया दुवालसमुहुत्ता राती भवति, एस णं दोच्चे छम्मासे एस णं दुच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे, इति खलु तस्सेवं आदिच्चस्स संवच्छरस्स सइं अट्टारसमुहुत्ते दिवसे भवति सइं अट्टारसमुहुत्ता राती भवति सइं दुवालसमुहुत्ते दिवसे भवति सइं दुवालसमुहुत्ता राती भवति, पढमे छम्मासे अत्थि अट्टारसमुहुत्ता राई नत्थि अट्टारसमुहुत्ते दिवसे अत्थि दुवालसमुहुत्ते दिवसे नत्थि दुवालसमुहुत्ता राई, दोच्चे छम्मासे अत्थि अट्टारसमुहुत्ते दिवसे भवति णत्थि अट्टारसमुहुत्ता राई अत्थि दुवालसमुहुत्ता राई नत्थि दुवालसमुहुत्ते दिवसे भवति, पढमे वा छम्मासे दोच्चे वा छम्मासे णत्थि पण्णरसमुहुत्ते दिवसे भवति णत्थि पण्णरसमुहुत्ता राई भवति, नत्तत्थ रातिंदियाणं वड्ढोवड्ढीए मुहुत्ताण वा चयोवचएणं, णण्णत्थ वा अणुवायगईए, 'पुव्वेण दुन्नि भागा० पाहुडियगाधाओ भाणितव्वाओ ★★☆।११॥

पढमस्स पाहुडस्स पढमं पाहुडपाहुडं १-१॥ ★★☆ ता कहं ते अब्भमंडलसंठिती आहि० ?, तत्थ खलु इमा दुविहा अब्भमंडलसंठिती पं० तं०-दाहिणा चेव उत्तरा चेव, ता कहं ते दाहिणअब्भमंडलसंठिती आहि० ?, ता अयणं जंबुद्वीवे दीवे सव्वदीवसमुद्धानं जाव परिकखेवेणं, ता जया णं सूरिए सव्वब्भंतरं दाहिणं अब्भमंडलसंठितिं उवसंकमिता चारं चरति तदा णं उत्तमकट्टपत्ते उक्को० अट्टारसमुहुत्ते दिवसे भवति जहणिया दुवालसमुहुत्ता राती भवति, से णिक्खममाणे सूरिए णवं संवच्छरं अयमाणे पढमंसि अहोरत्तंसि दाहिणाए अंतराए भागाते तस्सादिपदेसाते अब्भितराणंतरं उत्तरं अब्भमंडलसंठितिं उवसंकमिता चारं चरति तदा णं अट्टारसमुहुत्ते दिवसे भवति दोहिं एगट्ठिभागमुहुत्तेहिं ऊणे दुवालसमुहुत्ता राती भवति दोहिं एगट्ठिभागमुहुत्तेहिं अधिया, से णिक्खममाणे सूरिए दोच्चंसि अहोरत्तंसि

उत्तराए अंतराए भागाते तस्सादिपदेसाए अब्भितरं तच्चं दाहिणं अब्भमंडलसंठितिं उवसंकमिता चारं चरति तदा णं अट्टारसमुहुत्ते दिवसे भवति चउहिं एगट्ठिभागमुहुत्तेहिं ऊणे दुवालसमुहुत्ता राई भवति चउहिं एगट्ठिभागमुहुत्तेहिं अधिया, एवं खलु एणं उवाएणं णिक्खममाणे सूरिए तदणंतरातोऽणंतरं तंसि २ देसंसि तं तं अब्भमंडलसंठितिं संकममाणे २ दाहिणाए अंतराए भागाते तस्सादिपदेसाते सव्वबाहिरं उत्तरं अब्भमंडलसंठितिं उवसंकमिता चारं चरति, ता जया णं सूरिए सव्वबाहिरं उत्तरं अब्भमंडलसंठितिं उवसंकमिता चारं चरति तदा णं उत्तमकट्टपत्ता उक्कोसिया अट्टारसमुहुत्ता राई भवति जहण्णए दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि उत्तराते जाव पदेसाते बाहिराणंतरं दाहिणं अब्भमंडलसंठितिं उवसंकमिता चारं चरति, ता जया णं सूरिए बाहिराणंतरं दाहिणं अब्भमंडलसंठितिं उवसंकमिता चारं चरति तदा राइदिवसपमाणं तं चेव भाणियव्वं, एवं खलु एतेणं उवाएणं पविसमाणे सूरिए तदाणंतराओ तदाणंतरं तंसि २ देसंसि तं तं अब्भमंडलसंठितिं संकममाणे उत्तराए जाव पदेसाए सव्वब्भंतरं दाहिणं अब्भमंडलसंठितिं उवसंकमिता चारं चरति, ता जया णं सूरिए सव्वब्भंतरं दाहिणं अब्भमंडलसंठितिं उवसंकमिता चारं चरति तदा णं उत्तमकट्टपत्ते उक्कोसए जाव दिवसे भवति जहण्णिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे । १२। ता कहां ते उत्तरा अब्भमंडलसंठिती आहिं ? , ता जता णं सूरिए सव्वब्भंतरे उत्तरं अब्भमंडलसंठितिं उवसंकमिता चारं चरति तदा णं उत्तमकट्टपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राई भवति, से णिक्खममाणे सूरिए णवं संवच्छरं अयमाणे पढमंसि अहोरत्तंसि उत्तराए जाव पएसाए अब्भंतरं दाहिणं अब्भमंडलसंठितिं उवसंकमिता चारं चरति, ततो जया णं सूरिए अब्भितराणंतरं दाहिणं जाव चारं चरति तया णं अट्टारसमुहुत्ते दिवसे भवति दोहिं एगट्ठिभागमुहुत्तेहिं ऊणे दुवालसमुहुत्ता राती भवति दोहिं एगट्ठिभागमुहुत्तेहिं अधिया, से णिक्खममाणे सूरिए दोच्चंसि अहोरत्तंसि दाहिणाए जाव पदेसाए अब्भितरं तच्चं उत्तरं अब्भमंडलसंठितिं उवसंकमिता चारं चरति, ततो जया णं अब्भितरं तच्चं उत्तरं जाव चारं चरति तता णं दिवसराइपमाणं तं चेव भाणियव्वं, एवं खलु एणं उवाएणं णिक्खममाणे सूरिए तताणंतराओ तदाणंतरं मंडलाओ मंडलं संकममाणे तंसि २ देसंसि तं तं अब्भमंडलसंठितिं जाव चारं चरति, ता जया णं सूरिए सव्वबाहिरं दाहिणं अब्भमंडल जाव चारं चरति तदा णं उत्तमकट्टपत्ता उक्कोसिया अट्टारसमुहुत्ता राई भवति जहण्णए दुवालस जाव दिवसे भवइ, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि दाहिणाए जाव पदेसाए बाहिराणंतरं उत्तरं अब्भमंडलसंठितिं उवसंकमिता चारं चरति, ततो जदा णं सूरिए बाहिराणंतरं अब्भमंडल जाव चारं चरति तता णं अट्टारसमुहुत्ता राती भवति दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवति दोहिं एगट्ठिभागमुहुत्तेहिं अधिये, से पविसमाणे सूरिए दोच्चंसि अहोरत्तंसि उत्तराए जाव पदेसाए बाहिरं तच्चं दाहिणं अब्भमंडलसंठितिं उव जाव चारं चरति, ता जया णं सूरिए बाहिरं तच्चं दाहिणं जाव चारं चरति तता णं अट्टारसमुहुत्ता राती भवति चउहिं एगट्ठिभागमुहुत्तेहिं ऊणा दुवालसमुहुत्ते दिवसे भवति चउहिं एगट्ठिभागमुहुत्तेहिं अहिए, एवं खलु एणं उवाएणं पविसमाणे सूरिए तयाणंतराओ तताणंतरं० तंसि २ देसंसि तं तं अब्भमंडलसंठितिं संकममाणे दाहिणाए जाव पएसाए सव्वब्भंतरं उत्तरं अब्भमंडलसंठितिं उवसंकमिता चारं चरति, जेता णं सूरिए सव्वब्भंतरं उत्तरं अब्भमंडलसंठितिं जाव चारं चरति तदा णं उत्तमकट्टपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राती भवति, (राई, सूर्यं० जहा दाहिणा तहा चेव णवरं उत्तरट्ठिओ अब्भितराणंतरं दाहिणं उवसंकमइ, दाहिणातो अब्भितरं तच्चं उत्तरं उवसंकमति, एवं खलु एणं उवाएणं जाव सव्वबाहिरं दाहिणं उवसंकमति, (सव्वबाहिरातो) बाहिराणंतरं उत्तरं उवसंकमति उत्तरातो बाहिरं तच्चं दाहिणं तच्चातो दाहिणातो संकममाणे २ जाव सव्वब्भंतरं उवसंकमति तहेव) एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे, गाहाओ ★★ ★ । १३॥ १-२॥ ★★ ★

ता के ते चिन्नं पडिचरंति आहि० ?, तत्थ खलु इमे दुवे सूरिया पं० तं०-भारहे चेव सूरिए एरवए चेव सूरिए, ता एते णं दुवे सूरिया पत्तेयं २ तीसाए २ मुहुत्तेहिं एगमेगं अद्धमंडलं चरंति, सट्टीए २ मुहुत्तेहिं एगमेगं मंडलं संघातंति, ता णिक्खममाणा खलु एते दुवे सूरिया णो अण्णमण्णस्स चिण्णं पडि चरंति, पविसमाणा खलु एते दुवे सूरिया अण्णमण्णस्स चिण्णं पडिचरंति, तं सतमेगं चोतालं, तत्थ कं हेउं वदेज्जा ?, ता अयण्णं जंबुद्दीवे दीवे जाव परिकखेवेणं, तत्थ णं अयं भारहए चेव सूरिए जंबुद्दीवस्स पाईणपडीणायतउदीणदाहिणायताए जीवाए मंडलं चउवीसएणं सतेणं छेत्ता दाहिणपुरत्थिमिल्लंसि चउभागमंडलंसि बाणउतियसूरियगताइं जाइं सूरिए अप्पणा चेव चिण्णाइं पडिचरति उत्तरपच्चत्थिमिल्लंसि चउभागमंडलंसि एक्काणउतिं सूरियगताइं जाइं सूरिए अप्पणा चेव चिण्णाइं पडिचरति, तत्थ अयं भारहे सूरिए एरवतस्स सूरियस्स जंबुद्दीवस्स पाईणपडीणायताए उदीणदाहिणायताए जीवाए मंडलं चउवीसएणं सतेणं छेत्ता उत्तरपुरच्छिमिल्लंसि चउभागमंडलंसि बाणउतिं सूरियगताइं जाइं सूरिए परस्स चिण्णाइं पडिचरति दाहिणपच्चच्छिमिल्लंसि चउभागमंडलंसि एक्काणउतिं सूरियगताइं जाइं सूरिए परस्स चेव चिण्णाइं पडिचरति, तत्थ अयं एरवए सूरिए जंबुद्दीवस्स पाईणपडीणायताए उदीणदाहिणायताए जीवाए मंडलं चउवीसएणं सतेणं छेत्ता उत्तरपुरत्थिमिल्लंसि चउभागमंडलंसि बाणउतिं सूरियगताइं जाइं सूरिए अप्पणा चिण्णाइं पडियरति दाहिणपुरत्थिमिल्लंसि चउभागमंडलंसि एक्काणउतिसूरियगताइं जाइं सूरिए अप्पणा चेव चिण्णाइं पडिचरति, तत्थ णं एयं एरवतिए सूरिए भारहस्स सूरियस्स जंबुद्दीवस्स पाईणपडीणायताए उदीणदाहिणायताए जीवाए मंडलं चउवीसएणं सतेणं छेत्ता दाहिणपच्चत्थिमिल्लंसि चउभागमंडलंसि बाणउतिं सूरियगताइं जाइं सूरिए परस्स चिण्णाइं पडिचरति उत्तरपुरत्थिमिल्लंसि चउभागमंडलंसि एक्काणउतिं सूरियगताइं जाइं सूरिए परस्स चेव चिण्णाइं पडिचरति, ता निक्खममाणे खलु एते दुवे सूरिया णो अण्णमण्णस्स चिण्णं पडिचरंति, पविसमाणा खलु एते दुवे सूरिया अण्णमण्णस्स चिण्णं पडिचरंति, तं०-‘सतमेगं चोतालं० गाहाओ ★★ ★ १४॥१-३॥९ ★★ ता केवइयं एए दुवे सूरिया अण्णमण्णस्स अंतरं कट्टु चारं चरंति आहि० ?, तत्थ खलु इमातो छ पडिवत्तीओ पं०, तत्थ एगे एव०-ता एगं जोयणसहस्स एगं च तेत्तीसं जोयणसतं अण्णमण्णस्स अंतरं कट्टु सूरिया चारं चरंति आहि० एगे एव०, एगे पुण०-ता एगं जोयणसहस्स एगं चउतीसं जोयणसयं अन्नमन्नस्स अंतरं कट्टु सूरिया चारं चरंति आहि० एगे एव०, एगे पुण०-ता एगं जोयणसहस्स एगं च पणतीसं जोयणसयं अण्णमण्णस्स अंतरं कट्टु सूरिया चारं चरंति आहि० एगे एव०, एवं एगं दीवं एगं समुदं अण्णमण्णस्स अंतरं कट्टु०, एगे० दो दीवे दो समुदे०, एगे० तिण्णि दीवे तिण्णि समुदे०, वयं पुण एवं वयामो-ता पंच २ जोयणाइं पणतीसं च एगट्ठिभागे जोयणस्स एगमेगे मण्डले अण्णमण्णस्स अंतरं अभिवड्ढेमाणा वा निवड्ढेमाणा वा सूरिया चारं चरंति०, तत्थ णं को हेऊ आहि० ?, ता अयण्णं जंबुद्दीवे जाव परिकखेवेणं, ता जया णं एते दुवे सूरिया सव्वब्भंतरं मंडलं उवसंकमित्ता चारं चरंति तदा णं णवणउतिजोयणसहस्साइं छच्च चत्ताले जोयणसते अण्णमण्णस्स अंतरं कट्टु चारं चरंति आहि० तता णं उत्तमकट्टुपत्ते उक्कोसए अट्टारसमुहुत्ते दिवसे भवति जहण्णिया दुवालसमुहुत्ता राई भवति, ते निक्खममाणा सूरिया णवं संवच्छरं अयमाणा पढमंसि अहोरत्तंसि अब्भितराणंतरं मंडलं उवसंकमित्ता चारं चरंति, ता जता णं एते दुवे सूरिया जाव चारं चरंति तदा णं नवनवतिं जोयणसहस्साइं छच्च पणताले जोयणसते पणतीसं च एगट्ठिभागे जोयणस्स अण्णमण्णस्स अंतरं कट्टु चारं चरंति आहि०, तता णं अट्टारसमुहुत्ते दिवसे भवति दोहिं एगट्ठिभागमुहुत्तेहिं ऊणे दुवालसमुहुत्ता राती भवति दोहिं एगट्ठिभागमुहुत्तेहिं अधिया, ते णिक्खममाणा सूरिया दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरंति, ता जता एते दुवे सूरिया अब्भितरं तच्चं मंडलं जाव चारं चरंति तथा णं नवनवई जोयणसहस्साइं छच्च इक्कावण्णे जोयणसए नव य एगट्ठिभागे जोयणस्स अण्णमण्णस्स अंतरं कट्टु चारं चरंति० तदा णं अट्टारसमुहुत्ते दिवसे भवइ चउहिं एगट्ठिभागमुहुत्तेहिं ऊणे दुवालसमुहुत्ता राई भवइ चउहिं एगट्ठिभागमुहुत्तेहिं अधिया, एवं खलु एतेणुवाएणं णिक्खममाणा एते दुवे सूरिया तताणंतरातो तदाणंतरं मंडलाओ मंडलं संकममाणा २ पंच जोयणाइं पणतीसं च एगट्ठिभागे जोयणस्स एगमेगे मंडले अण्णमण्णस्स अंतरं अभिवड्ढेमाणा २ सव्वबाहिरं मंडलं उवसंकमित्ता चारं चरंति, ता जया णं एते दुवे सूरिया सव्वबाहिरं मंडलं उवसंकमित्ता चारं चरंति तता णं

एगं जोयणसतसहस्सं छच्च सट्ठे जोयणसते अण्णमण्णस्स अतरं कट्ठु चारं चरंति तता णं उत्तमकट्ठपत्ता जाव राई भवइजहण्णए दुवाल जाव दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, ते पविसमाणा सूरिया दोच्चं छम्मासं अयमाणा पढमंसि अहोरत्तंसि बाहिराणंतरं मंडलं उवसंकमिता चारं चरंति, ता जया णं एते दुवे सूरिया बाहिराणंतरं मंडलं उवसंकमिता चारं चरंति तदा णं एगं जोयणसयसहस्सं छच्च चउप्पण्णे जोयणसते छव्वीसं च एगट्ठिभागे जोयणस्स अण्णमण्णस्स अंतरं कट्ठु चारं चरंति तदा णं अट्ठारसमुहुत्ता राई भवई दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवति दोहिं एगट्ठिभागमुहुत्तेहिं अहिए, ते पविसमाणा सूरिया दोच्चंसि अहोरत्तंसि बाहिरं तच्चं मंडलं उवसंकमिता चारं चरंति, ता जता णं एते दुवे सूरिया बाहिरं तच्चं मंडलं उवसंकमिता चारं चरंति तता णं एगं जोयणसयसहस्सं छच्च अडयाले जोयणसते बावण्णं च एगट्ठिभागे जोयणस्स अण्णमण्णस्स अंतरं कट्ठु चारं चरंति तता णं अट्ठारसमुहुत्ता राई भवइ चउहिं एग जाव ऊणा दुवालसमुहुत्ते दिवसे भवति चउहिं जाव अहिए, एवं खलु एतेणुवाएणं पविसमाणा एते दुवे सूरिया ततोऽणंतरातो तदाणंतरं मंडलाओ मंडलं संकममाणा पंच जोयणाइं पणतीसं च एगट्ठिभागे जोयणस्स एगमेगे मंडले अण्णमण्णस्संतरं णिवुड्ढेमाणा २ सव्वब्भंतरं मंडलं उवसंकमिता चारं चरंति, जया णं एते दुवे सूरिया सव्वब्भंतरं मंडलं उवसंकमिता चारं चरंति तता णं णवणउतिं जोयणसहस्साइं छच्च चत्ताले जोयणसते अण्णमण्णस्स अंतरं कट्ठु चारं चरंति तता णं उत्तमकट्ठपत्ते जाव दिवसे भवति जहण्णिया दुवालसमुहुत्ता राई भवति, एसणं दोच्चे छम्मासे एस णं दोच्चस्स छम्मासस्स पज्जवसाणे एस णं आइच्चे संवच्छरे एस णं आइच्चस्स संवच्छरस्स पज्जवसाणे ★★१५॥१-४॥★★ ता केवतियं ते दीवं वा समुदं वा ओगाहिता सूरिए चारं चरति आहि० ?, तत्थ खलु इमाओ पंच पडिवत्तीओ पं०, एगे एव०-ता एगं जोयणसहस्सं एगं च तेत्तीसं जोयणसतं दीवं वा समुदं वा ओगाहिता सूरिए चारं (२०४) चरति एगे एव०, एगे पुण०-ता एगं जोयणसहस्सं एगं च चउत्तीसं जोयणसयं दीवं वा समुदं वा ओगाहिता सूरिए चारं चरति एगे एव०, एगे पुण०-ता एगं जोयणसहस्सं एगं च पणतीसं जोयणसतं दीवं वा समुदं वा ओगाहिता सूरिए चारं चरति एगे एव०, एगे पुण०-ता अवड्ढं दीवं वा समुदं वा ओगाहिता सूरिए चारं चरति एगे एव०, एगे पुण०-ता नो किंचि दीवं वा समुदं वा ओगाहिता सूरिए चारं चरति, तत्थ जे ते एवमाहंसु-ता एगं जोयणसहस्सं एगं च तेत्तीसं जोयणसतं दीवं वा समुदं वा ओगाहिता सूरिए चारं चरति ते एवमाहंसु-जता णं सूरिए सव्वब्भंतरं मंडलं उवसंकमिता चारं चरति तया णं जंबुदीवं एगं जोयणसहस्सं एगं च तेत्तीसं जोयणसतं ओगाहिता सूरिए चारं चरति तता णं उत्तमकट्ठपत्ते उक्कोसए अट्ठारसमुहुत्ते दिवसे भवति जहण्णिया दुवालसमुहुत्ता राई भवई, ता जया णं सूरिए सव्वबाहिरं मंडलं उवसंकमिता चारं चरइ तया णं लवणसमुदं एगं जोयणसहस्सं एगं च तेत्तीसं जोयणसयं ओगाहिता चारं चरइ तया णं उत्तमकट्ठपत्ता उक्कोसिया अट्ठारसमुहुत्ता राई भवति जहण्णए दुवालसमुहुत्ते दिवसे भवइ, एवं चोत्तीसेऽवि, पणतीसेऽवि एवं चेव भाणियव्वं, तत्थ जे ते एव० ता अवड्ढं दीवं वा समुदं वा ओगाहिता सूरिए चारं चरति ते एवमा०-जता णं सूरिए सव्वब्भंतरं मंडलं उवसंकमिता चारं चरति तता णं अवड्ढं जंबुदीवं० ओगाहिता चारं चरति, तता णं उत्तमकट्ठपत्ते उक्कोसए अट्ठारसमुहुत्ते दिवसे भवति जहण्णिया दुवालसमुहुत्ता राई भवति, एवं सव्वबाहिरएवि, णवरं अवड्ढं लवणसमुदं, तता णं राइंदियं तहेव, तत्थ जे ते एव०-ता णो किञ्चि दीवं वा समुदं वा ओगाहिता सूरिए चारं चरति ते एव०-ता जता णं सूरिए सव्वब्भंतरं मंडलं उवसंकमिता चारं चरति तता णो किंचि दीवं वा समुदं वा ओगाहिता सूरिए चारं चरति तता णं उत्तमकट्ठपत्ते उक्कोसए अट्ठारसमुहुत्ते दिवसे भवति तहेव, एवं सव्वबाहिरए मंडले, णवरं णो किंचि लवणसमुदं ओगाहिता चारं चरति, रातिंदियं तहेव एगे एव० ॥१६॥ वयं पुण एवं वदामो-ता जया णं सूरिए सव्वब्भंतरं मंडलं उवसंकमिता चारं चरति तता णं जंबुदीवं असीतं जोयणसतं ओगाहिता चारं चरति, तदा णं उत्तमकट्ठपत्ते उक्कोसए अट्ठारसमुहुत्ते दिवसे भवति जहण्णिया दुवालसमुहुत्ता राई भवति, एवं सव्वबाहिरएवि, णवरं लवणसमुदं तिण्णि तीसे जोयणसते ओगाहिता चारं चरति तता णं उत्तमकट्ठपत्ता उक्कोसिया अट्ठारसमुहुत्ता राई भवइ जहण्णए दुवालसमुहुत्ते दिवसे भवति, गाथाओ भाणितव्वाओ ★★१७॥१-५॥★★ ता केवतियं ते एगमेगेणं रातिंदिएणं विकंपइत्ता २ सूरिए चारं चरति आहि० ?, तत्थ खलु इमाओ सत्त पडिवत्तीओ पं०, तत्थेगे

एव०-ता दो जोयणाइं अद्धदुचत्तालीसं तेसीतसयभागे जोयणस्स एगमेगेणं रातिंदिएणं विकंपइत्ता २ सूरिए चारं चरति एगे एव०, एगे पुण०-ता अइढातिज्जाइं जोयणाइं एगमेगेणं राइंदिएणं विकंपइत्ता २ सूरिए चारं चरति एगे एव०, एगे पुण०-ता तिभागूणाइं तिन्नि जोयणाइं एगमेगेणं राइंदिएणं विकंपइत्ता २ सूरिए चारं चरति एगे एव०, एगे पुण०-ता तिणिण जोयणाइं अद्धसीतालीसं च तेसीतिसयभागे जोयणस्स एगमेगेणं राइंदिएणं विकंपइत्ता २ सूरिए चारं चरति एगे एव०, एगे पुण०-ता अद्धुद्धाइं जोयणाइं एगमेगेणं राइंदिएणं विकंपइत्ता सूरिए चारं चरति एगे एव०, एगे०-ता चउब्भागूणाइं चत्तारि जोयणाइं एगमेगेणं राइंदिएणं विकंपइत्ता सूरिए चारं चरति एगे एव०, एगे पुण०-ता चत्तारि जोयणाइं अद्धबावण्णं च तेसीतिसयभागे जोयणस्स एगमेगेणं राइंदिएणं विकंपइत्ता सूरिए चारं चरति एगे०, वयं पुण एवं वदामो-ता दो जोयणाइं अडतालीसं च एगट्टिभागे जोयणस्स एगमेगं मंडलं एगमेगेणं राइंदिएणं विकंपइत्ता सूरिए चारं चरति, तत्थ णं को हेतू इति वदेज्जा ?, ता अंयण्णं जंबुद्दीवे जाव परिक्खेवेणं, ता जता णं सूरिए सव्वब्भंतरं मंडलं उवसंकमित्ता चारं चरति तता णं उत्तमकट्ठपत्ते उक्कोसए अट्टारसमुहुत्ते दिवसे भवति जंहणिया दुवालसमुहुत्ता राई भवइ, से णिक्खममाणे सूरिए णवं संवच्छरं अंयमाणे पढमंसि अहोरत्तंसि अब्भितराणंतरं मंडलं उवसंकमित्ता चारं चरति, ता जया णं सूरिए अब्भितराणंतरं मंडलं उवसंकमित्ता चारं चरति तदा णं दो जोयणाइं अडयालीसं च एगट्टिभागे जोयणस्स एगेणं राइंदिएणं विकंपइत्ता सूरिए चारं चरति तता णं अट्टारसमुहुत्ते दिवसे भवति दोहिं एगट्टिभागमुहुत्तेहिं ऊणे दुवालसमुहुत्ता राई भवति दोहिं एगट्टिभागमुहुत्तेहिं अहिया, से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमित्ता चारं चरति, ता जया णं सूरिए अब्भितरं तच्चं मंडलं उवसंकमित्ता चारं चरति तता णं पंच जोयणाइं पणतीसं च एगट्टिभागे जोयणस्स दोहिं राइंदिएहिं विकंपइत्ता चारं चरति, तता णं अट्टारसमुहुत्ते दिवसे भवति चउहिं एगट्टिभागमुहुत्तेहिं ऊणे दुवालसमुहुत्ता राई भवति चउहिं एगट्टिभागमुहुत्तेहिं अधिया, एवं खलु एतेणं उवाएणं णिक्खममाणे सूरिए तताणंतराओ मंडलातो तदाणंतरं मंडलं संकममाणे दो २ जोयणाइं अडतालीसं च एगट्टिभागे जोयणस्स एगमेगं मंडलं एगमेगेणं राइंदिएणं विकम्पमाणे २ सव्वबाहिरं मंडलं उवसंकमित्ता चारं चरति ता जया णं सूरिए सव्वब्भंतरातो मंडलातो सव्वबाहिरं मंडलं उवसंकमित्ता चारं चरति तया णं सव्वब्भंतरं मंडलं पणिहाय एगेणं तेसीतेणं राइंदियसतेणं पंच दसुत्तरजोयणसते विकंपइत्ता चारं चरति, तता णं उत्तमकट्ठपत्ता उक्कोसिया अट्टारसमुहुत्ता राई भवइ जहण्णए दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से य पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमित्ता चारं चरति, ता जता णं सूरिए बाहिराणंतरं मंडलं उवसंकमित्ता चारं चरति तया णं दो दो जोयणाइं अडयालीसं च एगट्टिभागे जोयणस्स एगेणं राइंदिएणं विकम्पइत्ता चारं चरति तता णं अट्टारसमुहुत्ता राई भवति दोहिं एगट्टिभागमुहुत्तेहिं ऊणा दुवालसमुहुत्ते दिवसे भवति दोहिं एगट्टिभागमुहुत्तेहिं अहिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमित्ता चारं चरति, ता जया णं सूरिए बाहिरं तच्चं मंडलं उवसंकमित्ता चारं चरति तया णं पंच २ जोयणाइं पणतीसं च एगट्टिभागे जोयणस्स दोहिं राइंदिएहिं विकंपइत्ता चारं चरति, राइंदिए तहेव, एवं खलु एतेणुवाएणं पविसमाणे सूरिए तताऽणंतरातो तयाणंतरं मंडलाओ मंडलं संकममाणे २ दो २ जोयणाइं अडयालीसं च एगट्टिभागे जोयणस्स एगमेगेणं राइंदिएणं विकंपमाणे २ सव्वब्भंतरं मंडलं उवसंकमित्ता चारं चरति, ता जया णं सूरिए सव्वबाहिरातो मंडलातो सव्वब्भंतरं मंडलं उवसंकमित्ता चारं चरति तता णं सव्वबाहिरं मंडलं पणिधाय एगेणं तेसीएणं राइंदियसतेणं पंचदसुत्तरे जोयणसते विकंपइत्ता चारं चरति तता णं उत्तमकट्ठपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवइ, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे ★★★ ११८११-६॥ ★★ ता कहं ते मंडलसंठिती आहि० ?, तत्थ खलु इमातो अट्ट पडिवत्तीओ पं०, तत्थेगे एव०-ता सव्वावि मंडलवता समचउरंससंठाणसंठिता पं० एगे एव०, एगे पुण०-ता सव्वावि णं मंडलवता विसमचउरंससंठाणसंठिया पं० एगे एव०, एगे पुण०-सव्वावि

णं मंडलवया समचदुक्कोणसंठिता पं० एगे ए०, एगे पुण०-सव्वावि मंडलवता विसमचउक्कोणसंठिया पं० एगे एव०, एगे पुण०-ता सव्वावि मंडलवया समचक्कवालसंठिया पं० एगे एव०, एगे पुण०-ता सव्वावि मंडलवता विसमचक्कवालसंठिया पं० एगे एव०, एगे पुण०-ता सव्वावि मंडलवता चक्कद्धचक्कवालसंठिया पं०, एगे पुण०-ता सव्वावि मंडलवता छत्तागारसंठिया पं० एगे एव०, तत्थ जे ते एवमाहंसु-ता सव्वावि मंडलवता छत्ताकारसंठिता पं० एतेणं णएणं णायव्वं, णो चेव णं इतरेहिं, पाट्टुगहाओ भाणियव्वाओ ☆☆☆ ११९॥१-७॥☆☆☆ ता सव्वावि णं मंडलवया केवतियं बाहल्लेणं केवतियं आयामविक्रखंभेणं केवतियं परिक्रखेवेणं आहि० ?, तत्थ खलु इमा तिणि पडिवत्तीओ पं०, तत्थेगे एव०-ता सव्वावि णं मंडलवता जोयणं बाहल्लेणं एगं जोयणसहस्सं एगं तेत्तीसं च जोयणसतं आयामविक्रखंभेणं तिणि जोयणसहस्साइं तिणि य नवणउए जोयणसते परिक्रखेवेणं पं० एगे एव०, एगे पुण०-ता सव्वावि णं मंडलवता जोयणं बाहल्लेणं एगं जोयणसहस्सं एगं च चउत्तीसं जोयणसयं आयामविक्रखंभेणं तिणि जोयणसहस्साइं चत्तारि बिउत्तरे जोयणसते परिक्रखेवेणं पं० एगे एव०, एगे पुण०-ता जोयणं बाहल्लेणं एगं जोयणसहस्सं एगं च पणतीसं जोयणसतं आयामविक्रखंभेणं तिन्नि जोयणसहस्साइं चत्तारि पंचुत्तरे जोयणसते परिक्रखेवेणं पं० एगे एव०, वयं पुण०-ता सव्वावि मंडलवता अडतालीसं एगट्ठिभागे जोयणस्स बाहल्लेणं अणियता आयामविक्रखंभेणं परिक्रखेवेणं च आहि०, तत्थ णं को हेउत्ति वदेज्जा ?, ता अयणं जंबुद्दीवे जाव परिक्रखेवेणं, ता जया णं सूरिए सव्वब्भंतरं मंडलं उवसंकमिता चारं चरति तया णं सा मंडलवता अडतालीसं एगट्ठिभागे जोयणस्स बाहल्लेणं णवणउई जोयणसहस्साइं छच्च चत्ताले जोयणसते आयामविक्रखंभेणं तिणि जोयणसतसहस्साइं पण्णरस जोयणसहस्साइं एगूणणउती जोयणाइं किंचिविसेसाहिए परिक्रखेवेणं तता णं उत्तमकट्टपत्ते उक्कोसए अट्ठारसमुहुत्ते दिवसे भवति जहणिया दुवालसमुहुत्ता राई भवति, से णिक्रखममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता चारं चरति, ता जया णं सूरिए अब्भितराणंतरं मंडलं उवसंकमिता चारं चरति तदा णं सा मंडलवता अडतालीसं एगट्ठिभागे जोयणस्स बाहल्लेणं णवणवई जोयणसहस्साइं छच्च पणताले जोयणसते पणतीसं च एगट्ठिभागे जोयणस्स आयामविक्रखंभेणं तिणि जोयणसतसहस्साइं पन्नरसं च सहस्साइं एगं सत्तउत्तरं जोयणसतं किंचिविसेसूणं परिक्रखेवेणं तदा णं दिवसरातिप्पमाणं तहेव, से णिक्रखममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिता चारं चरति, ता जया णं सूरिए अब्भितरं तच्चं मंडलं उवसंकमिता चारं चरति तया णं सा मंडलवता अडतालीसं एगट्ठिभागे जोयणस्स बाहल्लेणं णवणवती जोयणसहस्साइं छच्च एक्कावण्णे जोयणसते णव य एगट्ठिभागा जोयणस्स आयामविक्रखंभेणं तिणि जोयणसयसहस्साइं पन्नरस य सहस्साइं एगं च पणवीसं जोयणसयं परिक्रखेवेणं पं० तता णं दिवसराई तहेव, एवं खलु एतेण उवाएणं निक्खममाणे सूरिए तताणंतरातो तदाणंतरं मंडलातो मंडलं उवसंकममाणे २ पंच २ जोयणाइं पणतीसं च एगट्ठिभागे जोयणस्स एगमेगे मंडले विक्रखंभं अभिवड्ढेमाणे २ अट्ठारस २ जोयणाइं परिरयवुड्ढिं अभिवड्ढेमाणे २ सव्वबाहिरं मंडलं उवसंकमिता चारं चरति, ता जया णं सूरिए सव्व जाव चारं चरति तता णं सा मंडलवता अडतालीसं एगट्ठिभागा जोयणस्स बाहल्लेणं एगं च जोयणसयसहस्सं छच्च सद्धे जोयणसते आयामविक्रखंभेणं तिन्नि जोयणसयसहस्साइं अट्ठारस सहस्साइं तिणि य पण्णरसुत्तरे जोयणसते परिक्रखेवेणं तदा णं उक्कोसिया अट्ठारसमुहुत्ता राई भवति जहणिए दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिता चारं चरति ता जया णं सूरिए बाहिराणंतरं मंडलं उवसंकमिता चारं चरति तता णं सा मंडलवता अडतालीसं एगट्ठिभागे जोयणस्स बाहल्लेणं एगं जोयणसयसहस्सं छच्च चउप्पण्णे जोयणसते छव्वीसं च एगट्ठिभागे जोयणस्स आयामविक्रखंभेणं तिन्नि जोयणसतसहस्साइं अट्ठारससहस्साइं दोणि य सत्ताणउते जोयणसते परिक्रखेवेणं पं०, तता णं राइंदियं तहेव, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरति, ता जया णं सूरिए बाहिरं तच्चं मंडलं उवसंकमिता चारं चरति तता णं सा मंडलवता अडतालीसं एगट्ठिभागे जोयणस्स बाहल्लेणं एगं जोयणसतसहस्सं छच्च अडताले जोयणसए बावणं च एगट्ठिभागे जोयणस्स आयामविक्रखंभेणं

तिणि ज्योणसतसहस्साइं अट्टारस सहस्साइं दोणि अउणासीते ज्योणसते परिकखेवेणं पं०, दिवसराई तहेव, एवं खलु एतेणुवाएणं पविसमाणे सूरिए तताणंतरातो तदाणंतरं मंडलातो मंडलं संकममाणे २ पंच २ ज्योणाइं पणतीसं च एगट्ठिभागे ज्योणस्स एगमेगे मंडले विक्खंभवुड्ढि णिवुड्ढेमाणे २ अट्टारस ज्योणाइं परिरयवुड्ढि णिवुड्ढेमाणे २ सव्वब्भंतरं मंडलं उवसंकमित्ता चारं चरति, ता जता णं सूरिए सव्वब्भंतरं मंडलं उवसंकमित्ता चारं चरति तता णं सा मंडलवया अडयालीसं एगट्ठिभागे ज्योणस्स बाहल्लेणं णवणउतिं ज्योणसहसाइं छच्च चत्ताले ज्योणसए आयामविक्खंभेणं तिणि ज्योणसयसहस्साइं पण्णरस य सहस्साइं अउणाणउतिं च ज्योणाइं किंचिविसेसाहियाइं परिकखेवेणं पं०, तता णं उत्तमकट्ठपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे, ता सव्वावि णं मंडलवता अडतालीसं एगट्ठिभागे ज्योणस्स बाहल्लेणं, सव्वावि णं मंडलंतरिया दो ज्योणाइं विक्खंभेणं, एस णं अब्बा तेसीयसतपडुप्पणो पंच दसुत्तरे ज्योणसते आहि०, ता अब्भंतरातो मंडलवताओ बाहिरं मंडलवतं बाहिराओ वा अब्भंतरं मंडलवतं एस णं अब्बा केवतियं आहि० ?, ता पंच दसुत्तरज्योणसते आहि०, अब्भंतराते मंडलवताते बाहिरा मंडलवया बाहिराओ मंडलवतातो अब्भंतरा मंडलवता एस णं अब्बा केवतियं आहि० ?, ता पंच दसुत्तरे ज्योणसते अडतालीसं च एगट्ठिभागे ज्योणस्स आहि०, ता अब्भंतरातो मंडलवतातो बाहिरमंडलवता बाहिरातो० अब्भंतरमंडलवता एस णं अब्बा केवतियं आहि० ?, ता पंच णवुत्तरे ज्योणसते तेरस य एगट्ठिभागे ज्योणस्स आहि०, अब्भंतराते मंडलवताए बाहिरा मंडलवया बाहिराते मंडलवताते अब्भंतरमंडलवया एस णं अब्बा केवतियं आहि० ?, ता पंच दसुत्तरे ज्योणसए आहि०

॥२०॥१-८ पढमं पाहुडं १॥ ता कहां ते तेरिच्छगती आहि० ?, तत्थ खलु इमाओ अट्ट पडिवत्तीओ पं०, तत्थेगे एव०-ता पुरच्छिमातो लोअंतातो पादो मरीची आगासंसि उट्ठेति, से णं इमं लोयं तिरियं करेइ ता पच्चत्थिमंसि लोगन्तंसि सायं सूरिए आगासंसि विद्धंसति एगे एव०, एगे पुण०-ता पुरच्छिमातो लोअंतातो पातो सूरिए आगासंसि उट्ठेति, से णं इमं लोयं तिरियं करेति ता पच्चत्थिमंसि लोयंतंसि सायं सूरिए आगासंसि विद्धंसति एगे एव०, एगे पुण०-ता पुरत्थिमाओ लोयंतातो पादो सूरिए आगासंसि उत्तिट्ठति, से णं इमं लोयं तिरियं करेति ता पच्चत्थिमंसि लोयंतंसि सायं सूरिए आगासं अणुपविसति ता अहे पडियागच्छति ता पुणरवि अवरभूपुरत्थिमातो लोयंतातो पातो सूरिए आगासंसि उत्तिट्ठति एगे एव०, एगे पुण०-ता पुरत्थिमाओ लोगंताओ पाओ सूरिए पुढवीओ उत्तिट्ठति, से णं इमं लोयं तिरियं करेति ता पच्चत्थिमिल्लंसि लोयंतंसि सायं सूरिए पुढवीकायंसि विद्धंसइ एगे एव०, एगे पुण०-पुरत्थिमाओ लोयंताओ पाओ सूरिए पुढवीओ उत्तिट्ठइ, से णं इमं तिरियं लोयं करेइ ता पच्चत्थिमंसि लोयंतंसि सायं सूरिए पुढवीकायं अणुपविसइ ता अहे पडियागच्छइ ता पुणरवि अवरभूपुरत्थिमाओ लोगंताओ पाओ सूरिए पुढवीओ उत्तिट्ठइ एगे एव०, एगे पुण०-ता पुरत्थिमिल्लाओ लोयंताओ पाओ सूरिए आउकायंसि उत्तिट्ठइ, से णं इमं तिरियं लोयं तिरियं करेइ ता पच्चत्थिमंसि लोयंतंसि सायं सूरिए आउकायंसि विद्धंसति एगे एव०, एगे पुण०-ता पुरत्थिमातो लोगंताओ पाओ सूरिए आउओ उत्तिट्ठति, से णं इमं तिरियं लोयं तिरियं करेति ता पच्चत्थिमंसि लोयंतंसि सायं सूरिए आउकायंसि पविसइ ता अहे पडियागच्छति ता पुणरवि अवरभूपुरत्थिमातो लोयंतातो पादो सूरिए आउओ० एगे एव०, एगे पुण एव०-ता पुरत्थिमातो लोयंताओ बहूइं ज्योणाइं बहूइं ज्योणसताइं बहूइं ज्योणसहस्साइं उड्ढं दूरं उप्पत्तित्ता एत्थ णं पातो सूरिए आगासंसि उत्तिट्ठति, से णं इमं दाहिणइढं लोयं तिरियं करेति ता उत्तरद्धलोयं तमेव रातो, से णं इमं उत्तरद्धलोयं तिरियं करेइ ता दाहिणद्धलोयं तमेव राओ, से णं इमाइं दाहिणुत्तरइढलोयाइं तिरियं करेइ ता पुरत्थिमाओ लोयंताओ बहूइं ज्योणाइं तं चेव उड्ढं दूरं उप्पत्तित्ता एत्थ णं पातो सूरिए आगासंसि उत्तिट्ठति एगे एव०, वयं पुण एवं वयामो-ता जंबुदीवस्स पाईणपडीणायतउदीणदाहिणायताए जीवाए मंडलं चउवीसेणं सतेणं छेत्ता दाहिणपुरच्छिमंसि उत्तरपच्चत्थिमंसि य चउब्भागमंडलंसि इमीसे रयणप्पभाए पुढवीए बहुसमरमणिज्जातो भूमिभागातो अट्ट ज्योणसताइं उड्ढं

उप्पत्तिता एत्थ णं पादो दुवे सूरिया आगासाओ उत्तिट्ठंति, ते णं इमाइं दाहिणुत्तराइं जंबुदीवभागाइं तिरियं करेति ता पुरत्थिमपच्चत्थिमाइं जंबुदीवभागाइं तमेव रातो, ते णं इमाइं पुरच्छिमपच्चत्थिमाइं जंबुदीवभागाइं तिरियं करेति ता दाहिणुत्तराइं जंबुदीवभागाइं तमेव रातो, ते णं इमाइं दाहिणुत्तराइं पुरच्छिमपच्चत्थिमाणिय जंबुदीवभागाइं तिरियं करेति ता जंबुदीवस्स पाईणपडीणायत जाव एत्थ णं पादो दुवे सूरिया आगासंसि उत्तिट्ठंति ★★ १२१॥२-१॥ ★★ ता कहं ते मंडलाओ मंडलं संकममाणे २ सूरिए चारं चरति आहि० ?, तत्थ खलु इमातो दुवे पडिवत्तीओ पं०, तत्थेगे एव०-ता मंडलाओ मंडलं संकममाणे २ सूरिए भेयघाएणं संकामइ एगे एव०, एगे पुण०-ता मंडलातो मंडलं संकममाणे सूरिए कण्णकलं णिव्वेढेति, तत्थ जे ते एव०-ता मंडलातो मंडलं संकममाणे २ सूरिए भेयघाएणं संकामइ तेसिं णं अयं दोसे-ता जेणंतरेणं मंडलातो मंडलं संकममाणे २ सूरिए भेयघाएणं संकमति एवतियं च णं अब्बं पुरतो न गच्छति, पुरतो अगच्छमाणे मंडलकालं परिहवेति, तेसिं णं अयं दोसे, तत्थ जे ते एव०-ता मंडलातो मंडलं संकममाणे सूरिए कण्णकलं णिव्वेढेति तेसिं णं अयं विसेसे-ता जेणंतरेणं मंडलातो मंडलं संकममाणे सूरिए कण्णकलं णिव्वेढेति एवतियं च णं अब्बं पुरतो गच्छति, पुरतो गच्छमाणे मंडलकालं ण परिहवेति, तेसिं णं अयं विसेसे, तत्थ जे ते एव०-मंडलातो मंडलं संकममाणे सूरिए कण्णकलं णिव्वेढेति एतेणं णएणं णेतव्वं, णो चेव णं इतरेणं ★★ १२२॥ २.२॥ ★★ ता केवतियं ते खेतं सूरिए एगमेगेणं मुहुत्तेणं गच्छति आहि० ?, तत्थ खलु इमातो चत्तारि पडिवत्तीओ पं० तं०-तत्थ एगे एव०-ता छ छ जोयणसहस्साइं सूरिए एगमेगेणं मुहुत्तेणं गच्छति०, एगे पुण०-ता पंच २ जोयणसहस्साइं सूरिए एगमेगेणं मुहुत्तेणं गच्छति एगे०, एगे पुण०-ता चत्तारि २ जोयणसहस्साइं सूरिए एगमेगेणं मुहुत्तेणं गच्छति एगे एव०, एगे पुण०-ता छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छति एगे०, तत्थ जे ते एवमाहंसु ता छ छ जोयणसहस्साइं सूरिए एगमेगेणं मुहुत्तेणं गच्छति ते एव०-जता णं सूरिए सव्वब्भंतरं मंडलं उवसंकमिता चारं चरति तथा णं उत्तमकट्टपत्ते उक्कोसे अट्टारसमुहुत्ते दिवसे भवति जहणिया दुवालसमुहुत्ता राई भवति, तंसि च णं दिवसंसि एगं जोयणसतसहस्सं अट्ट य जोयणसहस्साइं तावक्खेत्ते पं०, ता जया णं सूरिए सव्वबाहिरं मंडलं उवसंकमिता चारं चरति तथा णं उत्तमकट्टपत्ता उक्कोसिया अट्टारसमुहुत्ता राई भवति जहणिए दुवालसमुहुत्ते दिवसे भवति, तंसि च णं दिवसंसि बावत्तरिं जोयणसहस्साइं तावक्खेत्ते पं०, तथा णं छ छ जोयणसहस्साइं सूरिए एगमेगेणं मुहुत्तेणं गच्छति, तत्थ जे ते एवमाहंसु-ता पंच पंच जोयणसहस्साइं सूरिए एगमेगेणं मुहुत्तेणं गच्छति ते एव०, ता जता णं सूरिए सव्वब्भंतरं मंडलं उवसंकमिता चारं चरति तहेव दिवसराइप्पमाणं, तंसि च णं दिवसंसि तावक्खेत्ते नउइजोयणसहस्साइं, ता जया णं सव्वबाहिरं मंडलं उवसंकमिता चारं चरति तता णं तं चेव राइंदियप्पमाणं तंसि च णं दिवसंसि सट्ठिं जोयणसहस्साइं तावक्खेत्ते पं०, तता णं पंच २ जोयणसहस्साइं सूरिए एगमेगेणं मुहुत्तेणं गच्छति, तत्थ जे ते एव०-ता चत्तारि जोयणसहस्साइं सूरिए एगमेगेणं मुहुत्तेणं गच्छति ते एवमा०-ता जया णं सूरिए सव्वब्भंतरं मंडलं उवसंकमिता चारं चरति तता णं दिवसराई तहेव, तंसि च णं दिवसंसि बावत्तरिं जोयणसहस्साइं तावक्खेत्ते पं०, ता जया णं सूरिए सव्वबाहिरं मंडलं उवसंकमिता चारं चरति तता णं राइंदियं तथेव, तंसि च णं दिवसंसि अडयालीसं जोयणसहस्साइं तावक्खेत्ते पं०, तता णं चत्तारि जोयणसहस्साइं सूरिए एगमेगेणं मुहुत्तेणं गच्छति, तत्थ जे ते एवमाहंसु छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छति ते एव०, ता सूरिए णं उग्गमणमुहुत्तंसि य अत्थमणमुहुत्तंसि य सिग्घगती भवति तता णं छ छ जोयणसहस्साइं एगमेगेणं मुहुत्तेणं गच्छति, मज्झिमं तावक्खेत्तं समासादेमाणे २ सूरिए मज्झिमगती भवति तता णं पंच २ जोयणसहस्साइं एगमेगेणं मुहुत्तेणं गच्छति, मज्झिमं तावक्खेत्तं संपत्ते सूरिए मंदगती भवति तता णं चत्तारि जोयणसहस्साइं एगमेगेणं मुहुत्तेणं गच्छति, तत्थ को हेउत्ति वदेज्जा ?, ता अयणं जंबुदीवे २ जाव परिकखेवेणं, ता जया णं सूरिए सव्वब्भंतरं मंडलं उवसंकमिता चारं चरति तता णं दिवसराई तहेव, तंसि च णं दिवसंसि एक्काणउति जोयणसहस्साइं तावक्खेत्ते पं०, ता जया णं सूरिए सव्वबाहिरं मंडलं उवसंकमिता चारं चरति तता णं राइंदियं तहेव, तस्सिं च णं दिवसंसि एगट्ठिजोयणसहस्साइं तावक्खेत्ते पं०, तता

णं छवि पंचवि चत्तारिवि जोयणसहस्साइं सूरिए एगमेगेणं मुहुत्तेणं गच्छति एगे एव०, वयं पुण एवं वदामो-ता सातिरेगाइं पंच जोयणसहस्साइं सूरिए एगमेगेणं मुहुत्तेणं गच्छति, तत्थ को हेतूत्ति वदेज्जा ?, ता अयणं जंबुद्वीवे० परिकखेवेणं, ता जता णं सूरिए सव्वब्भंतरं मंडलं उवसंकमिता चारं चरति तता णं पंच २ जोयणसहस्साइं दोण्णि य एकावण्णे जोयणसए एगूणतीसं च सट्ठिभागे जोयणस्स एगमेगेणं मुहुत्तेणं गच्छति, तता णं इधगतस्स मणूसस्स सीतालीसाए जोयणसहस्सेहिं दोहि य तेवट्ठेहिं जोयणसतेहिं एक्कवीसाए य सट्ठिभागेहिं जोयणस्स सूरिए चक्खुप्फासं हव्वमागच्छति, तया णं दिवसराई तहेव, से णिक्खममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता चारं चरति, ता जया णं सूरिए अब्भितराणंतरं मंडलं उवसंकमिता चारं चरति तता णं पंच २ जोयणसहस्साइं दोण्णि य एकावण्णे जोयणसते सीतालीसं च सट्ठिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स सीतालीसाए जोयणसहस्सेहिं अउणासीते य जोयणसतेण सत्तावण्णाए य सट्ठिभागेहिं जोयणस्स सट्ठिभागं च एगट्ठिहा छेत्ता अउणावीसाए चुण्णिरयाभागेहिं सूरिए चक्खुप्फासं हव्वमागच्छति, तता णं दिवसराई तहेव, (१८-१/६१ १२-२/६२), से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिता चारं चरति, ता जया णं सूरिए अब्भितरं तच्चं मंडलं उवसंकमिता चारं चरति तता णं पंच २ जोयणसहस्साइं दोण्णि य वावण्णे जोयणसते पंच य सट्ठिभागे जोयणस्स एगमेगेणं मुहुत्तेणं गच्छति तता णं इहगतस्स मणू० सीतालीसाए जोयणसहस्सेहिं छण्णउतीए य जोयणेहिं तेत्तीसाए य सट्ठिभागेहिं जोयणस्स सट्ठिभागं च एगट्ठिहा छेत्ता दोहिं चुण्णियाभागेहिं सूरिए चक्खुप्फासं हव्वमागच्छति, तता णं दिवसराई तहेव, एवं खलु एतेणं उवाएणं णिक्खममाणे सूरिए तताणंतराओ तदाणंतरं मंडलातो मंडलं संकममाणे २ अट्ठारस २ सट्ठिभागे जोयणस्स एगमेगे मंडले मुहुत्तगतिं अभिवुड्ढेमाणे २ चुलसीति २ सताइं जोयणाइं पुरिसच्छायं णिवुड्ढेमाणे २ सव्वबाहिरं मंडलं उवसंकमिता चारं चरति, ता जया णं सूरिए सव्वबाहिरं मंडलं उवसंकमिता चारं चरति तता णं पंच २ जोयणसहस्साइं तिन्नि य पंचुत्तरे जोयणसते पण्णरस य सट्ठिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स एक्कतीसाए जोयणसहस्सेहिं अट्ठहिं एक्कतीसेहिं जोयणसतेहिं तीसाए य सट्ठिभागेहिं जोयणस्स सूरिए चक्खुप्फासं हव्वमागच्छति तता णं उत्तमकट्ठपत्ता उक्कोसिया अट्ठारसमुहुत्ता राई भवइ जहण्णए दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिता चारं चरति, ता जता णं सूरिए बाहिराणंतरं मंडलं उवसंकमिता चारं चरति तता णं पंच २ जोयणसहस्साइं तिण्णि य चउरूत्तरे जोयणसते सत्तावण्णं च सट्ठिभाए जोयणस्स एगमेगेणं मुहुत्तेणं गच्छति, तता णं इधगतस्स मणूसस्स एक्कतीसाए जोयणसहस्सेहिं नवहि य सोलेहिं जोयणसएहिं एगूणचालीसाए य सट्ठिभागेहिं जोयणस्स सट्ठिभागं च एगट्ठिहा छेत्ता सट्ठीए चुण्णियाभागेहिं सूरिए चक्खुप्फासं हव्वमागच्छति, तता णं राइंदियं तहेव, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरति, ता जया णं सूरिए बाहिरं तच्चं मंडलं उवसंकमिता चारं चरति तता णं पंच पंच जोयणसहस्साइं तिन्नि य चउरूत्तरे जोयणसते ऊतालीसं च सट्ठिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स एगाधिगेहिं वत्तीसाए जोयणसहस्सेहिं एकूणवण्णाए य सट्ठिभागेहिं जोयणस्स सट्ठिभागं च एगट्ठिहा छेत्ता तेवीसाए चुण्णियाभागेहिं सूरिए चक्खुप्फासं हव्वमागच्छति, राइंदियं तहेव, एवं खलु एतेणुवाएणं पविसमाणे सूरिए तताणंतरातो तताणंतरं मंडलातो मंडलं संकममाणे २ अट्ठारस २ सट्ठिभागे जोयणस्स एगमेगे मंडले मुहुत्तगतिं णिवुड्ढेमाणे २ सातिरेगाइं पंचासीति २ जोयणाइं पुरिसच्छायं अभिवुड्ढेमाणे २ सव्वब्भंतरं मंडलं उवसंकमिता चारं चरति, ता जता णं सूरिए सव्वब्भंतरं मंडलं उवसंकमिता चारं चरति तता णं पञ्च २ जोयणसहस्साइं दोण्णि य एकावण्णे जोयणसए अगुणतीसं च सट्ठिभागे जोयणस्स एगमेगेणं मुहुत्तेणं गच्छति, तता णं इहगतस्स मणूसस्स सीतालीसाए जोयणसहस्सेहिं तेवट्ठेहिं जोयणसतेहिं य एक्कवीसाए य सट्ठिभागेहिं जोयणस्स सूरिए चक्खुप्फासं हव्वमागच्छति, तता णं उत्तमकट्ठपत्ते उक्कोसए अट्ठारसमुहुत्ते दिवसे भवति जहण्णिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स

संवच्छरस्स पज्जवसाणे ☆☆☆ ॥२३॥ २-३ बितियं पाहुंड ॥ ☆☆☆ ता केवतियं खेत्तं चंदिमसूरिया ओभासंति उज्जोवेन्ति तवेन्ति पगासंति आहि० ?, तत्थ खलु इमाओ बारस पडिवत्तीओ पं०, तत्थेगे एवमा०-ता एगं दीवं एगं समुहं चंदिमसूरिया ओभासेन्ति०, एगे पुण एव०-ता तिणि दीवे तिणि समुहे चंदिमसूरिया ओभासंति० एगे एव०, एगे पुण०-ता अब्बचउत्थे (प्र आहुट्टे दीवसमुहे चंदिमसूरिया ओभासंति० एगे एव०, एगे पुण०-ता सत्त दीवे सत्त समुहे चंदिमसूरिया ओभासंति० एगे एव०, एगे पुण०-ता दस दीवे दस समुहे चंदिमसूरिया ओभासंति० एगे एव०, एगे पुण०-ता बारस दीवे बारस समुहे चंदिमसूरिया ओभासंति० एगे०, एगे पुण० बायालीसं दीवे बायालीसं समुहे चंदिमसूरिया ओभासंति० एगे०, एगे पुण०-बावत्तरि दीवे बावत्तरि समुहे चंदिमसूरिया ओभासंति० एगे०, एगे पुण०-ता बायालीसं दीवसत्तं बायालं समुहसत्तं चंदिमसूरिया ओभासंति० एगे०, एगे पुण०-ता बावत्तरि दीवसत्तं बावत्तरि समुहसत्तं चंदिमसूरिया ओभासंति० एगे०, एगे पुण०-ता बायालीसं दीवसहस्सं बायालं समुहसहस्सं चंदिमसूरिया ओभासंति० एगे०, एगे पुण०-ता बावत्तरं दीवसहस्सं बावत्तरं समुहसहस्सं चंदिमसूरिया ओभासंति० एगे०, वयं पुण एवं वदामो-अयणं जंबुद्दीवे जाव परिकखेवेणं पं०, से णं एगाए जगतीए सव्वतो समंता संपरिक्खित्ते, सा णं जगती अट्ठ जोयणाइं उड्डं उच्चत्तेणं एवं जहा जंबुद्दीवपन्नत्तीए जाव एवामेव सपुव्वावरेणं जंबुद्दीवे चोदस सलिलासयसहस्सा छप्पन्नं च सलिलासहस्सा भवन्तीतिमक्खाता, जंबुद्दीवे णं दीवे पंचचक्रभागसंठिते आहिताति वदेज्जा, ता कहं ते जंबुद्दीवे० पंचचक्रभागसंठिते आहि० ?, ता जता णं एते सूरिया सव्वभंतंरं मंडलं उवसंकमिन्ता चारं चरन्ति तदा णं जंबुद्दीवस्स० तिणि पंचचक्रभागे ओभासंति तं०-एगेवि एगं दिवड्डं पंचचक्रभागं ओभासेति एगेवि एगं दिवड्डं पंचचक्रभागं ओभासेति तता णं उत्तमकट्टपत्ते उक्को० अट्टारसमुहुत्ते दिवसे भवति जहणिया दुवालसमुहुत्ता राई भवइ, ता जता णं एते दुवे सूरिया सव्वबाहिरं मंडलं उवसंकमिन्ता चारं चरन्ति तदा णं जंबुद्दीवस्स दोणि चक्रभागे ओभासंति, ता एगेवि एगं पंचच- (२०५) क्कवालभागं ओभासति एगेवि एगं पंचचक्रवालभागं ओभासइ, तता णं उत्तमकट्टपत्ता उक्को० अट्टारसमुहुत्ता राई भवइ जहणए दुवालसमुहुत्ते दिवसे भवति ☆☆☆ ॥२४॥ ततियं पाहुंड ३॥ ☆☆☆ ता कहं ते सेआते संठिई आहि० ?, तत्थ खलु इमा दुविहा संठिती पं० तं०-चंदिमसूरियसंठिती य तावक्खेत्तसंठिती य, ता कहं ते चंदिमसूरियसंठिती आहि० ?, तत्थ खलु इमातो सोलस पडिवत्तीओ पं०, तत्थेगे एव०-ता समचउरंससंठिता चंदिमसूरियसंठिती एगे एव०, एगे पुण०-ता विसमचउरंससंठिता चंदिमसूरियसंठिती पं०, एवं एणं अभिलावेणं समचउक्कोणसंठिता विसमचउक्कोणसंठिया समचक्कवालसंठिता विसमचक्कवालसंठिता चक्कब्बचक्कवालसंठिता पं० एगे एव०, एगे पुण०-ता छत्तागारसंठिता चंदिमसूरियसंठिता पं० गेहसंठिता गेहावणसंठिता पासादसंठिता गोपुरसंठिया पेच्छाघरसंठिता वलभीसंठिता हम्मियतलसंठिता वालगपोतियासंठिता चंदिमसूरियसंठिती पं०. तत्थ जे ते एवमा०- ता समचउरंससंठिता चंदिमसूरियसंठिती पं० एतेणं एणं णेतव्वं णो चेव णं इतरेहिं, ता कहं ते तावक्खेत्तसंठिती आहि० ?, तत्थ खलु इमाओ सोलस पडिवत्तीओ पं०, तत्थ णं एगे एव०-ता गेहसंठिता तावक्खेत्तसंठिती पं०, एवं जाव वालगपोतियासंठिता तावक्खेत्तसंठिती०, एगे एव०-ता जस्संठिते जंबुद्दीवे तस्संठिता तावक्खेत्तसं० पं०, एगे पुण०-ता जस्संठिते भारहे वासे तस्सं०, एवं उज्जाणसंठिया निज्जाणसंठिता एगतो णिसधसंठिता दुहतो णिसहसंठिता सेयणगसंठिता एगे एव०, एगे पुण०-ता सेयणगपट्टसंठिता तावक्खेत्त० एगे एव०, वयं पुण एवं वदामो-ता उब्धीमुहकलंबुआपुप्फसंठिता तावक्खेत्तसंठिती पं० अंतो संकुडा वाहिं वित्थडा अंतो वट्टा बाहिं पिधुला अंतो अंकमुहसंठिता बाहिं सत्थिमुहुसंठिता अउभतो पासेणं तीसे दुवे वाहाओ अवट्ठिताओ भवन्ति पणतालीसं २ जोयणसहस्साइं आयामेणं, दुवे य णं तीसे बाहाओ अणवट्ठिताओ भवन्ति, तं०-सव्वभंतंरिया चेव बाहा सव्वबाहिरिया चेव बाहा, तत्थ को हेतूत्ति वदेज्जा ?. ता अयणं जंबुद्दीवे जाव परिकखेवेणं, ता जया णं सूरिए सव्वभंतंरं मंडलं उवसंकमिन्ता चारं चरन्ति तता णं उब्धीमुहकलंबुआपुप्फसंठिता तावक्खेत्तसंठिती आहि० अंतो संकुडा जाव बाहिरिया चेव बाहा, तीसे णं सव्वभंतंरिया बाहा मंदरपव्वयंतेणं णव जोयणसहस्साइं चत्तारि य छलसीते जोयणसते

णव य दसभागे जोयणस्स परिकखेवेणं आहि०, ता से णं परिकखेवविसेसे कतो आहि० ?, ता जे णं मंदरस्स पव्वयस्स परिकखेवे तं परिकखेवं तिहिं गुणित्ता दसहिं छित्ता दसहिं भागे हीरमाणे एस णं परिकखेवविसेसे आहि०, तीसे णं सव्वबाहिरिया बाहा लवणसमुद्धंतेणं चउणउतिं जोयणसहस्साइं अट्ट य अट्टसट्ठे जोयणसते चत्तारि य दसभागे जोयणस्स परिकखेवेणं आहिता०, ता से णं परिकखेवविसेसे कतो आहिता० ?, ता जे णं जंबुदीवस्स परिकखेवे तं परिकखेवं तिहिं गुणित्ता दसहिं छेत्ता दसहिं भागे हीरमाणे एस णं परिकखेवविसेसे आहि०, ता से णं तावक्खेत्ते केवतियं आयामेणं आहि० ?, ता अट्टत्तरिं जोयणसहस्साइं तिणिण य तेत्तीसे जोयणसते जोयणतिभागे य आयामेणं आहि०, तया णं किंसंठिया अंधगारसंठिई आहि० ?, उद्धीमुंहकलंबुआपुप्फसंठिता तहेव जाव बाहिरिया चेव बाहा, तीसे णं सव्वभंतरिया बाहा मंदरपव्वतंतेणं छज्जोयणसहस्साइं तिणिण य चउवीसे जोयणसते छच्च दसभागे जोयणस्स परिकखेवेणं आहि०, ता से णं परिकखेवविसेसे कतो आहि० ?, ता जे णं मंदरस्स पव्वयस्स परिकखेवे तं परिकखेवं दोहिं गुणेत्ता सेसं तहेव, तीसे णं सव्वबाहिरिया बाहा लवणसमुद्धंतेणं तेवट्ठि जोयणसहस्साइं दोणिण य पणयाले जोयणसते छच्च दसभागे जोयणस्स परिकखेवेणं आहि०, ता से णं परिकखेवविसेसे कतो आहि० ?, ता जे णं जंबुदीवस्स परिकखेवे तं परिकखेवं दोहिं गुणित्ता दसहिं छेत्ता दसहिं भागे हीरमाणे एस णं परिकखेवविसेसे आहि०, ता से णं अंधकारे केवतियं आयामेणं आहि० ?, ता अट्टत्तरिं जोयणसहस्साइं तिणिण य तेत्तीसे जोयणसते जोयणतिभागं च आयामेणं आहि०, तता णं उत्तमकट्ठपत्ते अट्टारसमुहुत्ते दिवसे भवइ जहणिया दुवालसमुहुत्ता राई भवइ, ता जया णं सूरिए सव्वबाहिरं मंडलं उवसंकमित्ता चारं चरति तता णं किंसंठिता तावक्खेत्तसंठिती आहि० ?, ता उद्धीमुहकलंबुआपुप्फसंठिता तावक्खेत्तसंठिती आहि०, एवं जं अब्भित्तरमंडले अंधकारसंठितीए पमाणं तं बाहिरमंडले तावक्खेत्तसंठितीए जं तहिं तावक्खेत्तसंठितीए तं बाहिरमंडले अंधकारसंठितीए भाणियव्वं, जाव तता णं उत्तमकट्ठपत्ता उक्कोसिया अट्टारसमुहुत्ता राई भवति जहणए दुवालसमुहुत्ते दिवसे भवति, ता जंबुदीवे० सूरिया केवतियं खेत्तं उड्ढं तवंति केवतियं खेत्तं अहे तवंति केवतियं खेत्तं तिरियं तवंति ?, ता जंबुदीवे णं दीवे सूरिया एगं जोयणसतं उड्ढं तवंति अट्टारस जोयणसताइं अथे तवंति सीतालीसं जोयणसहस्साइं दुन्नि य तेवट्ठे जोयणसते एक्कवीसं च सट्ठिभागे जोयणस्स तिरियं तवंति ★★ ★ ।२५॥ चउत्थं पाहुडं ४॥ ★★ ★ ता कंसि णं सूरियस्स लेस्सा पडिहताति वदेज्जा ?, तत्थ खलु इमाओ वीसं पडिवत्तीओ पं०, तत्थेगे एव०-ता मंदरंसि णं पव्वतंसि सूरियस्स लेस्सा पडिहता आहि० एगे एव०, एगे पुण०-ता मेरुंसि णं पव्वतंसि सूरियस्स लेस्सा पडिहता आहि० एगे एव०, एवं एतेणं अभिलावेणं भाणियव्वं, ता मणोरमंसि णं पव्वयंसि ता सुदंसणंसि णं पव्वयंसि ता सयंपभंसि णं पव्वतंसि ता गिरिरायंसि णं पव्वतंसि ता रतणुच्चयंसि णं पव्वतंसि ता सिलुच्चयंसि णं पव्वयंसि ता लोअमज्झंसि णं पव्वतंसि ता लोयणाभिंसि णं पव्वतंसि ता अच्छंसि णं पव्वतंसि ता सूरियावत्तंसि णं पव्वतंसि ता सूरियावरणंसि णं पव्वतंसि ता उत्तमंसि णं पव्वयंसि ता दिसादिम्मि णं पव्वतंसि ता अवतंसंसि णं पव्वतंसि ता धरणिखीलंसि णं पव्वयंसि ता धरणीसिंगंसि णं पव्वयंसि ता पव्वतिंदंसिणं पव्वतंसि ता पव्वयरायंसि णं पव्वयंसि सूरियस्स लेसा पडिहता आहि० एगे एव० वयं पुण एवं वदामो-जंसि णं पव्वयंसि सूरियस्स लेसा पडिहता से मंदरेवि पवुच्चति मेरुवि पवुच्चइ जाव पव्वयरायावि पवुच्चति, ता जे णं पुग्गला सूरियस्स लेसं फुसंति ते णं पुग्गला सूरियस्स लेसं पडिहणंति, अदिट्ठावि णं पोग्गला सूरियस्स लेस्सं पडिहणंति, चरिमलेसंतरगतावि णं पोग्गला सूरियस्स लेस्सं पडिहणंति

★★ ★ ।२६॥ पंचमं पाहुडं ५॥ ★★ ★ ता कहं ते ओयसंठिती आहि० ?, तत्थ खलु इमाओ पणवीसं पडिवत्तीओ पं०, तत्थेगे एव० ता अणुसमयमेव सूरियस्स ओया अण्णा उप्पज्जति अण्णा अवेति एगे एव०, एगे पुण०-ता अणुमुहुत्तमेव सूरियस्स ओया अण्णा उप्पज्जति अण्णा अवेति, एतेणं अभिलावेणं णेतव्वा, ता अणुराइंदियमेव ता अणुपक्खमेव ता अणुमासमेव ता अणुउडुमेव ता अणुअयणमेव ता अणुसंवच्छरमेव ता अणुजुगमेव ता अणुवाससयमेव ता अणुवाससहस्समेव ता अणुवाससयसहस्समेव ता अणुपुव्वमेव ता अणुपुव्वसयमेव ता अणुपुव्वसहस्समेव ता अणुपुव्वसतसहस्समेव ता अणुपलितोवममेव ता

अणुपलितोवमसतमेव ता अणुपलितोवमसहस्समेव ता अणुपलितोवमसयसहस्समेव ता अणुसागरोवममेव ता अणुसागरोवमसतमेव ता अणुसागरोवमसहस्समेव ता अणुसागरोवमसयसहस्समेव एगे एव०, ता अणुउस्सप्पिणीओसप्पिणिमेव सूरियस्स ओया अण्णा उप्पज्जति अण्णा अवेति एगे एव०, वयं पुण एवं वदामो- ता तीसं २ मुहुत्ते सूरियस्स ओया अवट्ठिता भवति, तेण परं सूरियस्स ओया अणवट्ठिता भवति, छम्मासे सूरिए ओयं णिवुड्ढेति छम्मासे सूरिए ओयं अभिवड्ढेति, णिक्खममाणे सूरिए देसं णिवुड्ढेति पविसमाणे सूरिए देसं अभिवुड्ढेड, तत्थ को हेतू आहि० ?, ता अयणं जंबुद्वीवे सव्वदीवसमुद्द जाव परिकखेवेणं, ता जया णं सूरिए सव्वब्भंतरं मंडलं उवसंकमिता चारं चरति तता णं उत्तमकट्टपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, से णिक्खममाणे सूरिए णवं संवच्छरं अयमाणे पढमंसि अहोरत्तंसि अब्भितराणंतरं मंडलं उवसंकमिता चारं चरति, ता जया णं सूरिए अब्भितराणंतरं मंडलं उवसंकमिता चारं चरति तता णं एगेणं राइंदिएणं एग भागं ओयाए दिवसखेत्तस्स णिवुड्ढिता रयणिक्खेत्तस्स अभिवड्ढिता चारं चरति मंडलं अट्टारसहिं तीसेहिं सतेहिं छित्ता, तता णं अट्टारसमुहुत्ते दिवसे भवति दोहिं एगट्ठिभागमुहुत्तेहिं ऊणे दुवालसमुहुत्ता राई भवति दोहिं एगट्ठिभागमुहुत्तेहिं अहिया, से णिक्खममाणे सूरिए दोच्चंसि अहोरत्तंसि अब्भितरं तच्चं मंडलं उवसंकमिता चारं चरति, ता जया णं सूरिए अब्भितरं तच्चं मंडलं उवसंकमिता चारं चरति तता णं दोहिं राइंदिएहिं दो भागे ओयाए दिवसखेत्तस्स णिवुड्ढिता रयणिक्खेत्तस्स अभिवड्ढेत्ता चारं चरति मंडलं अट्टारसतीसेहिं सएहिं छेत्ता, तता णं अट्टारसमुहुत्ते दिवसे भवति चउहिं एगट्ठिभागमुहुत्तेहिं ऊणे दुवालसमुहुत्ता राई भवति चउहिं एगट्ठिभागमुहुत्तेहिं अहिया, एवं खलु एतेणुवाएणं निक्खममाणे सूरिए तयाणंतराओ तदाणंतरं मंडलातो मंडलं संकममाणे २ एगमेगे मंडले एगमेगेणं राइंदिएणं एगमेगं भागं ओयाए दिवसखेत्तस्स णिवुड्ढेमाणे २ रयणिक्खेत्तस्स अभिवड्ढेमाणे २ सव्वबाहिरं मंडलं उवसंकमिता चारं चरति, ता जया णं सूरिए सव्वब्भंतरातो मंडलातो सव्वबाहिरं मंडलं उवसंकमिता चारं चरति तता णं सव्वब्भंतरं मंडलं पणिधाय एगेणं तेसीतेणं राइंदियसतेणं एगं तेसीतं भागसतं ओयाए दिवसखेत्तस्स णिवुड्ढेत्ता रयणिक्खेत्तस्स अभिवड्ढेत्ता चारं चरति मंडलं अट्टारसहिं तीसेहिं सएहिं छेत्ता, तता णं उत्तमकट्टपत्ता उक्को० अट्टारसमुहुत्ता राई भवति जहणए दुवालसमुहुत्ते दिवसे भवति, एस णं पढमे छम्मासे एस णं पढमस्स छम्मासस्स पज्जवसाणे, से पविसमाणे सूरिए दोच्चं छम्मासं अयमाणे पढमंसि अहोरत्तंसि बाहिराणंतरं मंडलं उवसंकमिता चारं चरति, ता जया णं सूरिए बाहिराणंतरं मंडलं उवसंकमिता चारं चरति तता णं एगेणं राइंदिएणं एगं भागं ओयाए रतणिक्खेत्तस्स णिवुड्ढेत्ता दिवसखेत्तस्स अभिवड्ढेत्ता चारं चरति मंडलं अट्टारसहिं तीसेहिं सएहिं छेत्ता, तता णं अट्टारसमुहुत्ता राई भवति दोहिं एगट्ठिभागमुहुत्तेहिं ऊणा दुवालसमुहुत्ते दिवसे भवति दोहिं एगट्ठिभागमुहुत्तेहिं अधिए, से पविसमाणे सूरिए दोच्चंसि अहोरत्तंसि बाहिरं तच्चं मंडलं उवसंकमिता चारं चरति, ता जया णं सूरिए बाहिरं तच्चं मंडलं उवसंकमिता चारं चरति तता णं दोहिं राइंदिएहिं दो भाग ओयाए रयणिक्खेत्तस्स णिवुड्ढेत्ता दिवसखेत्तस्स अभिवड्ढेत्ता चारं चरति मंडलं अट्टारसहिं तीसेहिं सएहिं छेत्ता, तया णं अट्टारसमुहुत्ता राई भवति चउहिं एगट्ठिभागमुहुत्तेहिं ऊणा दुवालसमुहुत्ते दिवसे भवति चउहिं एगट्ठिभागमुहुत्तेहिं अधिए, एवं खलु एतेणुवाएणं पविसमाणे सूरिए तयाणंतरातो तदाणंतरं मंडलातो मंडलं संकममाणे २ एगमेगे मंडले एगमेगेणं राइंदिएणं एगमेगं भागं ओयाए रयणिक्खेत्तस्स णिवुड्ढेमाणे २ दिवसखेत्तस्स अभिवड्ढेमाणे २ सव्वब्भंतरं मंडलं उवसंकमिता चारं चरति, ता जया णं सूरिए सव्वबाहिरातो मंडलातो सव्वब्भंतरं मंडलं उवसंकमिता चारं चरति तता णं सव्वबाहिरं मंडलं पणिधाय एगेणं तेसीतेणं राइंदियसएणं एगं तेसीतं भागसतं ओयाए रयणिक्खेत्तस्स णिवुड्ढेत्ता दिवसखेत्तस्स अभिवड्ढेत्ता चारं चरति मंडलं अट्टारसतीसेहिं सएहिं छेत्ता, तता णं उत्तमकट्टपत्ते उक्को० अट्टारसमुहुत्ते दिवसे भवति जहणिया दुवालसमुहुत्ता राई भवति, एस णं दोच्चे छम्मासे एस णं दोच्चस्स छम्मासस्स पज्जवसाणे एस णं आदिच्चे संवच्छरे एस णं आदिच्चस्स संवच्छरस्स पज्जवसाणे

☆☆☆ ॥२७॥ छट्ठं पाहुडं ६॥ ☆☆☆ ता के ते सूरियं वरंति आहि० ?, तत्थ खलु इमाओ वीसं पडिवत्तीओ पं०, तत्थेगे एव०-ता मंदरे णं पव्वते सूरियं वरयति आहि०, एगे पुण०-ता मेरू णं पव्वते सूरियं वरति आहि०, एवं एएणं अभिलावेणं णेतव्वं जाव पव्वतराये णं पव्वते सूरियं वरयति आहि० एगे एव०, वयं

पुण एवं वदामो-ता मंदरेवि पवुच्चति तहेव जाव पव्वतराएवि पवुच्चति, ता जे णं पोग्गला सूरियस्स लेसं फुसंति ते पोग्गला सूरियं वरयंति, अदिट्ठावि णं पोग्गला सूरियं वरयंति, चरमलेसंतरगतावि णं पोग्गला सूरियं वरयति ★★ ★ ॥ २८ ॥ सत्तमं पाहुडं ७ ॥ ★★ ★ ता कहं ते उदयसंठिती आहिं ? , तत्थ खलु इमाओ तिणिण पडिवत्तीओ पं०, तत्थेगे एव०-ता जया णं जंबुद्दीवे दाहिणइडे अट्टारसमुहुत्ते दिवसे भवति तता णं उत्तरइडेवि अट्टारसमुहुत्ते दिवसे भवति, जया णं उत्तरइडे अट्टारसमुहुत्ते दिवसे भवति तया णं दाहिणइडेवि अट्टारसमुहुत्ते दिवसे भवति, जदा जंबुद्दीवे दाहिणइडे सत्तरसमुहुत्ते दिवसे भवति तया णं उत्तरइडे सत्तरसमुहुत्ते दिवसे भवति, जया णं उत्तरइडे सत्तरसमुहुत्ते दिवसे भवति तदा णं दाहिणइडेवि सत्तरसमुहुत्ते दिवसे भवति, एवं परिहावेतव्वं, सोलसमुहुत्ते पण्णरस० चउद० तेरस० दिवसे जाव ता जया णं जंबुद्दीवे० दाहिणइडे बारसमुहुत्ते दिवसे भवति तया णं उत्तरइडेवि बारसमुहुत्ते दिवसे भवति, जता णं उत्तरइडे बारसमुहुत्ते दिवसे भवति तता णं दाहिणइडेवि बारसमुहुत्ते दिवसे भवति, जता णं दाहिणइडे बारसमुहुत्ते दिवसे भवति तता णं जंबुद्दीवे मंदरस्स पव्वयस्स पुरच्छिमपच्चत्थिमेणं सता पण्णरसमुहुत्ते दिवसे भवति सदा पण्णरसमुहुत्ता राई भवति, अवट्ठित्ता णं तत्थ राइंदिया समणाउसो ! पं० एगे एव०, एगे पुण०-जता णं जंबुद्दीवे दाहिणइडे अट्टारसमुहुत्ताणंतरे दिवसे भवति तया णं उत्तरइडेवि अट्टारसमुहुत्ताणंतरे दिवसे भवइ, जया णं उत्तरइडे अट्टारसमुहुत्ताणंतरे दिवसे भवइ तता णं दाहिणइडेवि अट्टारसमुहुत्ताणंतरे दिवसे भवइ, एवं परिहावेतव्वं, सत्तरसमुहुत्ताणंतरे दिवसे भवति, सोलसमुहुत्ताणंतरे० पण्णरसमुहुत्ताणंतरे चोदसमुहुत्ताणंतरे० तेरसमुहुत्ताणंतरे०, जया णं जंबुद्दीवे दाहिणइडे बारसमुहुत्ताणंतरे दिवसे भवति तदा णं उत्तरइडेवि बारसमुहुत्ताणंतरे दिवसे भवति, जता णं उत्तरइडे बारसमुहुत्ताणंतरे दिवसे भवइ तया णं दाहिणइडेवि बारसमुहुत्ताणंतरे दिवसे भवति तदा णं जंबुद्दीवे मंदरस्स पव्वयस्स पुरच्छिमपच्चत्थिमेणं णो सदा पण्णरसमुहुत्ते दिवसे भवति णो सदा पण्णरसमुहुत्ता राई भवति, अणवट्ठित्ता णं तत्थ राइंदिया समणाउसो ! एगे एव०, एगे पुण०-ता जया णं जंबुद्दीवे दाहिणइडे अट्टारसमुहुत्ते दिवसे भवति तदा णं उत्तरइडे दुवालसमुहुत्ता राई भवति जया णं उत्तरइडे अट्टारसमुहुत्ते दिवसे भवति तदा णं दाहिणइडे बारसमुहुत्ता राई भवइ, जया णं दाहिणइडे अट्टारसमुहुत्ताणंतरे दिवसे भवति तदा णं उत्तरइडे बारसमुहुत्ता राई भवइ, जता णं उत्तरइडे अट्टारसमुहुत्ताणंतरे दिवसे भवति तदा णं दाहिणइडे बारसमुहुत्ता राई भवति, एवं सत्तरसमुहुत्ते दिवसे सत्तरसमुहुत्ताणंतरे० सोलसमुहुत्ते सोलसमुहुत्ताणंतरे पण्णरसमुहुत्ते पन्नरसमुहुत्ताणंतरे चोदसमुहुत्ते चोदसमुहुत्ताणंतरे तेरसमुहुत्ते तेरसमुहुत्ताणंतरे बारसमुहुत्ते, ता जता णं जंबुद्दीवे दाहिणइडे बारसमुहुत्ताणंतरे दिवसे भवति तदा णं उत्तरइडे दुवालसमुहुत्ता राई भवति, जया णं उत्तरइडे दुवालसमुहुत्ताणंतरे दिवसे भवति तदा णं दाहिणइडे दुवालसमुहुत्ता राई भवति, तता णं जंबुद्दीवे मंदरस्स पव्वयस्स पुरच्छिमपच्चत्थिमेणं णेवत्थि पण्णरसमुहुत्ते दिवसे भवति णेवत्थि पण्णरसमुहुत्ता राई भवति, वोच्छिण्णा णं तत्थ राइंदिया पं० समणाउसो ! एगे एव०, वयं पुण वदामो-ता जंबुद्दीवे सूरिया उदीणपाईणमुग्गच्छ पाईणदाहिणमागच्छंति पाईणदाहिणमुग्गच्छ दाहिणपडीणमागच्छंति दाहिणपडिणमुग्गच्छ पडीणउदीणमागच्छन्ति पडीणउदीणमुग्गच्छ उदीणपाईणमागच्छन्ति, ता जता णं जंबुद्दीवे दाहिणइडे दिवसे भवति तदा णं उत्तरइडे दिवसे भवति, जदा णं उत्तरइडे दिवसे भवति तदा णं जंबुद्दीवे मंदरस्स पव्वयस्स पुरच्छिमपच्चत्थिमेणं राई भवति, ता जया णं जंबुद्दीवे मंदरस्स पव्वयस्स पुरत्थिमेणं दिवसे भवति तदा णं पच्चत्थिमेणवि दिवसे भवति, जया णं पच्चत्थिमेणं दिवसे भवति तदा णं जंबुद्दीवे मंदरस्स पव्वयस्स उत्तरदाहिणेणं राई भवति, ता जया णं दाहिणइडेवि उक्कोसए अट्टारसमुहुत्ते दिवसे भवति तया णं उत्तरइडे उक्कोसए अट्टारसमुहुत्ते दिवसे भवति, जदा उत्तरइडे० तदा णं जंबुद्दीवे मंदरस्स पव्वयस्स पुरत्थिमेणं जहणिया दुवालसमुहुत्ता राई भवति, ता जया णं जंबुद्दीवे मंदरस्स पव्वतस्स पुरच्छिमेणं उक्कोसए अट्टारसमुहुत्ते दिवसे भवति तता णं पच्चत्थिमेणवि उक्कोसए अट्टारसमुहुत्ते दिवसे भवति, जता णं पच्चत्थिमेणं उक्कोसए अट्टारसमुहुत्ते दिवसे भवति तता णं जंबुद्दीवे मंदरस्स पव्वयस्स उत्तरदाहिणेणं जहणिया दुवालसमुहुत्ता राई भवति, एवं एणं गमेणं णेतव्वं, अट्टारसमुहुत्ताणंतरे दिवसे सातिरेगदुवालसमुहुत्ता राई भवति, सत्तरसमुहुत्ते दिवसे तेरसमुहुत्ता

राई, सत्तरसमुहुत्ताणंतरे दिवसे भवति सातिरेगतेरसमुहुत्ता राई भवति सोलसमुहुत्ते दिवसे चोदसमुहुत्ता राई भवति सोलसमुहुत्ताणंतरे दिवसे सातिरेगचोदसमुहुत्ता राई भवति, पण्णरसमुहुत्ते दिवसे पण्णरसमुहुत्ता राई पण्णरसमुहुत्ताणंतरे दिवसे सातिरेगपण्णरसमुहुत्ता राई भवइ चउदसमुहुत्ते दिवसे सोलसमुहुत्ता राई चोदसमुहुत्ताणंतरे दिवसे सातिरेगसोलसमुहुत्ता राई तेरसमुहुत्ते दिवसे सत्तरसमुहुत्ता राई तेरसमुहुत्ताणंतरे दिवसे सातिरेगसत्तरसमुहुत्ता राई जहण्णए दुवालसमुहुत्ते दिवसे भवति उक्कोसिया अट्टारसमुहुत्ता राई, तता णं उत्तरद्धे जहन्नए दुवालसमुहुत्ते दिवसे भवति, जता णं उत्तरड्ढे जह० दुवालस० दिवसे तता णं जंबुदीवे मंदरस्स पुरच्छिमपच्चच्छिमेणं उक्कोसिया अट्टारस० राती भवति, ता जया णं जंबुदीवे मंदरस्स पुरच्छिमेणं जह० दुवालस० दिवसे भवति तता णं पच्चच्छिमेणं जह० दुवालस० दिवसे भवति, जता णं पच्चच्छिमेणं जह० दुवालस० दिवसे तता णं जंबुदीवे दीवे मंदरस्स उत्तरदाहिणेणं उक्कोसिया अट्टारस० राती भवति, ता जया णं जंबुदीवे दाहिणद्धे वासाणं पढमे समए पडिवज्जति तता णं उत्तरद्धेवि वासाणं पढमे समए पडिवज्जति, जता णं उत्तरद्धे वासाणं पढमे समए पडिवज्जति तता णं जंबुदीवे मंदरस्स पव्वयस्स पुरच्छिमपच्चत्थिमेणं अणंतरपुरक्खडकालसमयंसि वासाणं पढमे समए पडिवज्जइ, ता जया णं जंबुदीवे मंदरस्स पव्वयस्स पुरच्छिमेणं वासाणं पढमे समए पडिवज्जइ तता णं पच्चत्थिमेणवि वासाणं पढमे समए पडिवज्जइ, जया णं पच्चत्थिमेणं वासाणं पढमे समए पडिवज्जइ तता णं जंबुदीवे मंदरस्स उत्तरदाहिणेणं अणंतरपच्छाकयकालसमयंसि वासाणं पढमे समए पडिवण्णे भवति, जहा समओ एवं आवलिया आणापाणू थोवे लवे मुहुत्ते अहोरत्ते पक्खे मासे उऊ, एवं दस आलावगा वासाणं भाणियव्वा, ता जया णं जंबुदीवे० दाहिणड्ढे हेमंताणं पढमे समए पडिवज्जति तता णं उत्तरड्ढेवि हेमंताणं पढमे समए पडिवज्जति, एतस्सवि वासस्स आलावगा जाव उऊओ, ता जया णं जंबुदीवे दाहिणद्धे गिम्हाणं पढमे समए पडिवज्जति तता णं उत्तरड्ढे एतस्सवि वासागमो भाणियव्वो जाव उऊओ, ता जता णं जंबुदीवे दाहिणद्धे पढमे अयणे पडिवज्जति तदा णं उत्तरद्धेवि पढमे अयणे पडिवज्जइ, जता णं उत्तरद्धे पढमे अयणे पडिवज्जति तदा णं दाहिणद्धेवि पढमे अयणे पडिवज्जइ, जता णं उत्तरद्धे पढमे अयणे पडिवज्जति तता णं जंबुदीवे मंदरस्स पव्वयस्स पुरत्थिमपच्चत्थिमेणं अणंतरपुरक्खडकालसमयंसि पढमे अयणे पडिवज्जति, ता जया णं जंबुदीवे मंदरस्स पव्वयस्स पुरत्थिमेणं पढमे अयणे पडिवज्जति तता णं पच्चत्थिमेणवि पढमे अयणे पडिवज्जइ, जया णं पच्चत्थिमेणं पढमे अयणे पडिवज्जइ तदा णं जंबुदीवे मंदरस्स पव्वयस्स उत्तरदाहिणेणं अणंतरपच्छाकडकालसमयंसि पढमे अयणे पडिवण्णे भवति, एवं संवच्छरे जुगे वाससते, एवं वाससहस्से वाससयसहस्से पुव्वंगे पुव्वे एवं जाव सीसपहेलिया पलितोवमे सागरोवमे, ता जया णं जंबुदीवे दाहिणड्ढे ओसप्पिणी तता णं उत्तरद्धेवि ओसप्पिणी पडिवज्जति पडिवज्जति, जता णं उत्तरद्धे ओसप्पिणी पडिवज्जति तता णं जंबुदीवे मंदरस्स पव्वयस्स पुरत्थिमपच्चत्थिमेणं णेवत्थि ओसप्पिणी णेव अत्थि उस्सप्पिणी, अवट्ठिते णं तत्थ काले पं० समणाउसो !, एवं उस्सप्पिणीवि, ता जया णं लवणे समुद्दे दाहिणद्धे दिवसे भवति तता णं लवणसमुद्दे उत्तरद्धे दिवसे भवति, जता णं उत्तरद्धे दिवसे भवति तता णं लवणसमुद्दे पुरच्छिमपच्चत्थिमेणं राई भवति, जहा जंबुदीवे तहेव जाव उस्सप्पिणी, तहा धायइसंडे णं दीवे सूरिया उदीण० तहेव, ता जता णं धायइसंडे दीवे दाहिणद्धे दिवसे भवति तता णं उत्तरद्धेवि दिवसे भवति, जता णं उत्तरद्धे दिवसे भवति तता णं धायइसंडे दीवे मंदराणं पव्वताणं पुरत्थिमपच्चत्थिमेणं राई भवति, एवं जंबुदीवे जहा तहेव जाव उस्सप्पिणी, कालोए णं जहा लवणे समुद्दे तहेव, ता अब्भंतरपुक्खरद्धे णं सूरिया उदीणपाईणमुग्गच्छ तहेव ता जया णं अब्भंतरपुक्खरद्धे णं दाहिणद्धे दिवसे भवति तदा णं उत्तरद्धेवि दिवसे भवति, जता णं उत्तरद्धे दिवसे भवति तता णं अब्भंतरपुक्खरद्धे मंदराणं पव्वताणं पुरत्थिमपच्चत्थिमेणं राई भवति सेसं तहा जंबुदीवे तहेव जाव ओसप्पिणीउस्सप्पिणीओ

☆☆☆ ॥२९॥अट्टमं पाहुडं ८॥

☆☆☆ ता कतिकट्टं ते सूरिए पारिसीच्छायं णिव्वत्तेति आहि० ?, तत्थ खलु इमाओ तिण्णि पडिवत्तीओ पं०, तत्थेगे एव०-जे णं पोग्गला सूरियस्स लेसं फुसंति ते णं पोग्गला संतप्पंति, ते णं पोग्गला संतप्पमाणा तदणंतरां बाहिरां पोग्गलां संतावेतीति एस णं से समिते तावक्खेत्ते एगे एव०, एगे पुण०-ता जे णं

पोग्गला सूरियस्स लेसं फुसंति ते णं पोग्गला नो संतप्पंति, ते णं पोग्गला असंतप्पमाणा तदणंतरां बाहिरां पोग्गलां णो संतावेतीति एस णं से समिते तावक्खेत्ते एगे एव०, एगे पुण०-ता जे णं पोग्गला सूरियस्स लेसं फुसंति ते णं पोग्गला अत्थेगतिया संतप्पंति अत्थेगतिया णो संतप्पंति, तत्थ अत्थेगइआ संतप्पमाणा तदणंतरां बाहिरां पोग्गलां अत्थेगतियां संतावेति अत्थेगतियां णो संतावेति एस णं से समिते तावक्खेत्ते एगे एव०, वयं पुण एवं वदामो-ता जाओ इमाओ चंदिमसूरियाणं देवाणं विमाणेहिंतो लेसाओ बहिया उच्छूढा अभिणिसट्ठाओ पतावंति एतासि णं लेसाणं अंतरेसु अण्णतरीओ छिण्णलेसाओ संमुच्छंति, तते णं ताओ छिण्णलेस्साओ संमुच्छियाओ समाणीओ तदणंतरां बाहिरां पोग्गलां संतावेतीति एस णं से समिते तावक्खेत्ते ।३०। ता कतिकट्ठं ते सूरिए पोरिसीच्छायं णिव्वत्तेति आहि० ?, तत्थ खलु इमाओ पणवीसं पडिवत्तीओ पं०, तत्थेगे एव०-ता अणुसमयमेव सूरिए पोरिसिच्छायं णिव्वत्तेइ आहि० एगे एव०, एगे पुण०-ता अणुमुहुत्तमेव सूरिए पोरिसिच्छायं णिव्वत्तेति आहि०, एतेण अभिलावेणं णेतव्वं, ता जाओ चेव ओयसंठितीए पणवीसं पडिवत्तीओ ताओ चेव णेतव्वाओ जाव अणुउस्सप्पिणीमेव सूरिए पोरिसीए छांयं णिव्वत्तेति आहि० एगे०, वयं पुण एवं वदामो-ता सूरियस्स णं उच्चत्तं व लेसं च पडुच्च छाउदेसे उच्चत्तं च छांयं च पडुच्च लेसुदेसे लेसं च छांयं च पडुच्च उच्चत्तोदेसे, तत्थ खलु इमाओ दुवे पडिवत्तीओ पं०, तत्थेगे एवमाहंसु-ता अत्थि णं से दिवसे जंसि णं दिवसंसि सूरिए चउपोरिसीच्छायं निव्वत्तेइ, अत्थि णं से दिवसे जंसि णं दिवसंसि सूरिए दुपोरिसीच्छायं णिव्वत्तेति एगे एव०, एगे पुण०-ता अत्थि णं से दिवसे जंसि णं दिवसंसि सूरिए दुपोरिसीच्छायं णिव्वत्तेति अत्थि णं से दिवसे जंसि णं दिवसंसि सूरिए नो किंचि पोरिसिच्छायं णिव्वत्तेति, तत्थ जे ते एव० ता अत्थि णं से दिवसे जंसि णं दिवसंसि सूरिए चउपोरिसियं छांयं णिव्वत्तेति अत्थि णं से दिवसे जंसि णं दिवसंसि सूरिए दोपोरिसियं छांयं निव्वत्तेइ ते एव०-ता जता णं सूरिए सव्वब्भंतरं मंडलं उवसंकमित्ता चारं चरति तता णं उत्तमकट्ठपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति, तंसि च णं दिवसंसि सूरिए चउपोरिसीयं छांयं निव्वत्तेति, ता उग्गमणमुहुत्तंसि य अत्थमणमुहुत्तंसि य लेसं अभिवइडेमाणे नो चेव णं निव्वुइडेमाणे, ता जता णं सूरिए सव्वबाहिरं मंडलं उवसंकमित्ता चारं चरति तता णं उत्तमकट्ठपत्ता उक्कोसिया अट्टारसमुहुत्ता राई भवति जहणए दुवालसमुहुत्ते दिवसे भवति, तंसि च णं दिवसंसि सूरिए दुपोरिसियं छांयं निव्वत्तेइ, तं०-उग्गमणमुहुत्तंसि य अत्थमणमुहुत्तंसि य लेसं अभिवइडेमाणे नो चेव णं निव्वुइडेमाणे, तत्थ णं जे ते एव०-ता अत्थि णं से दिवसे जंसि णं दिवसंसि सूरिए दुपोरिसियं छांयं निव्वत्तेइ अत्थि णं से दिवसे जंसि णं दिवसंसि सूरिए णो किंचि पोरिसियं छांयं निव्वत्तेति ते एव०-ता जता णं सूरिए सव्वब्भंतरं मंडलं उवसंकमित्ता चारं चरति तता णं उत्तमकट्ठपत्ते उक्कोसए अट्टारसमुहुत्ते दिवसे भवति जहणिया दुवालसमुहुत्ता राई भवति तंसि च णं दिवसंसि सूरिए दुपोरिसियं छांयं निव्वत्तेति, तं०-उग्गमणमुहुत्तंसि य अत्थमणमुहुत्तंसि य लेसं अभिवइडेमाणे णो चेव णं निव्वुइडेमाणे, ता जया णं सूरिए सव्वबाहिरं मंडलं उवसंकमित्ता चारं चरति तता णं उत्तमकट्ठपत्ता उक्कोसिया अट्टारसमुहुत्ता राई भवति जहणए दुवालसमुहुत्ते दिवसे भवति तंसि च णं दिवसंसि सूरिए णो किंचि पोरिसीछायं निव्वत्तेति, तं०-उग्गमणमुहुत्तंसि य अत्थमणमुहुत्तंसि य, नो चेव णं लेसं अभिवइडेमाणे वा निव्वुइडेमाणे वा, ता कइकट्ठं ते सूरिए पोरिसीच्छायं निव्वत्तेइ आहि० ?, तत्थ इमाओ छण्णउई पडिवत्तीओ पं०, तत्थेगे एव०-अत्थि णं से देसे जंसि णं देसंसि सूरिए एगपोरिसीछायं निव्वत्तेइ एगे एव०, एगे पुण०-ता अत्थि णं से देसे जंसि देसंसि सूरिए दुपोरिसियं छांयं निव्वत्तेति, एवं एतेणं अभिलावेणं णेतव्वं, जाव छण्णउतिपोरिसियं छांयं निव्वत्तेति, तत्थ जे ते एव०-ता अत्थि णं से देसे जंसि णं देसंसि सूरिए एगपोरिसियं छांयं निव्वत्तेति ते एव०-ता सूरियस्स णं सव्वहेट्ठिमातो सूरप्पडिहितो बहिया अभिणिसट्ठाहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जाओ भूमिभागाओ जावतियं सूरिए उड्डंउच्चत्तेणं एवतियाए एगाए अब्बाए छायाणुमाणप्पमाणेणं उमाए तत्थ से सूरिए एगपोरिसीयं छांयं निव्वत्तेति, तत्थ जे ते एव०-ता अत्थि णं से देसे जंसि णं देसंसि सूरिए दुपोरिसिच्छायं निव्वत्तेति ते एव०-ता सूरियस्स णं सव्वहेट्ठिमातो सूरियपडिधीतो बहिया अभिणिसट्ठिताहिं लेसाहिं ताडिज्जमाणीहिं इमीसे रयणप्पभाए पुढवीए बहुसमरमणिज्जातो भूमिभागातो जावतियं सूरिए

उड्डंउच्चतेणं एवतियाहिं दोहिं अब्बाहिं दोहिं छायाणुमाणप्पमाणेहिं उमाए एत्थ णं से सूरिए दुपोरिसियं छायां णिव्वत्तेति, एवं एक्केक्काए पडिवत्तीए भाणितव्वं जाव छण्णउत्तिमा पडिवत्ती एगे०, वयं पुण एवं वदामो-सातिरेगअउणसट्ठिपोरिसीणं सूरिए पोरिसीछायं णिव्वत्तेति, अबद्धपोरिसी णं छाया दिवसस्स किं गते वा सेसे वा ?, ता तिभागे गते वा सेसे वा, पोरिसीणं छाया दिवसस्स किं गते वा सेसे वा ?, ता चउड्ढभागे गते वा सेसे वा, ता दिवद्धपोरिसीणं छाया दिवसस्स किं गते वा सेसे वा ?, ता पंचमभागे गते वा सेसे वा, एवं अबद्धपोरिसिं छोडुं पुच्छा दिवसस्स भागं छोडुं वाकरणं जाव ता अब्बअउणासट्ठिपोरिसीछाया दिवसस्स किं गते वा सेसे वा ?, ता एगूणवीससतभागे गते वा सेसे वा, ता अउणसट्ठिपोरिसीणं छाया दिवसस्स किं गते वा सेसे वा ?, वीससयभागे गते वा सेसे वा, ता सातिरेगअउणसट्ठिपोरिसीणं छाया दिवसस्स किं गते वा सेसे वा ?, णत्थि किंचि गते वा सेसे वा, तत्थ खलु इमा पणवीसनिविट्ठा छाया पं० तं०-खंभच्छाया रज्जु० पागार० पासाय० उत्तर० उच्चत्त० अणुलोम० पडिलोम० आरूभिता उवहिता समा पडिहता खीलच्छाया पक्खच्छाया पुरतोउदग्गा पिट्ठओउदग्गा पुरिमकंठभागोवगता पच्छिमकंठभाओवगता छायाणुवादिणी किट्ठाणुवादिणीछाया छायाछाया छायाविकप्पो वेहासच्छाया सगड० (कडच्छाया) गोलच्छाया, तत्थ णं गोलच्छाया अट्ठविहा पं० तं०-गोलच्छाया अवद्धगोलच्छाया गोलगोल० अवद्धगोलगोल० गोलावलि० अवड्डगोलावलि० गोपुंज० अवद्धगोलपुंज० ☆☆☆।३१। णवमं पाहुडं १॥ ☆☆☆ ता जोगेति वत्थुस्स आवलियाणिवाते आहि०, तां कहं ते जोगेति वत्थुस्स आवलियाणिवाते आहि० ?, तत्थ खलु इमाओ पंच पडिवत्तीओ पं०, तत्थेगे एव०-ता सव्वेवि णं णक्खत्ता कत्तियादिया भरणिपज्जवसाणा एगे एव० एगे पुण०-ता सव्वेवि णं णक्खत्ता महादीया अस्सेसापज्जवसाणा पं० एगे एव०, एगे पुण०-ता सव्वेवि णं णक्खत्ता धणिट्ठादीया सवणपज्जवसाणा पं० एगे एव०, एगे पुण०-ता सव्वेवि णं णक्खत्ता अस्सिणीआदीया रेवतिपज्जवसाणा पं० एगे एव०, एगे पुण०-सव्वेवि णं णक्खत्ता भरणीआदिया अस्सिणीपज्जवसाणा एगे एव०, वयं पुण एवं वदामो-सव्वेवि णं णक्खत्ता अभिइआदीया उत्तरासाढापज्जवसाणा पं० तं०-अभिई सवणो धणिट्ठा सतभिसया पुव्वभद्वता उत्तरभद्वया रेवती अस्सिणी भरणी कत्तिया रोहिणी मिगसिरं अद्वा पुणव्वसू पुरस्सो असिलेसा महा पुव्वा फग्गुणी उत्तरा फग्गुणी हत्थो चित्ता साती विसाहा अनुराहा जेट्ठा मूलो पुव्वासाढा उत्तरासाढा ।३२॥१०-१॥ (२०६) ता कहं ते मुहुत्तग्गे आहि० ?, ता एतेसिं णं अट्ठावीसाए णक्खत्ताणं अत्थि णक्खत्ते जे णं णव मुहुत्ते सत्तावीसं च सत्तट्ठिभागे मुहुत्तस्स चंदेणं सद्धिं जोयं जोएति, अत्थि णक्खत्ता जे णं पण्णरसमुहुत्ते चंदेणं सद्धिं जोयं जोएति, अत्थि णक्खत्ता जे णं तीसं०, अत्थि णक्खत्ता जे णं पणतालीसं मुहुत्ते चंदेणं सद्धिं जोयं जोएति, ता एएसिं णं अट्ठावीसाए णक्खत्ताणं कयरे णक्खत्ते जे णं नव मुहुत्ते सत्तावीसं च सत्तट्ठिभागे मुहुत्तस्स चंदेणं सद्धिं जोएन्ति ?, कयरे णक्खत्ता जे णं पण्णरसमुहुत्ते० कतरे णक्खत्ता जे णं तीसं मुहुत्ते चंदेण० कतरे णक्खत्ता जे णं पणयालीसं मुहुत्ते० ?, ता एएसिं णं अट्ठावीसाए णक्खत्ताणं तत्थ जे से णक्खत्ते जे णं णव मुहुत्ते सत्तावीसं च सत्तट्ठिभागे मुहुत्तस्स चंदेण० से णं एगे अभीयी, तत्थ जे ते णक्खत्ता जे णं पण्णरस मुहुत्ते चंदेण० ते णं छ, तं०-सतभिसया भरणी अद्वा अस्सेसा साती जेट्ठा, तत्थ जे ते णक्खत्ता जे णं तीसं मुहुत्ते चंदेण० ते पण्णरस, तं०-सवणे धणिट्ठा पुव्वा भद्वता रेवती अस्सिणी कत्तिया मग्गसिरं पुरस्सो महा पुव्वा फग्गुणी हत्थो चित्ता अणुराहा मूलो पुव्वासाढा, तत्थ जे ते णक्खत्ता जे णं पणतालीसं मुहुत्ते चंदेणं सद्धिं जोगं जोएति ते णं छ, तं०-उत्तरा भद्वपदा रोहिणी पुणव्वसू उत्तरा फग्गुणी विसाहा उत्तरसाढा ।३३। ता एतेसिं णं अट्ठावीसाए णक्खत्ताणं अत्थि णक्खत्ते जे णं चत्तारि अहोरत्ते छच्च मुहुत्ते सूरेंण सद्धिं जोयं जोएति, अत्थि णक्खत्ता जे णं छ अहोरत्ते एक्कीवीसं च मुहुत्ते सूरेंण० अत्थि णक्खत्ता जे णं तेरस अहोरत्ते बारस य मुहुत्ते सूरेंण० अत्थि णक्खत्ता जे णं वीसं अहोरत्ते तिण्णि य मुहुत्ते०, ता एतेसिं णं अट्ठावीसाए णक्खत्ताणं कतरे णक्खत्ते जे णं चत्तारि अहोरत्ते छच्च मुहुत्ते सूरेंण० कतरे णक्खत्ते जे णं छ अहोरत्ते एक्कीवीसं मुहुत्ते सूरेंण० कतरे णक्खत्ता जे णं तेरस अहोरत्ते बारस य मुहुत्ते सूरेंण० कतरे णक्खत्ता जे णं वीसं अहोरत्ते तिण्णि य मुहुत्ते सूरेंण० ?, एतेसिं णं अट्ठावीसाए णक्खत्ताणं तत्थ जे से णक्खत्ते जे णं चत्तारि अहोरत्ते छच्च मुहुत्ते

सूरेण० से णं एगे अभीयी, एवं उच्चारयेयवाइं जाव तत्थ जे ते णक्खत्ता जे णं वीसं अहोरेते तिण्णि य मुहुत्ते सूरेण सद्धि जोयं जोएंति ते णं छ, तं०-उत्तरा भद्वता जाव उत्तरासाढा ।३४॥१०-२॥ ता कहं ते एवंभागा आहि० ?, ता एतेसिं णं अट्ठावीसाए णक्खत्ताणं अत्थि णक्खत्ता पुव्वंभागा समखेत्ता तीसतिमुहुत्ता पं०, अत्थि णक्खत्ता पच्छंभागा समखेत्ता तीसमुहुत्ता पं०, अत्थि णक्खत्ता णत्तंभागा अवड्ढखेत्ता पण्णरसमुहुत्ता पं०, अत्थि णक्खत्ता उभयंभागा दिवड्ढखेत्ता पणतालीसंमुहुत्ता पं०, ता एएसिं णं अट्ठावीसाए णक्खत्ताणं कतरे णक्खत्ता पुव्वंभागा समखेत्ता तीसतिमुहुत्ता पं० कतरे णक्खत्ता पच्छंभाग समखेत्ता तीसमुहुत्ता पं० कतरे णक्खत्ता णत्तंभागा अवड्ढखेत्ता पण्णरसमुहुत्ता पं० कतरे नक्खत्ता उभयंभागा दिवड्ढखेत्ता पणतालीसतिमुहुत्ता पं० ?, ता एतेसिं णं अट्ठावीसाए णक्खत्ताणं तत्थ जे ते णक्खत्ता पुव्वंभागा समखेत्ता तीसतिमुहुत्ता पं० ते णं छ, तं०-पुव्वा पोड्वता कत्तिया मघा पुव्वा फग्गुणी मूलो पुव्वासाढा, तत्थ जे ते णक्खत्ता पच्छंभागा समखेत्ता तीसतिमुहुत्ता पं० ते णं दस, तं०-अभिई सवणो धणिट्ठा रेवती अस्सिणी मिगसिरं पूसो हत्थो चित्ता अणुराधा, तत्थ जे ते णक्खत्ता णत्तंभागा अवड्ढखेत्ता पण्णरसमुहुत्ता पं० ते णं छ, तं०-सयभिसया भरणी अद्दा अस्सेसा साती जेट्ठा, तत्थ जे ते णक्खत्ता उभयंभागा दिवड्ढखेत्ता पणतालीसंमुहुत्ता पं० ते णं छ, तं०-उत्तरा पोड्वता रोहिणी पुणव्वसू उत्तरा फग्गुणी विसाहा उत्तरासाढा ।३५॥१०-३॥ ता कहं ते जोगस्स आदी आहि० ?, ता अभीयीसवणा खलु दुवे णक्खत्ता पच्छाभागा समखित्ता सातिरेगऊतालीसतिमुहुत्ता तप्पढमयाए सायं चंदेण सद्धिं जोयं जोएंति, ततो पच्छा अवरं सातिरेयं दिवसं, एवं खलु अभीईवसणा दुवे णक्खत्ता एगराइं एगं च सातिरेगं दिवसं चंदेण सद्धिं जोगं जोएंति ता जोयं अणुपरियट्ठंति ता सायं चंदं धणिट्ठाणं समप्पंति, ता धणिट्ठा खलु णक्खत्ते पच्छंभागे समखेत्ते तीसतिमुहुत्ते तप्पढमयाए सायं चंदेण सद्धिं जोगं जोएति ता जोयं० ता ततो पच्छा राइं अवरं च दिवसं, एवं खलु धणिट्ठाणक्खत्ते एगं च राइं एगं च दिवसं चंदेण सद्धिं जोयं जोएति ता जोयं अणुपरियट्ठंति ता सायं चंदं सतभिसयाणं समप्पेति, ता सयभिसया खलु णक्खत्ते णत्तंभागे अवड्ढखेत्ते पण्णरसमुहुत्ते तप्पढमयाए सायं चंदेण सद्धिं जोयं जोएति णो लभति अवरं दिवसं, एवं खलु सयभिसया णक्खत्ते एगं राइं चंदेण सद्धिं जोयं जोएति ता जोयं अणुपरियट्ठंति ता ता चंदं पुव्वाणं पोड्वताणं समप्पेति, ता पुव्वा पोड्वता खलु नक्खत्ते पुव्वंभागे समखेत्ते तीसतिमुहुत्ते तप्पढमयाए पातो चंदेणं सद्धिं जोयं जोएति ततो पच्छा अवरराइं, एवं खलु पुव्वा पोड्वता णक्खत्ते पुव्वंभागे समखित्ते तीसमुहुत्ते एगं च दिवसं एगं च राइं चंदेणं सद्धिं जोयं जोएति ता जोयं अणुपरियट्ठंति ता पातो चंदं उत्तरापोड्वताणं समप्पेति, ता उत्तरापोड्वता खलु नक्खत्ते उभयंभागे दिवड्ढखेत्ते पणतालीसमुहुत्ते तप्पढमयाए पातो चंदेणं सद्धिं जोयं जोएति अवरं च रातिं ततो पच्छा अवरं दिवसं, एवं खलु उत्तरापोड्वताणक्खत्ते एगं दिवसं एगं च राइं अवरं च दिवसं चंदेण सद्धिं जोयं जोएति ता जोयं अणुपरियट्ठंति ता सायं चंदं रेवतीणं समप्पेति, ता रेवती खलु णक्खत्ते पच्छंभागे सम० जहा धणिट्ठा जाव सागं चंदं अस्सिणीणं समप्पेति, ता अस्सिणी खलु णक्खत्ते पच्छिमभागे तमखेत्ते तीसतिमुहुत्ते तप्पढमयाए सागं चंदेण सद्धिं जोयं जोएति, ततो पच्छा अवरं दिवसं, एवं खलु अस्सिणीणक्खत्ते एगं च राइं एगं च दिवसं चंदेणं सद्धिं जोयं जोएति ता जोगं अणुपरियट्ठंति ता सागं चंदं भरणीणं समप्पेति, ता भरणी खलु णक्खत्ते णत्तंभागे अवड्ढखेत्ते जहा सतभिसया जाव पादो चंदं कत्तियाणं समप्पेति, एवं जहा सयभिसया तहा नत्तंभागा नेयव्वा, एवं जहा पुव्वभद्वता तहेव पुव्वंभागा छप्पि णेयव्वा, जहा धणिट्ठा तहा पच्छंभागा अट्ठ णेयव्वा जाव एवं खलु उत्तरासाढा दो दिवसे एगं च रातिं चंदेणं सद्धिं जोगं जोएति ता जोगं अणुपरियट्ठंति ता सायं चंदं अभितिसमणाणं समप्पेति ।३६॥१०-४॥ ता कहं ते कुला आहि० ?, तत्थ खलु इमे बारस कुला बारस उवकुला चत्तारि कुलोवकुला पं०, बारस कुला तं०-धणिट्ठाकुलं उत्तराभद्वता० अस्सिणी० कत्तिया० मगसिरं० पुस्सो० महा० उत्तराफग्गुणी० चित्ता० विसाहा० मूलो० उत्तरासाढाकुलं, बारस उवकुला तं०-सवणो उवकुलं पुव्वपोड्वता० रेवती० भरणी० रोहिणी० पुणव्वसु० अस्सेसा० पुव्वाफग्गुणी० हत्थो० साती० जेट्ठा० पुव्वा साढा०, चत्तारि कुलोवकुला तं०-‘अभीयीकुलोवकुलं सतभिसया० अद्दा० अणुराधाकुलोवकुलं ।३७॥१०-५॥ ता कहं ते पुण्णिमासिणी आहि० ?, तत्थ खलु इमाओ बारस पुण्णिमासिणीओ बारस अमावासाओ पं०-साविट्ठी

पोट्टवती आसोई कत्तिया मग्गसिरी पोसी माही फग्गुणी चेत्ती विसाही जेड्ढामूली आसाढी, ता साविट्ठिणं पुण्णमासिं कति णक्खत्ता जोएंति ?, ता तिण्णि णक्खत्ता जोइंति, तं०-अभिई सवणो धणिट्ठा, ता पुट्टवतीणं पुण्णिमं कति णक्खत्ता जोएंति ?, ता तिन्नि नक्खत्ता जोयंति, तं०-सतभिसया पुव्वापुट्टवता उत्तरापुट्टवता, ता आसोदिणं कति णक्खत्ता जोएंति ?, ता दोण्णि णक्खत्ता जोएंति, तं०-रेवती य अस्सिणी य, कत्तियणं पुण्णिमं पुच्छा, ता दोण्णि णक्खत्ता जोएंति तं०-भरणी कत्तिया य, एएणं अभिलावेणं मग्गसिरिं० दोण्णि तं०-रोहिणी मग्गसिरो य, पोसिणं तिन्नि तं०-अद्दा पुणव्वसू पुस्सो, माहिणं दोण्णि तं०-अस्सेसा महा य, फग्गुणीणं दोण्णि तं०-पुव्वाफग्गुणी उत्तराफग्गुणी य, चित्तिणं दोण्णि तं०-हत्थो चित्ता य, ता विसाहिणं दोण्णि साती विसाहा य, जेड्ढामूलिणं तिण्णि अणुराहा जेड्ढा मूलो, आसाढिणं दोन्नि पुव्वासाढा उत्तरासाढा ।३८। ता साविट्ठिणं पुण्णमासिणिं किं कुलं जोएति उवकुलं जो० कुलोवकुलं जोएति ?, ता कुलं वा० उवकुलं वा० कुलोवकुलं वा जोएति, कुलं जोएमाणे धणिट्ठाणक्खत्ते० उवकुलं जोएमाणो सवणे णक्खत्ते० कुलोवकुलं जोएमाणे अभिईणक्खत्ते जोएति, साविट्ठिं पुण्णिमं कुलं वा० उवकुलं वा० कुलोवकुलं वा जोएति, कुलेण वा उवकुलेण वा कुलोवकुलेण वा जुत्ता साविट्ठी पुण्णिमा जुत्ताति वत्तव्वं सिया, ता पोट्टवतिणं पुण्णिमं किं कुलं ? तहेव पुच्छा, ता कुलं वा० उवकुलं वा० कुलोवकुलं वा जोएति, कुलं जोएमाणे उत्तरा पोट्टवया णक्खत्ते जोएति उवकुलं जोएमाणे पुव्वा पुट्टवता णक्खत्ते जोएति कुलोवकुलं जोएमाणे सतभिसया णक्खत्ते जोएति, ता पोट्टवतिं कुलं वा उवकुलं वा कुलोवकुलं वा जोएति तं चेव जाव पुट्टवती पुण्णिमा जुत्ताति वत्तव्वं सिया, ता आसोइं णं पुण्णमासिणिं किं कुलं पुच्छा, णो लभति कुलोवकुलं, कुलं जोएमाणे अस्सिणीणक्खत्ते जोएति उवकुलं जोएमाणे रेवतीणक्खत्ते जोएति, आसोइं णं पुण्णिमं च कुलं वा उवकुलं वा जोएति, कुलेण वा जुत्ता उवकुलेण वा जुत्ता अस्सोई पुण्णिमा जुत्ताति वत्तव्वं सिया, एवं एएणं अभिलावेणं णेतव्वाउ पोसं पुण्णिमं जेड्ढामूलिं पुण्णिमं च कुलोवकुलाइं भाणियव्वाइं सेसासु णत्थि कुलोवकुलं, जाव आसाढीपुन्नमासिणी जुत्ताति वत्तव्वं सिया, दुवालस अमावासाओ सावट्ठी जाव आसाढी, ता साविट्ठिं णं अमावासं कति णक्खत्ता जोएंति ?, दुन्नि नक्खत्ता जोएंति, तं०-अस्सेसा य महा य, एवं एतेणं अभिलावेणं णेतव्वं, पोट्टवतीं दोन्नि तं०-पुव्वा फग्गुणी उत्तरा फग्गुणी, अस्सोइं दोन्नि हत्थो चित्ता य, कत्तिइं दोन्नि साती विसाहा य, मग्गसिरं तिन्नि अणुराधा जेड्ढा मूलो, पोसिं दोन्नि पुव्वासाढा उत्तरासाढा, माहिं तिन्नि अभीयी सवणो धणिट्ठा, फग्गुणीं तिण्णि सतभिसया पुव्वापोट्टवता उत्तरापोट्टवता, चेत्तिं तिन्नि उत्तरा भट्टवता रेवती अस्सिणी विसाहिं दोण्णि भरणी कत्तिया य जेड्ढामूलिं रोहिणी मग्गसिरं च, ता आसाढिं णं अमावासं कति णक्खत्ता जोएंति ?, ता तिण्णि तं०-अद्दा पुणव्वसू पुस्सो, ता साविट्ठिं णं अमावासं किं कुलं पुच्छा ?, कुलं वा० उवकुलं वा० नो लब्भइ कुलोवकुलं, कुलं जोएमाणे महाणक्खत्ते जोएति उवकुलं जोएमाणे असिलेसा जोएइ, कुलेण वा जुत्ता उवकुलेण वा जुत्ता साविट्ठी अमावासा जुत्ताति वत्तव्वं सिया, एवं मग्गसिरीए माहीए फग्गुणीए आसाढीए य अमावासाए कुलोवकुलं भाणियव्वं, सेसाणं कुलोवकुलं नत्थि ।३९॥१०-६॥ ता कहं ते सण्णिवाते आहिं० ?, ता जया णं साविट्ठी पुण्णिमा भवति तता णं माही अमावासा भवति जया णं माही पुण्णिमा भवति तता णं साविट्ठी अमावासा भवति, जता णं पुट्टवती पुण्णिमा भवति तता णं फग्गुणी अमावासा भवति जया णं फग्गुणी पुण्णिमा भवति तता णं पुट्टवती अमावासा भवति, एवं एएणं अभिलावेणं आसोइए चेत्तीए य कत्तीए वेसाहीए मग्गसिरीए जेड्ढामूलीए य, जता णं पोसी पुण्णिमा भवति तता णं आसाढी अमावासा भवति जता णं आसाढी पुण्णिमा भवति तता णं पोसी अमावासा भवति ।४०॥१०-७॥ ता कहं ते नक्खत्तसंठिती आहिं० ?, ता एएसिं णं अट्ठावीसाए णक्खत्ताणं अभीयी गोसीसावलिसंठिते सवणे काहारसंठिते पं० धणिट्ठा सउणिपलीणगसंठिते सयभिसया पुप्फोवयारसं ठिते, एवं पुव्वापोट्टवता अवड्ढवाविसंठिते, एवं उत्तरावि, रेवतीणक्खत्ते णावासंठिते अस्सिणीणक्खत्ते आसक्खंधसंठिते भरणीणक्खत्ते भगसंठिए कत्तियाणक्खत्ते छुरघरसंठिते पं० रोहिणीणक्खत्ते सगड्ढिसंठिते मिगसिराणक्खत्ते मग्गसिरीसावलिसंठिते अद्दाणक्खत्ते रूधिरबिंदुसंठिए पुणव्वसू तुलासंठिए पुप्फे वद्धमाणं अस्सेसा पडागसंठिए महा पागारसंठिते पुव्वाफग्गुणी अब्बपलियंकसंठिते, एवं उत्तरावि, हत्थे हत्थसंठिते चित्ता मुहफुल्लसंठिते साती खीलगसंठिते विसाहा दामणिसंठिते अणुराधा एगावलिसंठिते जेड्ढा

गयदंतसंठिते मूले विच्छुयलंगुलसंठिते पुव्वासाढा गयविक्रमसंठिते उत्तरासाढा सीहनिसाइयसंठिते ।४१॥१०-८॥ ता कहं ते णक्खत्ताणं तारग्गे आहिं ? , ता एतेसिं णं अट्ठावीसाए णक्खत्ताणं अभीईणक्खत्ते तितारे पं०, सवणे णक्खत्ते ? , तितारे, धनिट्ठा ? , पणतारे, सतभिसया ? , सततारे, पुव्वा पोड्वता ? , दुतारे, एवं उत्तरावि, रेवती० ? , बत्तीसतितारे, अस्सिणी० ? , तितारे, भरणी तितारे कत्तिया छतारे रोहिणी पंचतारे मिगसिरे तितारे अट्ठा एगतारे पुणव्वसू पंचतारे पुस्से तितारे अस्सेसा छतारे महा सत्ततारे पुव्वा फग्गुणी दुतारे एवं उत्तरावि हत्थे पंचतारे चित्ता एकतारे साती एकतारे विसाहा पंचतारे अणुराहा चउतारे जेट्ठा तितारे मूले एक्कारतारे पुव्वासाढा चउतारे उत्तरासाढाणक्खत्ते चउतारे पं० ।४२॥१०-९॥ ता कहं ते णेता आहिं ? , ता वासाणं पढमं मासं कति णक्खत्ता णेंति ? , ता चत्तारि णक्खत्ता णिंति, तं०-उत्तरासाढा अभीई सवणो धणिट्ठा, उत्तरासाढा चोदस अहोरत्ते णेति, अभीई सत्त अहोरत्ते णेति, सवणे अट्ठ अहोरत्ते णेति, धणिट्ठा एगं अहोरत्तं नेइ, तंसिं णं मासंसि चउरंगुलपोरिसीए छायाए सूरिए अणुपरियट्ठति, तस्स णं मासस्स चरिमे दिवसे दो पादाइं चत्तारि य अंगुलाणि पोरिसी भवति, ता वासाणं दोच्चं मासं कति णक्खत्ता णेंति ? , ता चत्तारि णक्खत्ता णेंति, तं०-धणिट्ठा सतभिसया पुव्वपुड्वता उत्तरपोड्वता, एवं एएणं अभिलावेणं जहेव जंबुदीवपन्नतीए तहेव इत्थं पि भाणियव्वं जाव तंसिं च णं मासंसि वट्ठाए समचउरंसंठिताए णग्गोधपरिमंडलाए सकायमणुरंगिणीए छायाए सूरिए अणुपरियट्ठति, तस्स णं मासस्स चरिमे दिवसे लेहट्ठाइं दो पादाइं पोरिसी भवति ।४३॥१०-१०॥ ता कहं ते चंदमग्गा आहिं ? , ता एएसिं णं अट्ठावीसाए णक्खत्ताणं अत्थि णक्खत्ता जे णं सता चंदस्स दाहिणेणं जोअं जोएंति, अत्थि णक्खत्ता जे णं सता चंदस्स उत्तरेणं० अत्थि णक्खत्ता जे णं चंदस्स दाहिणेणवि उत्तरेणवि पमदं पि० अत्थि णक्खत्ता जे णं चंदस्स दाहिणेणवि पमदं पि० अत्थि णक्खत्ता जे णं चंदस्स सदा पमदं०, ता एएसिं णं अट्ठावीसाए णक्खत्ताणं कतरे णक्खत्ता जे णं सता चंदस्स दाहिणेणं जोयं जोएंति ? , तहेव जाव कतरे णक्खत्ता जे णं सदा चंदस्स पमदं० ? , ता एतेसिं णं अट्ठावीसाए णक्खत्ताणं तत्थ जे णं णक्खत्ता सया चंदस्स दाहिणेणं० ते णं छ, तं०-संठाणा अट्ठा पुस्सो अस्सेसा हत्थो मूलो, तत्थ जे ते णक्खत्ता जे णं सदा चंदस्स उत्तरेणं जोयं जोएंति ते णं बारस, तं०-अभीई सवणो धणिट्ठा सतभिसया पुव्वभट्टवया उत्तरा पोड्वता रेवती अस्सिणी भरणी पुव्वा फग्गुणी उत्तरा फग्गुणी साती, तत्थ जे ते णक्खत्ता जे णं चंदस्स दाहिणेणवि उत्तरेणवि पमदं पि० ते णं सत्त तं०-कत्तिया रोहिणी पुणव्वसू महा चित्ता विसाहा अणुराहा, तत्थ जे ते णक्खत्ता जे णं चंदस्स दाहिणेणवि पमदं पि० ताओ णं दो आसाढाओ सव्वबाहिरे मंडले जोयं जोएंसु वा जोएंति वा जोएस्संति वा, तत्थ जे से णक्खत्ते जे णं सदा चंदस्स पमदं जोयं जोएति सा णं एगा जेट्ठा ।४४॥ ता कति ते चंदमंडला पं० ? , ता पण्णरस चंदमंडला ता एएसिं णं पण्णरसणं चंदमंडलाणं अत्थि चंदमंडला जे णं सया णक्खत्तेहिं अविरहिया अत्थि चंदमंडला जे णं सया णक्खत्तेहिं विरहिया अत्थि चंदमंडला जे णं रविससिणक्खत्ताणं सामण्णा भवंति अत्थि चंदमंडला जे णं सया आदिच्चविरहिता ते णं पंच, तं०-छट्ठे० सत्तमे० अट्ठमे० दसमे० एक्कादसे० पण्णरसमे चंदमंडले, तत्थ जे ते चंदमंडला जे णं सदा णक्खत्तेहिं अविरहिता ते णं अट्ठ, तं०-पढमे चंदमंडले ततिए० छट्ठे० सत्तमे० अट्ठमे० दसमे० एक्कादसे० पण्णरसमे चंदमंडले, तत्थ जे ते चंदमंडला जे णं सदा णक्खत्तेहिं विरहिया ते णं सत्त, तं०-बिति० चउत्थे० पंचमे० नवमे० बारसमे० तेरसमे० चउदसमे चंदमंडले, तत्थ जे ते चंदमंडला जे णं ससिरविनक्खत्ताणं सामण्णा भवंति ते णं चत्तारि, तं०-पढमे० बीए० इक्कारसमे० पन्नरसमे चंदमंडले, तत्थ जे ते चंदमंडला जे णं सदा आदिच्चविरहिता ते णं पंच, तं०-छट्ठे० सत्तमे० अट्ठमे० नवमे० दसमे चंदमंडले ।४५॥१०-११॥ ता कहं ते देवताणं अज्झयणा आहिं ? , ता एएसिं णं अट्ठावीसाए णक्खत्ताणं अभीई णक्खत्ते किंदेवताए पं० ? , बंभदेवयाए पं०, सवणे विण्हुदेवयाए, एवं जंहा जंबुदीवपन्नतीए जाव उत्तरासाढा विस्सदेवयाए पं० ।४६॥१०-१२॥ ता कहं ते मुहुत्ताणं नामधेज्जा आहिं ? , ता एगमेगस्स णं अहोरत्तस्स तीसं मुहुत्ता पं० तं०-‘रोहे सेते मित्ते वायु सुपीए तहेव अभिचंदे । माहिंद बलव बंभो बहुसच्चे १० चेव ईसाणे ॥२०॥ तद्वेय भावियप्पा वेसमणे वारूणे य आणंदे । विजए य वीससेणे पयावई चेव उवसमे य २० ॥२१॥ गंधव्व अग्गिवेसे सयरिसहे आयवं च अममे य । अणवं च भोम रिसहे

सव्वट्ठे रक्खसे चेव ३० ॥२२॥४७॥१०-१३॥ ता कहं ते दिवसा आहिं ?, ता एगमेगस्स णं पक्खस्स पन्नरस २ दिवसा पं० तं०-पडिवादिवसे बितियादिवसे जाव पण्णरसीदिवसे, ता एतेसिं णं पण्णरसण्हं दिवसाणं पन्नरस नामधेज्जा पं० तं०-पुव्वंगे सिद्धमणोरमे य तत्तो मणोहरो चेव । जसभदे य जसोधर सव्वकामसमिद्धेति य ॥२३॥ इंद मुद्धाभिसते य सोमणस धणंजए य बोद्धव्वे । अत्थसिद्धे अभिजाते अच्चसणे य सतंजए ॥२४॥ अग्गिवेसे उवसमे दिवसाणं नामधेज्जाइं ॥ ता कहं ते रातीओ आहिं ?, ता एगमेगस्स णं पक्खस्स पण्णरस राईओ पं० तं०-पडिवा राई जाव पण्णरसी राई, ता एतासिं णं पण्णरसण्हं राईणं पण्णरस नामधेज्जा पं० तं०-उत्तमा य सुणक्खत्ता, एलावच्चा जसोधरा । सोमणसा चेव तथा, सिरिसंभूता य बोद्धव्वा ॥२५॥ विजया य विजयंती जयंति अपराजिया य मच्छा य । समाहारा चेव तथा तेया य तथा य अतितेया ॥२६॥ देवाणंदा निरती रयणीणं णामधेज्जाइं ॥४८॥१०-१४॥ ता कहं ते तिही आहिं ?, तत्थ खलु इमा दुविहा तिही पं० तं०-दिवसतिही राईतिही य, ता कहं ते दिवसतिही आहिं ?, ता एगमेगस्स णं पक्खस्स पण्णरस २ दिवसतिही पं०, तं०-णंदे भदे जए तुच्छे पुण्णे पक्खस्स पंचमी पुणरवि णंदे भदे जए तुच्छे पुण्णे पक्खस्स दसमी पुणरवि णंदे भदे जये तुच्छे पुण्णे पक्खस्स पण्णरसी, एवं ते तिगुणा तिहीओ सव्वेसिं दिवसाणं, कहं ते राईतिथी आहिं ?, एगमेगस्स णं पक्खस्स पण्णरस रातिथी पं० तं०-उग्गवती भोगवती जसवती सव्वट्ठसिद्धा सुहणामा पुणरवि उग्गवती भोगवती जसवती सव्वट्ठसिद्धा सुहणामा पुणरवि उग्गवती भोगवती जसवती सव्वट्ठसिद्धा सुहणामा, एते तिगुणा तिहीओ सव्वासिं रातीणं ॥४९॥१०-१५॥ ता कहं ते गोत्ता आहिं ?, ता एतेसिं णं अट्ठावीसाए णक्खत्ताणं अभीङ्गणक्खत्ते किंगोत्ते पं० ?, ता मोग्गल्लायणसगोत्ते पं०, सवणे संखायणसगोत्ते, धणिट्ठाणक्खत्ते अग्गितावसगोत्ते पं०, सतभिसयाणक्खत्ते ?, कण्णउ (नो) लोयणसगोत्ते पं०, पुव्वापोट्ठवताणक्खत्ते जाउकण्णियसगोत्ते पं०, उत्तरपोट्ठवताणक्खत्ते धणंजयसगोत्ते पं०, रेवतीणक्खत्ते० ?, पुस्सायणसगोत्ते पं०, अस्सिणीनक्खत्ते अस्सादणसगोत्ते पं०, भरणीणक्खत्ते भग्गवेसायणसगोत्ते पं०, कत्तियाणक्खत्ते अग्गिवेससगोत्ते पं०, रोहिणीणक्खत्ते गोतमसगोत्ते पं०, संठाणाणक्खत्ते ?, भारद्वायसगोत्ते पं०, अट्ठाणक्खत्ते ?, लोहिच्चायणसगोत्ते पं०, पुणव्वसुणक्खत्ते ?, वासिट्ठसगोत्ते पं०, पुस्से उमज्जायणसगोत्ते पं०, अस्सेसा० ?, मंडव्वायणसगोत्ते पं०, महा० ?, पिंगायणसगोत्ते पं०, पुव्वा फग्गुणी० ?, गोवल्लायणसगोत्ते पं०, उत्तरा फग्गुणी० ?, कासवगोत्ते पं०, हत्थे० ?, कोसियगोत्ते पं०, चित्ता० दब्भियायणसगोत्ते पं०, साई० ?, चामरछाभणगोत्ते पं०, विसाहा० ?, सुंगायाणसगोत्ते पं०, अणुराधा० ?, गोलव्वायणसगोत्ते पं०, जेट्ठा० ?, तिगिच्छायणसगोत्ते पं०, मूले० ?, कच्चायणसगोत्ते पं०, पुव्वासाढा० ?, वज्झियायणसगोत्ते पं०, उत्तरासाढाणक्खत्ते किंगोत्ते पं० ?, वग्धावच्चसगोत्ते पं० ॥५०॥१०-१६॥ ता कहं ते भोयणा आहिं ?, ता एएसिं णं अट्ठावीसाए णक्खत्ताणं कत्तियाहिं दधिणा भोच्चा कज्जं साधंति, रोहिणीहिं वसभमंसेण भोच्चा कज्जं साधंति, संठाणाहिं मिगमंसेण अट्ठाहिं णवणीतेण भोच्चा पुणव्वसुणा घतेण पुस्सेणं खीरेण अस्सेसाए दीवगमंसेण महाहिं कसरिं पुव्वाहिं फग्गुणीहिं मेढकमंसेण उत्तराहिं फग्गुणीहिं णक्खीमंसेण हत्थेणं वत्थाणीपण्णेणं चित्ताहिं मुग्गसूवेणं सादिणा फलाइं विसाहाहिं आसित्तियाओ अणुराहाहिं मिस्साकूरं जेट्ठाहिं ओलट्ठिणं मूलेणं मूलापण्णे (लसाए) णं पुव्वाहिं आसाढाहिं आमलगसरीरेणं उत्तराहिं आसाढाहिं विलेविं अभीयणा पुप्फेहिं सवणेणं खीरेणं धणिट्ठाहिं जूसेण सयभिसयाए तुवरीओ पुव्वाहिं पुट्ठवयाहिं कारिल्लएहिं उत्तराहिं पुट्ठवताहिं वराहमंसेण रेवतीहिं जलयरमंसेण अस्सिणीहिं तित्तिरमंसेणं वट्ठकमंसं वा भरणीहिं तिलतंदुलकं भोच्चा कज्जं साधंति ॥५१॥१०-१७॥ ता कहं ते चा (वा) रा आहिं ?, ता तत्थ खलु इमा दुविहा चारा पं० तं०-आदिच्चारा य चन्दचारा य, ता कहं ते चंदचारा आहिं ?, ता पंचसंवच्छरिए णं जुगे अभीङ्गणक्खत्ते सत्तसट्ठिचारे चंदेण सद्धिं जोयं जोएति, सवणे णं णक्खत्ते सत्तट्ठिं चारे चंदेण सद्धिं जोयं जोएति, एवं जाव उत्तरासाढाणक्खत्ते सत्तट्ठिचारे चंदेण सद्धिं जोयं जोएति, ता कहं ते आइच्चारा आहिं ?, ता पंचसंवच्छरिए णं जुगे अभीयणक्खत्ते पंचचारे सूरेणं सद्धिं जोयं जोएति, एवं जाव उत्तरासाढाणक्खत्ते पंचचारे सूरेण सद्धिं जोयं जोएति ॥५२॥१०-१८॥ ता कहं ते मासा आहिं ?, ता एगमेगस्स णं संवच्छरस्स बारस मासा पं०, तेसिं च दुविहा नामधेज्जा पं० तं०-लोइया लोउत्तरिया य, तत्थ लोइया णामा सावणे भद्वते आसोए जाव आसाढे,

लोत्तरिया णामा-अभिणंदे सुपइहे य, विजये पीतिवद्धणे । सेज्जंसे सिवे यावि, सिसिरे य सहेमवं ॥२७॥ नवमे वसंतमासे, दसमे कुसुमसंभवे । एकादसमे णिदाहो, वणविरोही य बारसे ॥२८॥ ५३।१०-१९॥ ता कति णं भंते ! संवच्छरा आहि० ?, ता पंच संवच्छरा आहि० तं०-णक्खत्तसंवच्छरे जुग० पमाण० लक्खण० सणिच्छरसंवच्छरे । ५४। ता णक्खत्तसंवच्छरे णं दुवालसविहे पं० तं०-सावणे भद्वए जाव आसाढे, जं वा वहस्सती महग्गहे दुवालसहिं संवच्छरेहिं सव्वं णक्खत्तमंडलं समाणेति । ५५। ता जुगसंवच्छरे णं पंचविहे पं० तं०-चंदे चंदे अभिवट्ठिए चंदे अभिवट्ठिए चेव, ता पढमस्स णं चंदसंवच्छरस्स चउवीसं पव्वा पं०, दोच्चस्स णं चंदसंवच्छरस्स चउवीसं पव्वा पं०, तच्चस्स णं अभिवट्ठितसंवच्छरस्स छव्वीसं पव्वा पं०, चउत्थस्स णं चंदसंवच्छरस्स चउवीसं पव्वा पं०, पंचमस्स णं अभिवट्ठियसंवच्छरस्स छव्वीसं पव्वा पं०, एवामेव सपुव्वावरेणं पंचसंवच्छरिए जुगे एगे चउवीसे पव्वसते भवतीतिमक्खातं । ५६। ता पमाणसंवच्छरे पंचविहे पं० तं०-नक्खत्ते चंदे उडू आइच्चे अभिवट्ठिए । ५७। ता लक्खणसंवच्छरे पंचविहे पं० तं०-नक्खत्ते चंदे उडू आइच्चे अभिवट्ठिए, ता णक्खत्ते णं संवच्छरे णं पंचविहे पं० तं०-समगं णक्खत्ता जोयं जोएंति १ समगं उडू परिणमंति २ । नच्चुण्हं ३ नाइसीए ४ बहूउदए ५ होइ नक्खत्ते ॥२९॥ ससि समग पुन्निमासिं जोइंता विसमचारिनक्खत्ता । कडुओ बहुउदवओ य तमाहु संवच्छरं चंदं ॥३०॥ विसमं पवालिणो परिणमंति अणुऊसु दिति पुप्फफलं । वासं न सम्म वासइ तमाहु संवच्छरं कम्मं ॥३१॥ पुढविदगाणं च रसं पुप्फफलाणं च देइ आइच्चे । अप्पेणवि वासेणं संमं निप्फज्जए सस्सं ॥३२॥ आइच्चतेयतविया खणलवदिवसा उऊ परिणमन्ति । पूरेति निण्णथलये तमाहु अभिवड्ढितं जाण ॥३३॥ ता सणिच्छरसंवच्छरे णं अट्ठावीसतिविहे पं० तं०-अभियी सवणे जाव उत्तरासाढा, जं वा सणिच्छरे महग्गहे तीसाए संवच्छरेहिं सव्वं णक्खत्तमंडलं समाणेति । ५८॥ १०-२०॥ ता कहं ते जोतिसस्स दारा आहि० ?, तत्थ खलु इमाओ पंच पडिवत्तीओ पं०, तत्थेगे एव०-ता कत्तियादी णं सत्त नक्खत्ता पुव्वदारिया पं० ते णं एव० तं०-कत्तिया जाव असिलेसा, महादीया सत्त दाहिणदारिया पं० तं०-महा जाव विसाहा, अणुराधादीया सत्त अवरदारिया पं० तं०-अणुराधा जाव सवणो, धणिट्ठादीया सत्त उत्तरदारिया पं० तं०-धणिट्ठा जाव भरणी, तत्थ जे ते एव०-ता महादीया सत्त पुव्व० तं० ते एव० तं०-महा जाव विसाहा, अणुराधादीया सत्त दाहिण० पं० तं०-अणुराधा जाव सवणे, धणिट्ठादीया सत्त अवर० पं० तं०-धणिट्ठा जाव भरणी, कत्तियादीया सत्त उत्तर० पं० तं०-कत्तिया जाव अस्सेसा, तत्थ णं जे ते एव० ता धणिट्ठादीया सत्त पुव्वदा० पं० ते एव० तं०-धणिट्ठा जाव भरणी, कत्तियादीया सत्त दाहिण० पं० तं०-कत्तिया जाव अस्सेसा, महादीया सत्त अवर० पं० तं०-महा जाव विसाहा, अणुराधादीया सत्त उत्तर० पं० तं०-अणुराधा जाव सवणो, तत्थ जे ते एव०-ता अस्सिणीआदीया सत्त णक्खत्ता पुव्व० पं० ते एव० तं०-अस्सिणी जाव पुणव्वसू, पुस्सादीया सत्त दाहिण० पं० तं०-पुस्सो जाव चित्ता, सादीयादीया सत्त अवर० पं० तं०-साती जाव उत्तरासाढा, अभीयीआदीया सत्त उत्तर० पं० तं०-अभिई जाव रेवती, तत्थ जे ते एव० ता भरणिआदीया सत्त पुव्व० पं० ते एव० तं०-भरणी जाव पुस्सो, अस्सेसादीया सत्त दाहिण० पं० तं०-अस्सेसा जाव साई, विसाहादीया सत्त अवर० पं० तं०-विसाहा जाव अभिई, सवणादीया सत्त उत्तर० पं० तं०-सवणो जाव अस्सिणी एगे एव०, वयं पुण एवं वदामो-ता अभिईतादीया सत्त पुव्व० पं० तं०-अभियी जाव रेवती, अस्सिणीआदीया सत्त दाहिण० पं० तं०-अस्सिणी जाव पुणव्वसू, पुस्सादीया सत्त अवर० पं० तं०-पुस्सो जाव चित्ता, सातिआदीया सत्त णक्खत्ता उत्तरदारिया पं० तं०-साती जाव उत्तरासाढा । ५९॥ १०-२१॥ ता कहं ते णक्खत्तविजये आहि० ?, ता अयणं जंबुदीवे जाव परिक्खेवेणं, ता जंबुदीवे णं दीवे दो चंदा पभासेंसु वा पभासेंति वा पभासिस्संति वा दो सूरिया तविंसु वा तवेंति वा तविस्संति वा छप्पणं णक्खत्ता जोयं जोएंसु वा० तं०-दो अभीयी दो सवणा जाव दो उत्तराओ आसाढाओ, ता एएसिं णं छप्पणाए नक्खत्ताणं अत्थि णक्खत्ता जे णं णव मुहुत्ते सत्तावीसं च सत्तट्ठिभागे मुहुत्तस्स चंदेणं सद्धिं जोयं जोएंति, पण्णरसमुहुत्ते० तीसमुहुत्ते० पणयालीसं० जोयं जोएंति, ता एतेसिं णं छप्पणाए णक्खत्ताणं कतरे णक्खत्ते जे णं णव मुहुत्ते सत्तावीसं च सत्तसट्ठिभागे मुहुत्तस्स चंदेण जाव कतरे णक्खत्ता जे णं पणतालीसं मुहुत्ते चंदेण सद्धिं जोयं जोएंति ?, ता एतेसिं णं छप्पणाए णक्खत्ताणं तत्थ जे ते णक्खत्ता जे णं णव मुहुत्ते सत्तावीसं च सत्तट्ठिभागे

मुहुत्तस्स चंदेण० ते णं दो अभीयी, तत्थ जे ते णक्खत्ता जे णं पण्णरस मुहुत्ते चंदेण० ते णं बारस, तं०-दो सतभिसया दो भरणी दो अद्दा दो अस्सेसा दो साती दो जेद्दा, तत्थ जे णं तीसं मुहुत्ते चंदेण० ते णं तीसं, तं०-दो सवणा दो धणिद्दा दो पुव्वभद्वता दो रेवती दो अस्सिणी दो कत्तिया दो संठाणा दो पुस्सा दो महा दो पुव्वाफग्गुणी दो हत्था दो चित्ता दो अणुराधा दो मूला दो पुव्वासाढा, तत्थ जे ते णक्खत्ता जे णं पणतालीसं मुहुत्ते० ते णं बारस, तं०-दो उत्तरापोट्टवता दो रोहिणी दो पुणव्वसू दो उत्तराफग्गुणी दो विसाहा दो उत्तरासाढा, ता एसिं णं छप्पण्णाए णक्खत्ताणं अत्थि णक्खत्ते जे णं चत्तारि अहोरत्ते छच्च मुहुत्ते सूरिण सद्धिं जोयं जोएति, अत्थि णक्खत्ता जे णं छ अहोरत्ते एकवीसं च मुहुत्ते सूरिण० अत्थि णक्खत्ता जे णं तेरस अहोरत्ते बारस य मुहुत्ते सूरिण०, अत्थि णक्खत्ता जे णं वीसं अहोरत्ते तिन्नि य मुहुत्ते सूरिण०, एसिं णं छप्पण्णाए णक्खत्ताणं कयरे णक्खत्ता जे णं तं चेव उच्चारयव्वं, ता एतेसिं णं छप्पण्णाए णक्खत्ताणं तत्थ जे ते णक्खत्ता जे णं चत्तारि अहोरत्ते छच्च मुहुत्ते सूरिण० ते णं दो अभीयी, तहेव जाव तत्थ जे ते णक्खत्ता जे णं वीसं अहोरत्ते तिन्नि य मुहुत्ते सूरिण० जोयं जोएति ते णं बारस तं०-दो उत्तरापोट्टवता जाव दो उत्तरासाढाओ ।६०। ता कहं ते सीमाविकखंभे आहि० ?, ता एतेसिं णं छप्पण्णाए णक्खत्ताणं अत्थि णक्खत्ता जेसिं णं छ सया तीसा सत्तट्ठिभागतीसतिभागाणं सीमाविकखंभो, अत्थि णक्खत्ता जेसिं णं सहस्सं पंचोत्तरं सत्तट्ठिभागतीसतिभागाणं सीमाविकखंभो, अत्थि णक्खत्ता जेसिं णं दो सहस्सा दसुत्तरा सत्तट्ठिभागतीसतिभागाणं सीमाविकखंभो, अत्थि णक्खत्ता जेसिं णं तिन्नि सहस्सा पंचदसुत्तरं सत्तट्ठिभागतीसतिभागाणं सीमाविकखंभो, ता एतेसिं णं छप्पण्णाए णक्खत्ताणं कतरे णक्खत्ता जेसिं णं छ सया तीसा तं चेव उच्चारयव्वं जाव तिसहस्सं पंचदसुत्तरं सत्तट्ठिभागतीसतिभागाणं सीमाविकखंभो ?, ता एतेसिं णं छप्पण्णाए णक्खत्ताणं तत्थ जे ते णक्खत्ता जेसिं णं छ सया तीसा सत्तट्ठिभागतीसतिभागाणं सीमाविकखंभो ते णं दो अभीयी, तत्थ जे ते णक्खत्ता जेसिं णं सहस्सं पंचोत्तरं सत्तट्ठिभागतीसतिभागाणं सीमाविकखंभो ते णं बारस, तं०-दो सतभिसया जाव दो जेद्दा, तत्थ जे ते णक्खत्ता (२०७) जेसिं णं दो सहस्सा दसुत्तरा सत्तट्ठिभागतीसतिभागाणं सीमाविकखंभो ते णं तीसं, तं०-दो सवणा जाव दो पुव्वाओ आसाढाओ, तत्थ जे ते णक्खत्ता जेसिं णं तिन्नि सहस्सा पण्णरसुत्तरा सत्तट्ठिभागतीसतिभागाणं सीमाविकखंभो ते णं बारस, तं०-दो उत्तरापोट्टवता जाव उत्तरासाढा ।६१। एतेसिं णं छप्पण्णाए णक्खत्ताणं किं सया पादो चंदेण सद्धिं जोयं जोएति ?, किं सया सायं चंदेण सद्धिं जोयं जोएति ?, एतेसिं णं छप्पण्णाए णक्खत्ताणं किं सया दुहा पविसिय २ चंदेण० ?, ता एसिं णं छप्पण्णाए णक्खत्ताणं न किंपि तं जं सया पादो चंदेण० नो सया सायं चंदेण० नो सया दुहाओ पविसित्ता २ चंदेण सद्धिं जोयं जोएति, णण्णत्थ दोहिं अभीयीहिं, ता एते णं दो अभीयी पायंचिय २ चोत्तालीसमं अमावासं जोएति, णो चेव णं पुण्णमासिणिं ।६२। तत्थ खलु इमाओ बावट्ठिं पुण्णमासिणीओ बावट्ठिं अमावासाओ पं०, ता एसिं णं पंचण्हं संवच्छराणं पढमं पुण्णमासिणिं चंदे कंसि देसंसि० ?, ता जंसि णं देसंसि चंदे चरिमं बावट्ठिं पुण्णमासिणिं जोएति ताए पुण्णमासिणिद्दाणातो मंडलं चउव्वीसेणं सतेणं छेत्ता दुबत्तीसं भागे उवातिणावेत्ता एत्थ णं से चंदे पढमं पुण्णमासिणिं जोएति, ता एसिं णं पंचण्हं संवच्छराणं दोच्चं पुण्णमासिणिं चंदे कंसि देसंसि जोएति ?, ता जंसि णं देसंसि चंदे पढमं पुण्णमासिणिं जोएति ताते पुण्णमासिणीद्दाणातो मंडलं चउव्वीसेणं सएणं छेत्ता दुबत्तीसं भागे उवाइणावेत्ता एत्थ णं से चंदे दोच्चं पुण्णमासिणिं जोएति, ता एसिं णं पंचण्हं संवच्छराणं तच्चं पुण पुच्छा, ता जंसि णं देसंसि चंदे दोच्चं पुण्णमासिणिं जोएति ताए पुण्णमासिणीद्दाणातो मंडलं चउव्वीसेणं सतेणं छेत्ता दुबत्तीसं भागे उवाइणावेत्ता एत्थ णं तच्चं चंदे पुण्णमासिणिं जोएति, ता एतेसिं पंचण्हं संवच्छराणं दुवालसमं पुण्णमासिणिं चंदे कंसि देसंसि जोएति ?, ता जंसि णं देसंसि चंदे तच्चं पुण्णमासिणिं जोएति ताते पुण्णमासिणिद्दाणाते मंडलं चउव्वीसेणं सतेणं छेत्ता दोण्णि अट्ठरसीते भागसते उवायिणावेत्ता एत्थ णं से चंदे दुवालसमं पुण्णमासिणिं जोएति, एवं खलु एतेणुवाएणं ताते २ पुण्णमासिणिद्दाणाते मंडलं चउव्वीसेणं सतेणं छेत्ता दुबत्तीसभागे उवातिणावेत्ता तंसि २ देसंसि तं तं पुण्णमासिणिं चंदे जोएति, ता एतेसिं णं पंचण्हं संवच्छराणं चरमं बावट्ठिं पुण्णमासिणिं चंदे कंसि देसंसि जोएति ?, ता जंबुदीवस्स णं पाईणपडीणायताए उदीणदाहिणायताए जीवाए मंडलं चउव्वीसेणं सतेणं छेत्ता दाहिणिल्लंसि चउव्वीभागमंडलंसि सत्तावीसं भागे उवायणावेत्ता

अद्वावीसतिभागं वीसहा छेत्ता अट्ठारसभागे उवातिणावेत्ता तिहिं भागेहिं दोहि य कलाहिं पच्चत्थिमिल्लं चउब्भागमंडलं असंपत्ते एत्थ णं चंदे चरिमं बावट्ठि पुण्णमासिणिं जोएति । ६३। ता एएसिं णं पंचण्हं संवच्छराणं पढमं पुण्णमासिणिं सूरु कंसि देसंसि जोएति ?, ता जंसि णं देसंसि सूरु चरिमं बावट्ठि पुण्णमासिणिं जोएति ताते पुण्णमासिणिद्वाणातो मंडलं चउब्वीसेणं सतेणं छेत्ता चउणवतिं भागे उवातिणावेत्ता एत्थ णं से सूरुए पढमं पुण्णमासिणिं जोएइ, ता एएसिं णं पंचण्हं संवच्छराणं दोच्चं पुण पुच्छा, ता जंसि णं देसंसि सूरु पढमं पुण्णमासिणिं जोएइ ताए पुण्णमासिणीठाणाओ मंडलं चउब्वीसेणं सएणं छेत्ता चउणवइभागे उवाइणावित्ता एत्थ णं से सूरु दोच्चं पुण्णमासिणिं जोएइ, एवं तच्चंपि नवरं दोच्चाओ एत्थ णं से सूरु तच्चं पुण्णमासिणिं जोएति, ता एतेसिं णं पंचण्हं संवच्छराणं दुवालसं पुण्णमासिणिं० पुच्छा, जंसि णं देसंसि तच्चं पुण्णमासिणिं जोएति ताते पुण्णमा सिणिद्वाणाते० अब्बछत्ताले भागसते उवाइणावेत्ता एत्थ णं से सूरु दुवालसमं पुण्णमासिणिं जोएति, एवं खलु एतेणुवाएणं ताते २ पुण्णमासिणिद्वाणाते मंडलं चउब्वीसेणं सतेण छेत्ता चउणउतिं २ भागे उवातिणावेत्ता तंसि २ णं देसंसि तं तं पुण्णमासिणिं सूरु जोएति, ता एतेसिं णं पंचण्हं संवच्छराणं चरिमं बावट्ठि पुच्छा, ता जंबुद्दीवस्स णं पाईणपडीणायताए उदीणदाहिणायताए जीवाए मंडलं चउब्वीसेणं सएणं छेत्ता पुरच्छिमिल्लंसि चउभागमंडलंसि सत्तावीसं भागे उवातिणावेत्ता अट्ठारसभागे उवादिणावेत्ता तिहिं भागेहिं दोहि य कलाहिं दाहिणिल्लं चउभागमंडलं असंपत्ते एत्थ णं सूरु चरिमं बावट्ठि पुण्णिमं जोएति । ६४। ता एएसिं णं पंचण्हं संवच्छराणं पढमं अमावासं चंदे कंसि देसंसि जोएति ?, ता जंसि णं देसंसि चंदे चरिमं बावट्ठि अमावासं जोएति ताते अमावासद्वाणाते मंडलं चउब्वीसेणं सतेणं छेत्ता दुबत्तीसं भागे उवादिणावेत्ता एत्थ णं से चंदे पढमं अमावासं जोएति, एवं जेणेव अभिलावेणं चंदस्स पुण्णमासिणीओ भणियाओ तेणेव अभिलावेणं अमावासाओ भणितव्वाओ बिइया ततिया दुवालसमी, एवं खलु एतेणुवाएणं ताते २ अमावासद्वाणाते मंडलं चउब्वीसेणं सतेणं छेत्ता दुबत्तीसं २ भागे उवादिणावेत्ता तंसि २ देसंसि तं तं अमावासं चंदेणं जोएति, ता एतेसिं णं पंचण्हं संवच्छराणं चरिमं बावट्ठि अमावासं पुच्छा ?, ता जंसि णं देसंसि चंदे चरिमं बावट्ठि पुण्णमासिणिं जोएति ताते पुण्णमासिणिद्वाणाए मंडलं चउब्वीसेणं सतेणं छेत्ता सोलसभागं ओसक्कइत्ता एत्थ णं से चंदे चरिमं बावट्ठि अमावासं जोएति । ६५। ता एतेसिं णं पंचण्हं संवच्छराणं पढमं अमावासं सूरु कंसि देसंसि जोएति ?, ता जंसि णं देसंसि सूरु चरिमं बावट्ठि अमावासं जोएति ताते अमावासद्वाणाते मंडलं चउब्वीसेणं सतेणं छेत्ता चउणउतिभागे उवायिणावेत्ता एत्थ णं से सूरु पढमं अमावासं जोएति, एवं जेणेव अभिलावेणं सूरियस्स पुण्णमासिणीओ तेणेव अमावासाओवि, तं०-बिदिया तइया दुवालसमी, एवं खलु एतेणुवाएणं ताते २ अमावासद्वाणाते मंडलं चउब्वीसेणं सतेणं छेत्ता चउणउतिं २ भागे उवायिणावेत्ता तंसि २ देसंसि तं तं अमावासं सूरुए जोएति, ता एतेसिं णं पंचण्हं २ संवच्छराणं चरिमं बावट्ठि अमावासं पुच्छा, ता जंसि णं देसंसि सूरु चरिमं बावट्ठि पुण्णमासिणिं जोएति ताते पुण्णमासिणिद्वाणाते मंडलं चउब्वीसेणं सतेणं छेत्ता सत्तालीसं भागे उसक्कावइत्ता एत्थ णं से सूरु चरिमं बावट्ठि अमावासं जोएति । ६६। ता एएसिं णं पंचण्हं संवच्छराणं पढमं पुण्णमासिणिं चंदे केणं णक्खत्तेणं जोएति ?, ता धणिद्वाहिं, धणिद्वाणं तिण्णि मुहुत्ता एकूणवीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता पण्णट्ठी चुण्णिया भागा सेसा, तंसमयं च णं सूरुए केणं णक्खत्तेणं जोएति ?, ता पुव्वाफग्गुणीहिं, ता पुव्वाफग्गुणीणं अद्वावीसं मुहुत्ता अट्ठतीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता दुवत्तीसं चुण्णिया भागा सेसा, ता एएसिं णं पंचण्हं संवच्छराणं दोच्चं पुण्णमासिणिं चंदे केणं णक्खत्तेणं जोएति ?, ता उत्तराहिं पोट्ठवताहिं, उत्तराणं पोट्ठवताणं सत्तावीसं मुहुत्ता चोदस य बावट्ठिभागा मुहुत्तस्स बावट्ठिभागं च सत्तट्ठिधा छेत्ता बावट्ठी चुण्णिया भागा सेसा, तंसमयं च णं सूरु केणं णक्खत्तेणं जोएति ?, ता उत्तराहिं फग्गुणीहिं, उत्तराफग्गुणीणं सत्त मुहुत्ता तेत्तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता एकत्तीसं चुण्णिया भागा सेसा, ता एतेसिं णं पंचण्हं संवच्छराणं तच्चं पुण्णमासिणीं चंदे केणं णक्खत्तेणं जोएति ?, ता अस्सिणीहिं, अस्सिणीणं एकवीसं मुहुत्ता णव य बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेवट्ठी चुण्णिया भागा सेसा, तंसमयं च णं सूरु केणं णक्खत्तेणं जोएति ?, ता चित्ताहिं, चित्ताणं एक्को मुहुत्तो अद्वावीसं च बावट्ठिभागा मुहुत्तस्स बावट्ठिभागं च सत्तट्ठिधा

छेत्ता तीसं चुण्णिया भागा सेसा, ता एतेसिं णं पंचण्हं संवच्छराणं दुवालसमं पुण्णामासिणिं पुच्छा, ता उत्तराहिं आसाढाहिं, उत्तराणं च आसाढाणं छव्वीसं मुहुत्ता छव्वीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता चउप्पण्णं०, तंसमयं च सूरं केणं पुच्छा, ता पुणव्वसुणा, पुणव्वसुस्स सोलस मुहुत्ता अट्ठ य बावट्ठिभागा मुहुत्तस्स बावट्ठिभागं च सत्तट्ठिधा छेत्ता वीसं चुण्णिया भागा सेसा, ता एतेसिं णं पंचण्हं संवच्छराणं चरमं बावट्ठि पुण्णामासिणिं चंदे केणं णक्खत्तेणं जोएति ? ता उत्तराहिं आसाढाहिं उत्तराणं आसाढाणं चरमसमए, तंसमयं च णं सूरं केणं णक्खत्तेणं जोएति ?, ता पुस्सेणं, पुस्सस्स एकूणवीसं मुहुत्ता तेतालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेतीसं चुण्णिया भागा सेसा ।६७। एतेसिं णं पंचण्हं संवच्छराणं पढमं अमावासं चंदे केणं णक्खत्तेणं जोएति ?, ता अस्सेसाहिं, अस्सेसाणं एक्को मुहुत्तो चत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छावट्ठी चुण्णिया० भागा० सेसा, तंसमयं च णं सूरं केणं णक्खत्तेणं जोएति ?, ता अस्सेसाहिं चेव, अस्सेसाणं एक्को मुहुत्तो चत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छावट्ठी चुण्णिया भागा सेसा, ता एसिं णं पंचण्हं० दोच्चं अमावासं चंदे पुच्छा, उत्तराहिं फग्गुणीहिं, उत्तराणं फग्गुणीणं चत्तालीसं मुहुत्ता पणतीसं बावट्ठिभागा मुहुत्तस्स बावट्ठिभागं च सत्तट्ठिधा छेत्ता पण्णट्ठी चुण्णिया भागा सेसा, तंसमयं च णं सूरं केणं पुच्छा, ता उत्तराहिं चेव फग्गुणीहिं, उत्तराणं फग्गुणीणं तं चेव जाव पण्णट्ठी चुण्णिया भागा सेसा, ता एतेसिं णं पंचण्हं संवच्छराणं तच्चं अमावासं चंदे पुच्छा, ता हत्थेणं, हत्थस्स चत्तारि मुहुत्ता तीसं च बावट्ठिभागा मुहुत्तस्स बावट्ठि भागं च सत्तट्ठिधा छेत्ता बावट्ठी चुण्णिया भागा सेसा, तंसमयं च णं सूरं केणं पुच्छा, हत्थेणं चेव, जं चेव चंदस्स, ता एसिं णं पंचण्हं संवच्छराणं दुवालसमं अमावासं चंदे केणं पुच्छा, ता अद्दाहिं, अद्दाणं चत्तारिं मुहुत्ता दस य बावट्ठिभागा मुहुत्तस्स बावट्ठिभागं च सत्तट्ठिधा छेत्ता चउप्पणं चुण्णिया भागा सेसा, तंसमयं च णं सूरं केणं पुच्छा, ता अद्दाहिं चेव, जं चेव चंदस्स, ता एसिं णं पंचण्हं संवच्छराणं चरिमं बावट्ठि अमावासं चंदे केणं पुच्छा ?, पुणव्वसुणा, पुणव्वसुस्स बावीसं मुहुत्ता छायालीसं च बासट्ठिभागा मुहुत्तस्स सेसा, तंसमयं च णं सूरं केणं पुच्छा ?, ता पुणव्वसुणा चेव, पुणव्वसुस्स णं जहा चंदस्स ।६८। ता जेणं अज्ज णक्खत्तेणं चंदे जोयं जोएति जंसि देसंसि से णं इमाणि अट्ठ एकूणवीसाणि मुहुत्तसताइं चउवीसं च बावट्ठिभागे मुहुत्तस्स बावट्ठिभागं च सत्तट्ठिधा छेत्ता बावट्ठि चुण्णियाभागे उवायिणावेत्ता पुणरवि से चंदे अण्णेणं तारिसएणं चेव णक्खत्तेणं जोयं जोएति अण्णंसि देसंसि, ता जेणं अज्ज णक्खत्तेणं चंदे जोयं जोएति जंसि देसंसि से णं इमाइं सोलसअट्ठतीस मुहुत्तसताइं अउणापण्णं च बावट्ठिभागे मुहुत्तस्स बावट्ठिभागं च सत्तट्ठिधा छेत्ता पण्णट्ठी चुण्णियाभागे उवायिणावेत्ता पुणरवि से णं चंदे तेणं चेव णक्खत्तेणं जोयं जोएति अण्णंसि देसंसि, ता जेणं अज्ज णक्खत्तेणं चंदे जोयं जोएति जंसि देसंसि से णं इमाइं चउप्पण्णमुहुत्तसहस्साइं णव य मुहुत्तसताइं उवादिणावित्ता पुणरवि से चंदे अण्णेणं तारिसएणं नक्खत्तेणं जोयं जोएति तंसि देसंसि, ता जेणं अज्ज णक्खत्तेणं चंदे जोयं जोएति जंसि २ देसंसि से णं इमं एणं मुहुत्तसयसहस्सं अट्ठाणउतिं च मुहुत्तसताइं उवायिणावित्ता पुणरवि से चंदे तेणं चेव णक्खत्तेणं जोयं जोएइ तंसि देसंसि, ता जेणं अज्ज णक्खत्तेणं सूरं जोयं जोएति जंसि देसंसि से णं इमाइं तिण्णि छावट्ठाइं राइंदियसताइं उवादिणावेत्ता पुणरवि से सूरि ए अण्णेणं तारिसएणं चेव नक्खत्तेणं जोयं जोएति तंसि देसंसि, ता जेणं अज्ज नक्खत्तेणं सूरं जोयं जोएति तंसि देसंसि से णं इमाइं सत्तदुतीसं राइंदियसताइं उवाइणावेत्ता पुणरवि से सूरं तेणं चेव नक्खत्तेणं जोयं जोएति तंसि देसंसि, ता जेणं अज्ज णक्खत्तेणं सूरं जोयं जोएति जंसि देसंसि से णं इमाइं अट्ठारस वीसाइं राइंदियसताइं उवादिणावेत्ता पुणरवि से सूरं अण्णेणं तारिसएणं चेव णक्खत्तेणं जोयं जोएति तंसि देसंसि, ता जेणं अज्ज णक्खत्तेणं सूरं जोयं जोएति जंसि देसंसि से णं इमाइं छत्तीसं सट्ठाइं राइंदियसयाइं उवाइणावित्ता पुणरवि से सूरं तेणं चेव णक्खत्तेणं जोयं जोएति तंसि देसंसि ।६९। ता जया णं इमे चंदे गतिसमावण्णए भवति तता णं इतरेवि चंदे गतिसमावण्णए भवति जता णं इतरे चंदे गतिसमावण्णए भवति तता णं इमेवि चंदे गतिसमावण्णए भवति, ता जया णं इमे चंदे जुत्ते जोगेणं भवति तता णं इतरेवि चंदे० जया णं इयरे चंदे० तता णं इमेवि चंदे०, एवं सूरं वि गहेवि णक्खत्तेवि, सतावि णं चंदा जुत्ता जोएहिं सतावि णं सूरं जुत्ता जोगेहिं सयावि णं गहा जुत्ता जोगेहिं सयावि णं नक्खत्ता जुत्ता जोगेहिं दुहतोवि णं चंदा जुत्ता जोगेहिं

दुहतोवि णं सूरा० दुहतोवि णं गहा० दुहतोवि णं णक्खत्ता० मंडलं सतसहस्सेणं अट्ठाणउतीए सतेहिं छेत्ता, इच्चेस णक्खत्तखेत्तपरिभागे णक्खत्तविजए नाम पाहुंडेत्ति आहितेत्ति वेमि ☆☆☆ ।७०॥१०-२२ दसमं पाहुंडं ॥ ☆☆☆ ता कहं ते संवच्छराणीदी आहि० ? तत्थ खलु इमे पंच संवच्छरा पं० तं०-चंदे चंदे अभिवड्ढिते चंदे अभिवड्ढिते, ता एतेसिं णं पंचणहं संवच्छराणं पढमस्स चंदस्स संवच्छरस्स के आदी आहि० ?, ता जे णं पंचमस्स अभिवड्ढितसंवच्छरस्स पज्जवसाणे से णं पढमस्स चंदस्स संवच्छरस्स आदी अणंतरपुरक्खडे समए, ता से णं किंपज्जवसिते आहि० ?, ता जे णं दोच्चस्स चंदसंवच्छरस्स आदी से णं पढमस्स चंदसंवच्छरस्स पज्जवसाणे अणंतरपच्छाकडे समये तंसमयं च णं चंदे केणं णक्खत्तेणं जोएति ?, ता उत्तराहिं आसाढाहिं, उत्तराणं आसाढाणं छव्वीसं मुहुत्ता छव्वीसं च बावट्ठिभागा मुहुत्तस्स बावट्ठिभागं च सत्तट्ठिधा छित्ता चउप्पण्णं चुण्णिया भागा सेसा, तंसमयं च णं सूरे केणं णक्खत्तेणं जोएति ?, ता पुणव्वसुणा, पुणव्वसुस्स सोलस मुहुत्ता अट्ठ य बावट्ठिभागा मुहुत्तस्स बावट्ठिभागं च सत्तट्ठिधा छेत्ता वीसं चुण्णिया भागा सेसा, ता एएसिं णं पंचणहं संवच्छराणं दोच्चस्स चंदसंवच्छरस्स के आदी आहि० ?, ता जे णं पढमस्स चंदसंवच्छरस्स पज्जवसाणे से णं दोच्चस्स णं चंदसंवच्छरस्स आदी अणंतरपुरक्खडे समये, ता से णं किंपज्जवसिते आहि० ?, ता जे णं तच्चस्स अभिवड्ढितसंवच्छरस्स आदी से णं दोच्चस्स चंदसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं णक्खत्तेणं जोएति ?, ता पुव्वाहिं आसाढाहिं, पुव्वाणं आसाढाणं सत्त मुहुत्ता तेवण्णं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता इगतालीसं चुण्णिया भागा सेसा, तंसमयं च णं सूरे केणं णक्खत्तेणं जोएति ?, ता पुणव्वसुणा, पुणव्वसुस्स णं बायालीसं मुहुत्ता पणतीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता सत्त चुण्णिया भागा सेसा, ता एतेसिं णं पंचणहं संवच्छराणं तच्चस्स अभिवड्ढितसंवच्छरस्स के आदी आहि० ?, ता जे णं दोच्चस्स चंदसंवच्छरस्स पज्जवसाणे से णं तच्चस्स अभिवड्ढितसंवच्छरस्स आदी अणंतरपुरक्खडे समए. ता से णं किंपज्जवसिते आहि० ?, ता जे णं चउत्थस्स चंदसंवच्छरस्स आदी से णं तच्चस्स अभिवड्ढितसंवच्छरस्स पज्जवसाणे अणंतरपच्छाकडे समए, तंसमयं च णं चंदे केणं णक्खत्तेणं जोएति ?. ता उत्तराहिं आसाढाहिं, उत्तराणं आसाढाणं तेरस मुहुत्ता तेरस य बावट्ठिभागा मुहुत्तस्स बावट्ठिभागं च सत्तट्ठिधा छेत्ता सत्तावीसं चुण्णिया भागा सेसा, तंसमयं च णं सूरे केणं णक्खत्तेणं जोएति ?, ता पुणव्वसुणा, पुणव्वसुस्स दो मुहुत्ता छप्पण्णं बावट्ठिभागा मुहुत्तस्स बावट्ठिभागं च सत्तट्ठिधा छेत्ता सट्ठी चुण्णिया भागा सेसा, ता एएसिं णं पंचणहं संवच्छराणं चउत्थस्स चंदसंवच्छरस्स के आदी आहि० ?, ता जे णं तच्चस्स अभिवड्ढितसंवच्छरस्स पज्जवसाणे से णं चउत्थस्स चंदसंवच्छरस्स आदी अणंतरपुरक्खडे समये, ता से णं किंपज्जवसिते आहि० ?, ता जे णं चरिमस्स अभिवड्ढितसंवच्छरस्स आदी से णं चउत्थस्स चंदसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं णक्खत्तेणं जोएति ? ता उत्तराहिं आसाढाहिं उत्तराणं आसाढाणं चत्तालीसं मुहुत्ता चत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता चउदस चुण्णिया भागा सेसा, तंसमयं च णं सूरे केणं णक्खत्तेणं जोएति ?. ता पुणव्वसुणा, पुणव्वसुस्स अउणतीसं मुहुत्ता एकवीसं बावट्ठिभागा मुहुत्तस्स बावट्ठिभागं च सत्तट्ठिधा छेत्ता सीतालीसं चुण्णिया भागा सेसा, ता एतेसिं णं पंचणहं संवच्छराणं पंचमस्स अभिवड्ढितसंवच्छरस्स के आदी आहि० ?, ता जे णं चउत्थस्स चंदसंवच्छरस्स पज्जवसाणे से णं पंचमस्स अभिवड्ढितसंवच्छरस्स आदी अणंतरपुरक्खडे समये, ता से णं किंपज्जवसिते आहि० ?, ता जे णं पढमस्स चंदसंवच्छरस्स आदी से णं पंचमस्स अभिवड्ढितसंवच्छरस्स पज्जवसाणे अणंतरपच्छाकडे समये, तंसमयं च णं चंदे केणं णक्खत्तेणं जोएति ?. ता उत्तराहिं आसाढाहिं, उत्तराणं आसाढाणं चरमसमए, तंसमयं च णं सूरे केणं णक्खत्तेणं जोएति ?. ता पुस्सेणं, पुस्सस्स णं एकवीसं मुहुत्ता तेतालीसं च बावट्ठिभागा मुहुत्तस्स बावट्ठिभागं सत्तट्ठिधा छेत्ता तेत्तीसं चुण्णिया भागा सेसा ☆☆☆ ।७१॥ एकारसमं पाहुंडं ११ ॥ ☆☆☆ ता कति णं संवच्छरा आहि० ?, तत्थ खलु इमे पंच संवच्छरा पं० तं०-णक्खत्ते चंदे उडू आदिच्चे अभिवड्ढिते, ता एतेसिं णं पंचणहं संवच्छराणं पढमस्स नक्खत्तसं वच्छरस्स णक्खत्तमासे तीसतिमुहुत्तेणं

२ अहोरत्तेणं गणिज्जमाणे केवतिए राइंदियग्गेणं आहि० ?, ता सत्तावीसं राइंदियाइं एक्कवीसं च सत्तट्ठिभागा राइंदियस्स राइंदियग्गेणं आहि०, ता से णं केवतिए मुहुत्तग्गेणं आहि० ?, ता अट्ठसए एकूणवीसे मुहुत्ताणं सत्तावीसं च सत्तट्ठिभागे मुहुत्तस्स मुहुत्तग्गेणं आहि०, ता एसिं णं अब्बा दुवालसखुत्तकडा णक्खत्ते संवच्छरे, ता से णं केवतिए राइंदियग्गेणं आहि० ?, ता तिण्णि सत्तावीसे राइंदियसते एक्कावन्नं च सत्तट्ठिभागे राइंदियस्स राइंदियग्गेणं आहि०, ता से णं केवतिए मुहुत्तग्गेणं आहि० ?, ता णव मुहुत्तसहस्सा अट्ठ य बत्तीसे मुहुत्तसए छप्पन्नं च सत्तट्ठिभागे मुहुत्तस्स मुहुत्तग्गेणं आहि०, ता एसिं णं पंचण्हं संवच्छराणं दोच्चस्स चंदसंवच्छरस्स चंदे मासे तीसतिमुहुत्तेणं २ अहोरत्तेणं गणिज्जमाणे केवतिए राइंदियग्गेणं आहि० ?, ता एगूणतीसं राइंदियाइं बत्तीसं बावट्ठिभागा राइंदियस्स राइंदियग्गेणं आहितेति वदेज्जा, ता से णं केवतिए मुहुत्तग्गेणं आहि० ?, ता अट्ठपंचासीते मुहुत्तसए तीसं च बावट्ठिभागे मुहुत्तग्गेणं आहि०, ता एस णं अब्बा दुवालसखुत्तकडा चंदे संवच्छरे, ता से णं केवतिए राइंदियग्गेणं आहि० ?, ता तिन्नि चउप्पन्ने राइंदियसते दुवालस य बावट्ठिभागा राइंदियग्गेणं आहि०, ता से णं केवतिए मुहुत्तग्गेणं आहि० ?, ता दस मुहुत्तसहस्साइं छच्च पणुवीसे मुहुत्तसए पण्णासं च बावट्ठिभागे मुहुत्तग्गेणं आहि०, ता एसिं णं पंचण्हं संवच्छराणं तच्चस्स उडुसंवच्छरस्स उडुमासे तीसतिसमुहुत्तेणं गणिज्जमाणे केवतिए राइंदियग्गेणं आहि० ?, ता तीसं राइंदियाणं राइंदियग्गेणं आहि०, ता से णं केवतिए मुहुत्तग्गेणं पुच्छा, ता णव मुहुत्तसताइं मुहुत्तग्गेणं आहि०, ता एस णं अब्बा दुवालसखुत्तकडा उडुसंवच्छरे, ता से णं केवतिए राइंदियग्गेणं आहि० ?, ता तिण्णि सट्ठे राइंदियसते राइंदियग्गेणं आहि०, ता से णं केवतिए मुहुत्तग्गेणं आहि०, ता दस मुहुत्तसहस्साइं अट्ठ य सयाइं मुहुत्तग्गेणं आहि०, ता एसिं णं पंचण्हं संवच्छराणं चउत्थस्स आदिच्चसंवच्छरस्स आइच्चे मासे तीसतिमुहुत्तेणं अहोरत्तेणं गणिज्जमाणे केवतिए राइंदियग्गेणं आहि० ?, ता तीसं राइंदियाइं अवद्धभागं च राइंदियस्स राइंदियग्गेणं, ता से णं केवतिए मुहुत्तग्गेणं पुच्छा, ता णव पण्णरस मुहुत्तसए मुहुत्तग्गेणं आहि०, ता एस णं अब्बा दुवालसखुत्तकडा आदिच्चे संवच्छरे, ता से णं केवतिए राइंदिय० पुच्छा, ता तिन्नि छावट्ठे राइंदियसए राइंदियग्गेणं आहि०, ता से णं केवतिए मुहुत्तग्गेणं पुच्छा, ता दस मुहुत्तसहस्साइं णव असीते मुहुत्तसते मुहुत्त०, ता एसिं णं पंचण्हं संवच्छराणं पंचमस्स अभिवट्ठियसंवच्छरस्स अभिवट्ठिते मासे तीसतिमुहुत्तेणं अहोरत्तेणं गणिज्जमाणे केवतिए राइंदियग्गेणं पुच्छा, ता एक्कतीसं राइंदियाइं एगूणतीसं च मुहुत्ता सत्तरस य बावट्ठिभागे मुहुत्तस्स राइंदियग्गेणं आहि०, ता सेणं केवतिए मुहुत्त० पुच्छा, ता णव एगूणसट्ठे मुहुत्तसते सत्तरस य बावट्ठिभागे मुहुत्तस्स मुहुत्तग्गेणं आहि०, ता एस णं अब्बा दुवालसखुत्तकडा अभिवट्ठितसंवच्छरे, ता से णं केवतिए राइंदियग्गेणं पुच्छा, तिण्णि तेसीते राइंदियसते एक्कवीसं च मुहुत्ता अट्ठारस बावट्ठिभागा मुहुत्तस्स राइंदियग्गेणं आहि०, ता से णं केवतिए मुहुत्तग्गेणं पुच्छा, ता एक्कारस मुहुत्तसहस्साइं पंच य एक्कारस मुहुत्तसते अट्ठारस बावट्ठिभागा मुहुत्तस्स मुहुत्तग्गेणं आहि० । ७२। ता केवतियं ते नोजुगे राइंदियग्गेणं आहि० ?, ता सत्तरस एक्काणउते राइंदियसते एगूणवीसं च सत्तावण्णे बावट्ठिभागा मुहुत्तस्स बावट्ठिभागं च सत्तट्ठिधा छेत्ता पणपण्णं चुण्णिया भागा राइंदियग्गेणं आहि०, ता से णं केवतिए मुहुत्तग्गेणं आहि० ?, ता तेपण्णं मुहुत्तसहस्साइं सत्त य अउणापन्ने मुहुत्तसते सत्तावण्णं बावट्ठिभागा मुहुत्तस्स बावट्ठिभागं च सत्तट्ठिधा छेत्ता पणपण्णं चुण्णिया भागा मुहुत्तग्गेणं आहि०, ता केवतिए णं ते जुगप्पत्ते राइंदियग्गेणं आहि० ?, ता अट्ठतीसं राइंदियाइं दस य मुहुत्ता चत्तारि य बावट्ठिभागा मुहुत्तस्स बावट्ठिभागं च सत्तट्ठिधा छेत्ता दुवालस चुण्णिया भागा राइंदियग्गेणं आहि०, ता से णं केवतिए मुहुत्तग्गेणं आहि० ?, ता एक्कारस पण्णासे मुहुत्तसए चत्तारि य बावट्ठिभागा बावट्ठिभागं च सत्तट्ठिधा छेत्ता दुवालस चुण्णिया भागा मुहुत्तग्गेणं आहि०, ता केवतियं जुगे राइंदियग्गेणं आहि० ? ता अट्ठारसतीसे राइंदियसते राइंदियग्गेणं आहि०, ता से णं केवतिए मुहुत्तग्गेणं आहि० ?, ता चउप्पणं मुहुत्तसहस्साइं णव य मुहुत्तसताइं मुहुत्तग्गेणं आहि०, ता से णं केवतिए बावट्ठिभागमुहुत्तग्गेणं आहि० ?, ता चउत्तीसं सतसहस्साइं अट्ठतीसं च बावट्ठिभागमुहुत्तसते मुहुत्तग्गेणं आहि० । ७३। ता कता णं एते आदिच्चचंदसंवच्छरा समादीया समपज्जवसिया आहि० ?, ता सट्ठिं एए आदिच्चा मासा बावट्ठी एते चंदा मासा एस णं अब्बा छखुत्तकडा दुवालसभयिता तीसं एते आदिच्चसंवच्छरा एक्कतीसं एते चंदसंवच्छरा, तता णं एते आदिच्चचंदसंवच्छरा समादीया

समपज्जवसिया आहि०, ता कता णं एते आदिच्चउडुचंदणक्खत्ता संवच्छरा समादीया समपज्जवसिया आहि० ?, ता सट्ठी एते आदिच्चा मासा एगट्ठी एते उडू मासाण्स बावट्ठी एते चंदमासा सत्तट्ठी एते नक्खत्ता मासा णं अब्बा दुवालसखुत्तकडा दुवालसभयिता सट्ठी एते आदिच्चा संवच्छरा एगट्ठी एते उडुसंवच्छरा बावट्ठी एते चंदा संवच्छरा सत्तट्ठी एते नक्खत्ता संवच्छरा तता णं एते आदिच्चउडुचंदणक्खत्ता संवच्छरा समादीया समपज्जवसिया आहि०, ता कता णं एते अभिवट्ठिआदिच्चउडुचंदणक्खत्ता संवच्छरा समादीया समपज्जवसिता आहि० ?, ता सत्तावणं मासा सत्त य अहोरत्ता एक्कारस य मुहुत्ता तेवीसं बावट्ठिभागा मुहुत्तस्स एते णं अभिवट्ठिता मासा सट्ठी एते आदिच्चा मासा एगट्ठी एते उडू मासा बावट्ठी एते चंदा मासा सत्तट्ठी एते नक्खत्ता मासा एस णं अब्बा छप्पणसत्तखुत्तकडा दुवालसभयिता सत्त सता चोत्ताला एते णं अभिवट्ठिता संवच्छरा, सत्त सता असीता एते णं आदिच्चा संवच्छरा, सत्त सता तेणउता एते णं उडू संवच्छरा, अट्ठ सता छलुत्तरा एते णं चंदा संवच्छरा, एकसत्तरी अट्ठसया एणं नक्खत्ता संवच्छरा, तता णं एते अभिवट्ठितआदिच्चउडुचंदनक्खत्ता संवच्छरा समादीया समपज्जवसिया आहि०, ता णयट्ठताए णं चंदे संवच्छरे तिण्णि चउप्पण्णे राइंदियसते दुवालस य बावट्ठिभागे राइंदियस्स आहि०, ता अहातच्चेणं चंदे संवच्छरे तिण्णि चउप्पण्णे राइंदियसते पंच य मुहुत्ते पण्णासं च बावट्ठिभागे मुहुत्तस्स आहि० ।७४। तत्थ खलु इमे छ उडू पं० तं०- पाउसे वरिसारत्ते सरते हेमंते वसंते गिम्हे, ता सव्वेवि णं एते चंदउडू दुवे २ मासाति चउप्पण्णेणं २ आदाणेणं गणिज्जमाणा सातिरेगाइं एगूणसट्ठी २ राइंदियाइं राइंदियग्गेणं आहि०, तत्थ खलु इमे छ ओमरत्ता पं० तं०- ततिए पव्वे सत्तमे एक्कारसमे पन्नरसमे एगूणवीसतिमे तेवीसतिमे पव्वे, तत्थ खलू इमे छ अतिरत्ता पं० तं०- चउत्थे पव्वे अट्ठमे बारसमे सोलसमे वीसतिमे चउवीसतिमे पव्वे 'छच्चव य अइरत्ता आइच्चाओ हवंति जाणाइ । छच्चेव ओमरत्ता चंदाउ हवंति माणाहिं ॥३४॥७५। तत्थ खलु इमाओ पंच वासिक्कीओ पंच हेमंतीओ आउट्ठीओ पं०, ता एएसिं णं पंचण्हं संवच्छराणं पढमं वासिक्कीं आउट्ठिं चंदे केणं नक्खत्तेणं जोएति ?, ता अभीयिणा अभीयिस्स पढमसमएणं, तंसमयं च णं सूरे केणं णक्खत्तेणं जोएति ?, ता पूसेणं, पूसस्स एगूणवीसं मुहुत्ता तेत्तालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेत्तीसं चुण्णिया भागा सेसा, ता एएसिं पंचण्हं संवच्छराणं दोच्चं वासिक्किं आउट्ठिं चंदे केणं० ?, ता संठाणाहिं, संठाणाणं एक्कारस मुहुत्ता ऊतालीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता तेपणं चुण्णिया भागा सेसा, तंसमयं सूरे केणं पुच्छा, ता पूसेणं, पूसस्स णं तं चेव, ता एतेसिं णं पंचण्हं संवच्छराणं तच्चं वासिक्किं आउट्ठिं चंदे केणं पुच्छा, ता विसाहाहिं, विसाहाणं तेणं चेव अभिलावेणं तेरस चउप्पण्णा चत्तालीसं चुण्णिया, तंसमयं च णं सूरे केणं० ?, ता पूसेणं, पूसस्स तं चेव, ता एतेसिं णं पंचण्हं संवच्छराणं चउत्थं वासिक्किं आउट्ठिं चंदे केणं० ?, ता रेवतीहिं, रेवतीणं पणवीसं मुहुत्ता छत्तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छव्वीसं चुण्णिया भागा सेसा, तंसमयं च णं सूरे केणं० ?, ता पूसेणं, पूसस्स तं चेव, ता एएसिं णं पंचण्हं संवच्छराणं पंचमं वासिक्किं आउट्ठिं चंदे केणं० ?, ता पुव्वाहिं फग्गुणीहिं, पुव्वाफग्गुणीणं बारस सत्तालीसा तेरस चुण्णिया, तंसमयं च णं सूरे केणं० ?, ता पूसेणं, पूसस्स तं चेव एगूणवीसा तेताली तेत्तीसा ।७६। ता एएसिं णं पंचण्हं संवच्छराणं पढमं हेमंतिं आउट्ठिं चंदे केणं णक्खत्तेणं जोएति ?, ता हत्थेणं, हत्थस्स णं पंच मुहुत्ता पण्णासं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता सट्ठी चुण्णिया भागा सेसा, तंसमयं च णं सूरे केणं० ?, उत्तराहिं आसाढाहिं, उत्तराणं आसाढाणं चरिमसमए, ता एएसिं णं पंचण्हं संवच्छराणं दोच्चं हेमंतिं आउट्ठिं चंदे केणं० ?, ता सतभिसयाहिं, सतभिसयाणं दुन्नि अट्ठावीसा छत्तालीसं चुण्णिया, तंसमयं च णं सूरे केणं० ?, ता उत्तराहिं आसाढाहिं, उत्तराणं आसाढाणं चरिमसमए, ता एतेसिं णं पंचण्हं संवच्छराणं तच्चं हेमंतिं आउट्ठिं चंदे केणं० ?, ता पूसेणं, पूसस्स एकूणवीसं तेताला तेत्तीसं चुण्णिया, तंसमयं च णं सूरे केणं० ?, ता उत्तराहिं आसाढाहिं, उत्तराणं आसाढाणं चरिमसमए, ता एतेसिं णं पंचण्हं संवच्छराणं चउत्थिं हेमंतिं आउट्ठिं चंदे केणं० ?, ता मूलेणं, मूलस्स छ चेव अट्ठावन्ना वीसं चुण्णिया, तंसमयं च णं सूरे केणं० ?, ता उत्तराहिं आसाढाहिं, उत्तराणं आसाढाणं चरिमसमए, ता एतेसिं णं पंचण्हं संवच्छराणं पंचमं हेमंतिं आउट्ठिं चंदे केणं० ?, कत्तियाहिं, कत्तियाणं अट्ठारस मुहुत्ता छत्तीसं च बावट्ठिभागा मुहुत्तस्स बावट्ठिभागं च सत्तट्ठिधा छेत्ता छ चुण्णिया भागा सेसा, तंसमयं च णं

सूरे० ?, ता उत्तराहिं आसाढाहिं, उत्तराणं आसाढाणं चरिमसमए ।७७। तत्थ खलु इमे दसविधे जोए पं० तं०- वसभाणुजोए वेणुयाणुजोते मंचे मंचाइमंचे छत्ते छत्तातिच्छत्ते जुअणद्धे घणसंमद्धे (घण) पीणिते मंडकप्पुत्ते णामं दसमे, एतेसिं णं पंचण्हं संवच्छराणं छत्तातिच्छत्तं जोयं चंदे कंसि देसंसि जोएति ?, ता जंबुद्वीवस्स पाईणपडीणायताए उदीणदाहिणायताए जीवाए मंडलं चउव्वीसेणं सतेणं छित्ता दाहिणपुरच्छिमिल्लंसि चउभागमंडलंसि सत्तावीसं भागे उवादिणावेत्ता अट्ठावीसतिभागं वीसधा छेत्ता अट्ठारसभागे उवादिणावेत्ता तीहिं भागेहिं दोहि य कलाहिं दाहिणपुरच्छिमिल्लं चउभागमंडलं असंपत्ते एत्थ णं से चंदे छत्तातिच्छत्तं जोयं जोएति, तं०- उप्पिं चंदा मज्झे णक्खत्ते हेट्ठा आदिच्चे, तंसमयं च णं चंदे केणं णक्खत्तेणं जोएति ?, ता चित्ताहिं, चित्ताणं चरिमसमए ☆☆☆ ।७८॥

बारसमं पाहुंड १२ ॥ ☆☆☆ ता कहं ते चंदमसो वट्ठोवट्ठी आहि० ?, ता अट्ठ पंचासीते मुहुत्तसते तीसं च बावट्ठिभागा मुहुत्तस्स, ता दोसिणाप क्खाओ अन्धगारपक्खमयमाणे चंदे चत्तारि बायालसते छत्तालीसं च बावट्ठिभागे मुहुत्तस्स जाइं चंदे रज्जति तं०- पढमाए पढमं भागं जाव पण्णरसीए पन्नरसं भागं, चरिमसमए चंदे रत्ते भवति अवसेसे समए चंदे रत्ते य विरत्ते य भवति, इयण्णं अमावासा, एत्थ णं पढमे पव्वे अमावासे, ता अंधारपक्खातो णं दोसिणापक्खं अयमाणे चंदे चत्तारि बायाले मुहुत्तसते छत्तालीसं च बावट्ठिभागा मुहुत्तस्स जाइं चंदे विरज्जति, तं०- पढमाए पढमं जाव पण्णरसीए पण्णरसमं भागं, चरिमे समये चंदे विरत्ते भवति अवसेससमए चंदे रत्ते य विरत्ते य भवति, इयण्णं पुण्णमासिणी, एत्थ णं दोच्चे पव्वे पुण्णमासिणी ।७९। तत्थ खलु इमाओ बावट्ठी पुण्णमासिणीओ बावट्ठी अमावासाओ पं०, बावट्ठी एते कसिणा रागा बावट्ठी एते कसिणा विरागा, एते चउव्वीसे पव्वसते एते चउव्वीसे कसिणरागविरागसते, जावतियाणं पंचण्हं संवच्छराणं समया एगेणं चउव्वीसेणं समयसतेणूणका एवतिया परित्ता असंखेज्जा देसराग विरागसता भवन्तीतिमक्खाता, ता अमावासातो णं पुण्णमासिणी चत्तारि बाताले मुहुत्तसते छत्तालीसं बावट्ठिभागे मुहुत्तस्स आहि०, ता पुण्णमासिणीतो णं अमावासा चत्तारि बायाले मुहुत्तसते छत्तालीसं बावट्ठिभागे मुहुत्तस्स आहि०, ता अमावासातो णं अमावासा अट्ठपंचासीते मुहुत्तसते तीसं च बावट्ठिभागे मुहुत्तस्स आहि०, ता पुण्णमासिकतो णं पुण्णमासिणी अट्ठपंचासीते मुहुत्तसते तीसं बावट्ठिभागे मुहुत्तस्स आहि०, एस णं एवतिए चंदे मासे एस णं एवतिए सगले जुगे ।८०। ता चंदेणं अब्बमासेणं चंदे कति मंडलाइं चरति ?, ता चोदस चउभागमंडलाइं चरति एणं च चउवीससतभागं मंडलस्स, ता आइच्चेणं अब्बमासेणं चंदे कति मंडलाइं चरति ?, ता सोलस मंडलाइं चरति, सोलसमंडलचारी तदा अवराइं खलु दुवे अट्ठकाइं जाइं चंदे केणइ असामण्णकाइं सयमेव पविट्ठित्ता २ चारं चरति, कतराइं खलु दुवे अट्ठकाइं जाइं चंदे जाव पविट्ठित्ता २ चारं चरति ?, इमाइं खलु ते दुवे अट्ठगाइं जाव चरति तं०- निक्खममाणे चेव अमावासंतेणं पविसमाणे चेव पुण्णमासिंतेणं, एताइं जाव चरइ, ता पढमायणगते चंदे दाहिणाते भागाते पविसमाणे सत्त अब्बमंडलाइं जाइं चंदे दाहिणाते जाव चरति, कतराइं खलु ताइं सत्त अब्बमंडलाइं जाव चरति ?, इमाइं खलु ताइं सत्त अब्बमंडलाइं जाइं जाव चरति ?, तं०- बिदिए अब्बमंडले चउत्थे छट्ठे अट्ठमे दसमे बारसे चउदसमे अब्बमंडले, एताइं खलु ताइं सत्त अब्बमंडलाइं जाव पविसमाणे चारं चरति, ता पढमायणगते चंदे उत्तराते भागाते पविसमाणे छ अब्बमंडलाइं तेरस य सत्तट्ठिभागाइं अब्बमंडलस्स जाइं चंदे उरत्ताते भागाए पविसमाणे चारं चरति, कतराइं खलु ताइं छ अब्बमंडलाइं जाव चारं चरति ?, इमाइं खलु ताइं छ अब्बमंडलाइं० तं०- तईए पंचमे सत्तमे नवमे एक्कारसमे तेरसमे अब्बमंडले पन्नरसममंडलस्स तेरस सत्तट्ठिभागाइं, एताइं खलु ताइं छ अब्बमंडलाइं तेरस य सत्तट्ठिभागाइं अब्बमंडलस्स जाइं चंदे उत्तराते भागाते पविसमाणे चारं चरति, एतावया च पढमे चंदायणे समत्ते भवति, ता णक्खत्ते अब्बमासे नो चंदे अब्बमासे चंदे अब्बमासे नो णक्खत्ते अब्बमासे, ता नक्खत्ताओ अब्बमासानो ते चंदे चंदेणं अब्बमासेणं किमधियं चरति ?, एणं अब्बमंडलं चत्तारि य सत्तट्ठिभागाइं अब्बमंडलस्स सत्तट्ठिभागं च एक्कतीसाए छेत्ता णव भागाइं, ता दोच्चायणगते चंदे पुरच्छिमाते भागाते णिक्खममाणे सत्त चउप्पण्णाइं जाइं चंदे परस्स चिन्नाइं पडिचरति सत्त तेरसकाइं जाइं चंदे अप्पणा चिण्णाइं चरति, ता दोच्चायणगते चंदे पच्चत्थिमाए भागाए निक्खममाणे छ

चउप्पण्णां जाइं चंदे परस्स चिण्णां पडिचरति छ तेरसगाइं जाइं चंदे अप्पणा चिण्णां पडिचरति अवरगाइं खलु दुवे तेरसगाइं जाइं चंदे केणइ असामन्नगाइं सयमेव पविट्ठित्ता २ चारं चरति, कतरां खलु ताइं दुवे जाव चरति ?, इमाइं खलु ताइं दुवे० तं०- सव्वब्भंतरे चेव मंडले सव्वबाहिरे चेव मंडले, एयाणि खलु ताणि दुवे जाव चरइ, एतावता दोच्चे चंदायणे समत्ते भवति, ता णक्खत्ते मासे नो चंदे मासे चंदे मासे णो णक्खत्ते मासे, ता णक्खत्ताते मासाए चंदे चंदेणं मासेणं किमधियं चरति ?, ता दो अद्धमंडलाइं चरति अट्ट य सत्तट्ठिभागाइं अद्धमंडलस्स सत्तट्ठिभागं च एकतीसधा छेत्ता अट्टारस भागाइं, ता तच्चायणगते चंदे पच्चत्थिमाते भागाए पविसमाणे बाहिराणंतरस्स पच्चत्थिमिल्लस्स अद्धमंडलस्स ईतालीसं सत्तट्ठिभागाइं जाइं चंदे अप्पणो परस्स य चिण्णां पडिचरति तेरस सत्तट्ठिभागाइं जाइं चंदे परस्स चिण्णां पडिचरति तेरस सत्तट्ठिभागाइं चंदे अप्पणो परस्स च चिण्णां पडिचरति, एतावयाव बाहिराणंतरे पच्चत्थिमिल्ले अद्धमंडले समत्ते भवति, तच्चायणगते चंदे पुरच्छिमाए भागाए पविसमाणे बाहिरतच्चस्स पुरच्छिमिल्लस्स अद्धमंडलस्स ईतालीसं सत्तट्ठिभागाइं जाइं चंदे अप्पणो परस्स य चिण्णां पडियरति तेरस सत्तट्ठिभागाइं जाइं चंदे परस्स चिण्णां पडिचरति तेरस सत्तट्ठिभागाइं जाइं चंदे अप्पणो परस्स य चिण्णां पडियरति, एतावताव बाहिरे तच्चे पुरच्छिमिल्ले अद्धमंडले समत्ते भवति, ता तच्चायणगते चंदे पच्चत्थिमाते भागाते पविसमाणे बाहिरचउत्थस्स पच्चत्थिमिल्लस्स अद्धमंडलस्स अट्ट सत्तट्ठिभागाइं सत्तट्ठिभागं च एकतीसधा छेत्ता अट्टारस भागाइं जाइं चंदे अप्पणो परस्स य चिण्णां पडियरति, एतावताव बाहिरचउत्थपच्चत्थिमिल्ले अद्धमंडले समत्ते भवइ, एवं खलु एवं चंदेणं मासेणं चंदे तेरस चउप्पण्णां जाइं चंदे परस्स चिण्णां पडिचरति, तेरस तेरसगाइं जाइं चंदे अप्पणो चिण्णां पडियरति, दुवे ईतालीसगाइं दुवे तेरसगाइं अट्ट सत्तट्ठिभागाइं सत्तट्ठिभागं च एकतीसधा छेत्ता अट्टारसभागाइं जाइं चंदे अप्पणो परस्स य चिण्णां पडिचरति, अवराइं खलु दुवे तेरसगाइं जाइं चंदे केणइ असा मन्नगाइं सयमेव पविट्ठित्ता २ चारं चरति, इच्चेसो चंदमासोऽभिगमणिक्खमणवुट्ठिअणवट्ठितसंठाणसंठितीविउव्वणगिट्ठिपत्ते रूवी चंदे देवे २ आहि० **☆☆☆।८१॥ तेरसमं पाहुडं १३ ॥☆☆☆** ता कता ते दोसिणा बहू आहि० ?, ता दोसिणापक्खे णं दोसिणा बहू आहि०, ता कहां दोसिणापक्खे दोसिणा बहू आहि० ?, ता अंधकारपक्खाओ णं दोसिणा बहू आहि०, ता कहां ते अंधयारपक्खातो दोसिणापक्खे दोसिणा बहू आहि० ?, ता अंधकारपक्खातो णं दोसिणापक्खं अयमाणे चंदे चत्तारि बायाले मुहुत्तसते छातालीसं च बावट्ठिभागे मुहुत्तस्स जाइं चंदे विरज्जति, तं०- पढमाए पढमं भागं जाव पण्णरसीए पण्णरसं भागं, एवं खलु अंधकारपक्खातो दोसिणापक्खे दोसिणा बहू आहि०, ता केवतिया णं दोसिणापक्खे दोसिणा बहू आहि० ?, ता परित्ता असंखेज्जा भागा, ता कता ते अंधकारे बहू आहि० ?, ता अंधयारपक्खे णं बहू अंधकारे आहि०, ता कहां अंधकारपक्खे अंधकारे बहू आहि० ?, ता दोसिणापक्खातो अंधकारपक्खे अंधकारे बहू आहि०, ता कहां ते दोसिणापक्खातो अंधकारपक्खे अंधकारे बहू आहि० ?, ता दोसिणापक्खातो णं अंधकारपक्खं अयमाणे चंदे चत्तारि बाताले मुहुत्तसते छायालीसं च बावट्ठिभागे मुहुत्तस्स जाइं चंदे रज्जति, तं०- पढमाए पढमं भागं जाव पण्णरसीए पण्णरसमं भागं, एवं खलु दोसिणापक्खातो अंधकारपक्खे अंधकारे बहू आहि०, ता केवतिए णं अंधकारपक्खे अंधकारे बहू आहि० ?, परित्ता असंखेज्जा भागा **☆☆☆।८२॥ चोदसमं पाहुडं १४ ॥☆☆☆** ता कहां ते सिग्घगती वत्थू आहि०, ता एतेसिं णं चंदिमसूरियगहनक्खत्ततारारूवाणं चंदेहिंतो सूरा सिग्घगती सूरैहिंतो गहा० गहेहिंतो णक्खत्ता० णक्खत्तेहिंतो तारा० सव्वप्पगती चंदा सव्वसिग्घगती तारा, ता एगमेगेणं मुहुत्तेणं चंदे केवतियाइं भागसत्ताइं गच्छति ?, ता जं जं मंडलं उवसंकमित्ता चारं चरति तस्स २ मंडलपरिक्खेवस्स सत्तरस अडसट्ठिं भागसते गच्छति मंडलं सतसहस्सेणं अट्टाणउतीसतेहिं छेत्ता, ता एगमेगेणं मुहुत्तेणं सूरिए केवतियाइं भागसयाइं गच्छति ?, ता जं जं मंडलं उवसंकमित्ता चारं चरति तस्स २ मंडलपरिक्खेवस्स अट्टारस तीसे भागसते गच्छति मंडलं सतसहस्सेणं अट्टाणउतीसतेहिं छेत्ता, ता एगमेगेणं मुहुत्तेणं णक्खत्ते केवतियाइं भागसताइं गच्छति ?, ता जं जं मंडलं उवसंकमित्ता चारं चरति तस्स २ मंडलपरिक्खेवस्स अट्टारस पणतीसे भागसते

गच्छति मंडलं सतसहस्सेणं अट्टाणउतीसतेहिं छेत्ता ।८३। ता जया णं चंदं गतिसमावणं सूरं गतिसमावणे भवति से णं गतिमाताए केवतियं विसेसेति ?, बावट्टिभागे विसेसेति, ता जया णं चंदं गतिसमावणं णक्खत्ते गतिसमावणे भवइ से णं गतिमाताए केवतियं विसेसेइ ?, ता सत्तट्टि भागे विसेसेति, ता जता णं सूरं गतिसमावणं णक्खत्ते गतिसमावणे भवति से णं गतिमाताए केवतियं विसेसेति ?, ता पंच भागे विसेसेति, ता जता णं चंदं गतिसमावणं अभीयीणक्खत्ते णं गतिसमावणे पुरच्छिमाते भागाते समासादेति ता णव मुहुत्ते सत्तावीसं च सत्तट्टिभागे मुहुत्तस्स चंदेण सद्धिं जाव जोएति ता जोयं अणुपरियट्ठति ता विप्पजहाति ता विगतजोई यावि भवति, ता जता णं चंदं गतिसमावणं सवणे णक्खत्ते गतिसमावणे पुरच्छिमाते तहेव जहा अभियिस्स नवरं तीसं मुहुत्ते चंदेण सद्धिं जोअं जोएति ता विगतजोई यावि भवइ, एवं पण्णरसमुहुत्ताइं तीसतिमुहुत्ताइं पणयालीसमुहुत्ताइं भाणितव्वाइं जाव उत्तरासाढा (सूर्य० ता जता णं चंदं गतिसमावणं गहे गतिसमावणे पुरच्छिमाते भागाते समासादेति ता चंदेणं सद्धिं जोगं जुंजति ता जोगं अणुपरियट्ठति ता विप्पजहति विगतजोई यावि भवति) ता जया णं सूरं गतिसमावणं अभीयीणक्खत्ते गतिसमावणे पुरच्छिमाते भागाते समासादेति ता चत्तारि अहोरत्ते छच्च मुहुत्ते सूरं सद्धिं जोयं जोएति ता जाव विगतजोगी यावि भवति, एवं सूरं सद्धिं जोगो भाणियव्वो जाव उत्तरासाढाणक्खत्ते विगतजोगी यावि भवति (सूर्य० ता जता णं सूरं गतिसमावणं गहे गतिसमावणे पुरच्छिमाते भागाते समासादेति ता सूरं सद्धिं यथाजोयं जुंजति ता यथाजोयं अणुपरियट्ठति ता जाव विप्पजहति ता विगतजोगी यावि भवति) ।८४। ता णक्खत्तेणं मासेणं चंदे कति मंडलाइं चरति ?, ता तेरस मंडलाइं चरति तेरस य सत्तट्टिभागे मंडलस्स, ता णक्खत्तेणं मासेणं सूरं पुच्छा, तेरस मंडलाइं चरति चोत्तालीसं च सत्तट्टिभागे मंडलस्स, ता णक्खत्तेणं मासेणं णक्खत्ते० ?, ता तेरस मंडलाइं चरति अब्बसीतालीसं च सत्तट्टिभागे मंडलस्स, ता चंदेणं मासेणं चंदे कति मंडलाइं चरति ?, चोदस चउभागाइं मंडलाइं चरति एणं च चउव्वीससतं भागं मंडलस्स, ता चंदेणं मासेणं सूरं कति पुच्छा, ता पण्णरस चउभागाइं मंडलाइं चरति एणं च चउवीससतभागे मंडलस्स, ता चंदेणं मासेणं णक्खत्ते कति पुच्छा, ता पण्णरस चउभागाइं मंडलाइं चरति छच्च चउवीससतभागे मंडलस्स, ता उडुणा मासेणं चंदे कति पुच्छा, ता चोदस मंडलाइं चरति तीसं च एगट्टिभागे मंडलस्स, ता उडुणा मासेणं सूरं कति पुच्छा, ता पण्णरस मंडलाइं चरति, ता उडुणा मासेणं णक्खत्ते कति पुच्छा, ता पण्णरस मंडलाइं चरति पंच य बावीससतभागे मंडलस्स, ता आदिच्चेणं मासेणं चंदे कति मंडलाइं चरति ?, ता चोदस मंडलाइं चरति एक्कारस य पन्नरसभागे मंडलस्स, ता आदिच्चेणं मासेणं सूरं कति पुच्छा, ता पण्णरस चउभागाहिगाइं मंडलाइं चरति, ता आदिच्चेणं मासेणं णक्खत्ते कति पुच्छा, ता पण्णरस चउभागाहिगाइं मंडलाइं चरति पंचतीसं च वीससतभागमंडलाइं चरति, ता अभिवट्ठिणं मासेणं चंदे कति मंडलाइं चरति ?, ता पण्णरस मंडलाइं तेसीतिं छलसीयसतभागे मंडलस्स, ता अभिवट्ठितेणं मासेणं सूरं पुच्छा, ता सोलस मंडलाइं चरति तीहिं भागेहिं ऊणगाइं दोहिं अडयालेहिं सएहिं मंडलं छित्ता, अभिवट्ठितेणं मासेणं नक्खत्ते कति मंडलाइं चरति ?, ता सोलस मंडलाइं चरति सीतालीसाए भागेहिं अहियाइं चोदसहिं अट्टासीएहिं सएहिं मंडलं छेत्ता ।८५। ता एगमेगेणं अहोरत्तेणं चंदे कति मंडलाइं चरति ?, ता एणं अब्बमंडलं चरति एक्कतीसाए भागेहिं ऊणं णवहिं पण्णरसेहिं सएहिं अब्बमंडलं छेत्ता, ता एगमेगेणं अहोरत्तेणं सूरिणं कति मंडलाइं चरति ?, ता एणं अब्बमंडलं चरति, ता एगमेगेणं अहोरत्तेणं णक्खत्ते कति मंडलाइं चरति ?, एणं अब्बमंडलं चरति दोहिं भागेहिं अधियं सत्तहिं बत्तीसेहिं सएहिं अब्बमंडलं छेत्ता, ता एगमेगं मंडलं चंदे कतिहिं अहोरत्तेहिं चरति ?, ता दोहिं अहोरत्तेहिं चरति एक्कतीसाए भागेहिं अधितेहिं चउहिं बायालेहिं सतेहिं राइंदियं छेत्ता, ता एगमेगं मंडलं सूरं कतिहिं अहोरत्तेहिं चरति ?, ता दोहिं अहोरत्तेहिं चरति, ता एगमेगं मंडलं णक्खत्ते कतिहिं अहोरत्तेहिं चरति ?, ता दोहिं अहोरत्तेहिं चरति दोहिं भागेहिं ऊणेहिं तिहिं सत्तसट्ठेहिं सतेहिं राइंदिएहिं छेत्ता, ता जुगेणं चंदे कति मंडलाइं चरति ?, ता अट्ट चुलसीते मंडलसते चरति, ता जुगेणं सूरं कति मंडलाइं चरति ?, णवपण्णरसमंडलसते चरति, ता जुगेणं णक्खत्ते कति मंडलाइं चरति ?, ता अट्टारसपणतीसे दुभागमंडलसते चरति, इच्चेसा मुहुत्तगती

रिक्खातिमासराइंदियजुगमंडलपविभत्ती सिग्घगती वत्थु आहि० ★★★★★ ॥ ८६॥ पन्नरसमं पाहुडं १५ ॥ ★★★★★ ता कहं ते दोसिणालक्खणे आहि० ?, चंदलेसादी य दोसिणादी य दोसिणाई य चंदलेसादी य के अट्टे किंलक्खणे ?, ता एकट्टे एगलक्खणे, ता सूरलेस्सादी य आयवेइ य आतवेति य सूरलेस्सादी य के अट्टे किंलक्खणे ?, ता एगट्टे एगलक्खणे, ता अंधकारेति य छायाइ य छायाति य अंधकारेति य के अट्टे किंलक्खणे ?, ता एगट्टे एगलक्खणे ★★★★★ ॥ ८७॥ सोलसमं पाहुडं १६ ॥ ★★★★★ ता कहं ते चयणोववाता आहि० ?, तत्थ खलु इमाओ पणवीसं पडिवत्तीओ पं०, तत्थ एगे एव०-ता अणुसमयमेव चंदिमसूरिया अण्णे चयंति अण्णे उववज्जंति, एवं जच्चेवोयाए संठितीए पणुवीसं पडिवत्तीओ तातो एत्थंपि भाणितव्वाओ जाव ता अणुओसप्पिणीउस्सप्पिणीमेव चंदिमसूरिया अण्णे चयंति अण्णे उववज्जंति एगे एव०, वयं पुण एवं वदामो-ता चंदिमसूरिया णं देवा महिइढीआ महाजुतीया महाबला महाजसा महासोक्खा महाणुभावा वरवत्थधरा वरमल्लधरा वरगन्धधरा वराभरणधरा अव्वोच्छित्तिणयट्ठताए (काले) अण्णे चयंति अण्णे उववज्जंति आहि० ★★★★★ ॥ ८८॥ सत्तरसमं पाहुडं १७ ॥ ★★★★★ ता कहं ते उच्चत्ते आहि० ?, तत्थ खलु इमाओ पणवीसं पडिवत्तीओ पं०, तत्थेगे एव०-ता एगं जोयणसहस्सं सूरु उट्ठं उच्चत्तेणं दिवइढं चंदे एगे एव०, एगे पुण०-ता दो जोयणसहस्साइं सूरु उट्ठं उच्चत्तेणं अइढातिज्जाइं चंदे एगे एव०, एवं एतेणं अभिलावेणं ता तिन्नि जोयणसहस्साइं सूरु अब्बुट्ठाइं चंदे चत्तारि जोयणसहस्साइं सूरु अब्बपंचमाइं चंदे पंच जोयणसहस्साइं सूरु अब्बच्छट्ठाइं चंदे एवं छ सूरु अब्बसत्तमाइं चंदे सत्त सूरु अब्बट्ठमाइं चंदे अट्ठ सूरु अब्बनवमाइं चंदे नव सूरु अब्बदसमाइं चंदे दस सूरु अब्बएक्कारस चंदे एक्कारस सूरु अब्बबारस चंदे बारस सूरु अब्बतेरस चंदे तेरस सूरु अब्बचोदस चंदे चोदस सूरु अब्बपण्णरस चंदे पण्णरस सूरु अब्बसोलस चंदे सोलस सूरु अब्बसत्तरस चंदे सत्तरस सूरु अब्बअट्ठारस चंदे अट्ठारस सूरु अब्बएकूणवीसं चंदे एकोणवीसं सूरु अब्बवीसं चंदे वीसं सूरु अब्बएक्कवीसं चंदे एक्कवीसं सूरु अब्बबावीसं चंदे बावीसं सूरु अब्बतेवीसं चंदे तेवीसं सूरु अब्बचउवीसं चंदे चउवीसं सूरु अब्बपणवीसं चंदे एगे एव०, एगे पुण०-पणवीसं जोयणसहस्साइं सूरु उट्ठंउच्चत्तेणं अब्बछव्वीसं चंदे एगे एव०, वयं पुण एवं वदामो-ता इमीसे रयणप्पभाए पुढवीए बहुसमरमणिज्जाओ भूमिभागाओ सत्त णउइजोयणसए अबाहाए हेट्ठिल्ले ताराविमाणे चारं चरति अट्ठजोयणसते अवाहाए सूरविमाणे चारं चरति अट्ठअसीए जोयणसए अबाहाए चंदविमाणे चारं चरति णव जोयणसताइं अबाहाए उवरिल्ले ताराविमाणे चारं चरति हेट्ठिल्लातो ताराविमाणातो दस जोयणाइं अवाहाए सूरविमाणे चारं चरति नउतिं जोयणे अबाहाए चंदविमाणे चारं चरति एवं जहेव जीवाभिगमे तहेव नेयव्वं सव्वब्भंतारिल्लं चारं संठाणं पमाणं वहंति सिग्घगती इइढी तारंतरं अग्गमहिंसीओ ठिती अप्पाबहुं जाव ताराओ संखेज्जगुणाओ (सूर्य० ८९-९९ गा० ३१) ★★★★★ ॥ ९१॥ अट्ठारसमं पाहुडं १८ ॥ ★★★★★ ता कति णं चंदिमसूरिया सव्वलोयंसि ओभासंति उज्जोवेंति तवंति पभासंति आहिताति वदेज्जा ?, तत्थ खलु इमाओ बारस पडिवत्तीओ पं०, तत्थेगे एव०-ता एगे चंदे एगे सूरु सव्वलोगंसि ओभासंति जाव पभासंति आहितेति०, एगे पुण०-ता तिण्णि चंदा तिण्णि चेव सूरु सव्वलोए० एगे०, एगे पुण०-ता आउट्ठिं चंदा एवं एणं अभिलावेणं जातो चेव ततिए पाहुडे दुवालस पडिवत्तीओ तातो चेव इहंपि णेयव्वातो नवरं सत्त य दस य जाव ता बावत्तरं चंदसहस्सं बावत्तरं सूरितसहस्सं सव्वलोयं ओभासति जाव पभासति आहि० एगे एव०, वयं पुण एवं वयामो ता अयणं जंबुदीवे जाव परिक्खेवेणं, जंबुदीवे णं दीवे दो चंदा पभासेंसु पभासेंति जहा जीवाभिगमे जाव तारातो, ता जंबुदीवं णं लवणे णामं समुद्दे वट्टे वलयाकारसंठिते सव्वतो समंता परिक्खिवित्ताणं चिट्ठति, ता लवणे णं समुद्दे किं समचक्कवालसंठिते विसमचक्कवालसंठिते ?, ता समचक्कवालसंठिए नो विसमचक्कवालसंठिए, ता लवणे समुद्दे केवतियं चक्कवालविकखंभेणं केवतितं परिक्खेवेणं आहि० ?, ता दो जोयणसयसहस्साइं चक्कवालविकखंभेणं पण्णरसजोयणसयसहस्साइं सत्तं चउआलं किंचिविसेसूणे परिक्खेवेणं, ता लवणे णं समुद्दे चत्तारि चंदा पभासिसु वा जाव तारातो, ता लवणं

समुद्गं धायतिसंडे णं दीवे वट्टे वलयाकारसंठिते जाव चिट्ठति, ता धायइसंडे णं दीवे समचक्कवालसंठिते एवं विक्खंभो परिकखेवो जोतिसं जहा जीवाभिगमे जाव तारातो, ता धायतिसंडं णं दीवं कालोए णामं समुद्दे किं वट्टे वलयाकारसंठिते जाव चिट्ठति, ता कालोए णं समुद्दे किं समचक्कवालसंठिते विसम० एवं विक्खंभो परिकखेवो जोतिसं च भाणियव्वं जाव तारातो, ता कालोअण्णं समुद्गं पुक्खरवरे णं दीवे वट्टे वल जाव चिट्ठति, ता पुक्खरवरे णं दीवे णं समचक्कवाल० विक्खंभो परिकखेवो जोतिसं जाव तारातो, पुक्खरवरस्स णं दीवरस्स चक्कवालविक्खंभस्स बहुमज्झदेसभाए एत्थ णं माणुसुत्तरे णामं पव्वते वट्टे वलयाकारसंठिते पं०, जे णं पुक्खरवरं दीवं दुहा विभयमाणे २ चिट्ठति तं०-अब्भंतरपुक्खरब्धं च बाहिरपुक्खरब्धं च, ता अब्भंतरपुक्खरब्धे णं किं समचक्कवालसं० एवं विक्खंभो परिकखेवो जोतिसं गहातो य जाव एगससीपरिवारो तारागणकोडिकोडिणं, ता पुक्खरवरं णं दीवं पुक्खरोदे समुद्दे वट्टे वल जाव चिट्ठति, एवं विक्खंभो परिकखेवो जोतिसं च भाणितव्वं जहा जीवाभिगमे जाव संयभूरमणे ।(सूर्य० १००-१ गा० ३२-८८) ☆☆☆ ।१०१॥ एगूणवीसइमं पाहुंड १९ ॥ ☆☆☆ ता कहं ते अणुभागे आहियत्ति वइज्जा ?, तत्थ खलु इमातो दो पडिवत्तीतो पं०, तत्थेगे एव०-ता चंदिमसूरिया णं णो जीवा अजीवा णो घणा झुसिरा णो बायरबोदिधरा कलेवरा णत्थि णं तेसिं उट्ठाणेति वा कम्मेति वा बलेइ वा वीरिएइ वा पुरिसकारपरक्कमेइ वा णो ते विज्जुं लवंति णो असणिं लवंति णो थणितं लवंति, अहे णं बायरे वाउयाए संमुच्छति अहे णं बायरवाउयाए संमुच्छित्ता विज्जुं पि लवंति असणिं पि लवंति थणितं पि लवंति०, एगे पुण एव०-ता चंदिमसूरिया णं जीवा णो अजीवा घणा णो झुसिरा बादरबोदिधरा णो कलेवरा अत्थि णं तेसिं णं उट्ठाणेइ वा जाव पुरिसक्कारपरक्कमेति वा ते विज्जुं पि लवंति असणिं पि लवंति थणियं पि लवंति०, वयं पुण एवं वदामो-ता चंदिमसूरिता णं देवा महिद्धिया जाव महासुक्खा वरवत्थधरा वरगंधधरा वरमल्लधरा वराभरणधरा अव्वोच्छित्तिणयट्ठताए अण्णे चयंति अण्णे उववज्जंति आहि० ।१०२। ता कहं ते राहुक्कम्मे आहि०? तत्थ खलु इमातो दो पडिवत्तीतो पं०, तत्थ एगे एव०-ता अत्थि णं से राहुदेवे जे णं चंदं सूरं च गेण्हति, एगे पुण०-ता णत्थि णं से राहुदेवे जे णं चंदं च सूरं च गेण्हति, तत्थ जे ते एव०-ता अत्थि णं से राहु देवे जे णं चंदं सूरं च गेण्हति ते णं एव०-ता राहु णं देवे चंदं सूरं च गेण्हमाणे बुद्धंतेणं गिण्हित्ता बुद्धंतेणं मुयति बुद्धंतेणं गिण्हित्ता मुद्धंतेणं मुयति मुद्धंतेणं गिण्हित्ता बुद्धंतेणं मुयति मुद्धंतेणं गिण्हित्ता मुद्धंतेणं मुयति वामभुयंतेणं गिण्हित्ता वामभुयंतेणं मुयइ वामभुयंतेणं गिण्हित्ता दाहिणभुयंतेणं मुयइ दाहिणभुयंतेणं गेण्हित्ता वामभुयंतेणं मुयति दाहिणभुयंतेणं गिण्हित्ता दाहिणभुयंतेणं मुयति, तत्थ जे ते एव०-ता णत्थि णं से राहु देवे जे णं चंदं सूरं च गेण्हति ते णं एव०-तत्थ खलु इमे पण्णरस कसिणा पोग्गला पं०, तं०-सिंघाडए जडिलए खत्तए खरते अंजणे खंजणे सीतले हिमसीतले केलासे अरूणप्पहे पणिज्जए भमुव (नभसू) एए कविलए पिंगलए राहु, ता जता णं एए पण्णरस कसिणा कसिणा पोग्गला सता चंदस्स वा सूरस्स वा लेसाणुबद्धचारिणो भवंति तता णं मणुस्सलोगे मणुस्सा वतंति-एवं खलु राहु चंदं वा सूरं वा गिण्हिति, ता जता णं एए पण्णरस कसिणा कसिणा पोग्गला णो सता चंदस्स वा सूरस्स वा लेसाणुबद्धचारिणो भवंति णो खलु तदा माणुसलोयम्मि मणुस्सा एवं वदंति-एवं खलु राहु चंदं सूरं वा गेण्हति एगे एवमाहंसु, वयं पुण एवं वयामो ता राहु णं देवे महिड्डीए जाव महासुक्खे वरवत्थधारी जाव वराभरणधारी, राहुस्स णं देवस्स णव णामधेज्जा पं० तं०-सिंघाडते जडिलए खत्तते खरए ददुदुरे मगरे मच्छे कच्छपे किण्हसप्पे, राहुस्स णं देवस्स विमाणा पंचवण्णा पं० तं०-किण्हा णीला लोहिता हालिद्धा सुक्किल्ला, अत्थि कालए राहुविमाणे खंजणवण्णाभे पं० अत्थि णीलए राहुविमाणे लाउयवण्णाभे पं० अत्थि लोहिए राहु० मंजिद्धावण्णाभे अत्थि पीते० हालिद्धवण्णाभे अत्थि सुक्किल्लए० भासरासिवण्णाभे पं०, जया णं राहु आगच्छमाणे वा गच्छमाणे वा विउव्वमाणे वा परियारेमाणे वा चंदलेसं पुरच्छिमेणं आवरित्ताणं पच्चच्छिमेणं वीईवयइ तता णं पुरच्छिमेणं चंदे उवदंसेति पच्चच्छिमेणं राहु, जया णं राहु आगच्छमाणे वा जाव परियारेमाणे वा चंदस्स वा सूरस्स वा लेसं पच्चत्थिमेणं आवरित्ता पुरच्छिमेणं

वीईवयइ तया णं पच्चत्थिमेणं चंदे उवदंसेति पुरत्थिमेणं राहू, एणं अभिलावेणं दाहिणेणं आवरेत्ताणं उत्तरेणं वीईवयइ उत्तरेणं आवरेत्ता दाहिणेणं वीईवयइ उत्तरपुरत्थिमेणं आवरेत्ता दाहिणपच्चत्थिमेणं वीईवयइ दाहिणपच्चत्थिमेणं आवरेत्ता उत्तरपुरत्थिमेणं वीईवयइ दाहिणपुरत्थिमेणं आवरेत्ता उत्तरपच्छत्थिमेणं वीईवयइ, उत्तरपच्चत्थिमेणं आवरेत्ता दाहिणपुरत्थिमेणं वीईवयइ तया णं उत्तरपच्चत्थिमेणं चंदे उवदंसेति दाहिणपुरत्थिमेणं राहू, ता जता णं राहू आगच्छमाणे वा गच्छ० चंदस्स लेस्सं आवरेति तता णं मणुस्सलोगे मणुस्सा वतंति-एवं खलु राहुणा चंदे गहिए २, ता जता णं राहू आगच्छमाणे वा० चंदलेस्सं आवरेत्ता पासेण वीईवयइ तता णं मणुस्सलोए मणुस्सा वदंति-एवं खलु राहुणा चंदे वंते २, जता णं राहू आगच्छमाणे वा० चंदस्स लेस्सं आवरेत्ताणं मज्झेणं वीईवयइ तता णं मणुस्सलोगे मणुस्सा वतंति-एवं खलु राहुणा चंदे वइयरिए २, ता जता णं राहू आगच्छमाणे वा० चंदस्स लेस्सं अहे सपक्खिं सपडिदिसिं आवरेत्ताणं चिद्धति तता णं मणुस्सलोए मणुस्सा वतंति-एवं खलु राहुणा चंदे घत्थे २, ता कतिविहे णं राहू पं० ?, ता दुविहे राहू पं० तं०-धुवराहू य पव्वराहू य, तत्थ णं जे से धुवराहू से णं बहुलपक्खस्स पडिवए पण्णरसतिभागेणं पण्णरसतिभागं चंदलेस्सं आवरेमाणे चिद्धति तं०-पढमाए पढमं भागं बितियाए बितियं भागं जाव पण्णरसीए पण्णरसमं भागं, चरिमसमते चंदे रत्ते भवति अवसेससमए चंदे रत्ते विरत्ते य भवति, तमेव सुक्कपक्खम्मि उवदंसेमाणे २ चिद्धति तं०-पढमाए पढमं भागं जाव पण्णरसमं भागं, चरिमे समए चंदे विरत्ते भवति अवसेससमए चंदे रत्ते य विरत्ते य भवति, तत्थ णं जे से पव्वराहू से जह० छण्हं मासाणं उक्को० बातालीसाते मासाणं चंदस्स अडतालीसाए संवच्छराणं सूरस्स ११०३। ता से केणट्टेणं एवं वुच्चति-चंदे ससी २ ?, ता चंदे णं जोइसिदे जोतिसराया सोमे कंते सुभगे पियदंसणे सुरूवे ता से एतेणट्टेणं एवं वुच्चति-चंदे ससी २, ता से केणट्टेणं एवं वुच्चति-सूरे आइच्चे २ ?, ता सूरदिया णं समताति वा आवलिवाति वा जाव उस्सप्पिणीति वा ओसप्पिणीति वा से एणं अट्टेणं एवं वुच्चति-सूरे आइच्चे २ ११०४। ता चंदस्स णं जोतिसिंदस्स जोतिसरणो कति अग्गमहिंसीओ पं० ?, चत्तारि अग्गमहिंसीओ पं० तं०-चंदप्पहा दोसिणाभा अच्चिमाली पभंकरा, तत्थ णं एगमेगाए देवीए चत्तारि २ एवं चेव पुव्वभणितं अट्टारसमे पाहुडे तहा णायव्वं जाव मेहुणवत्तियं, एवं सूरस्सवि, ता सूरियचंदिमा णं जोतिसिंदा जोतिसरायाणो केरिसए कामभोगे पच्चणुभवमाणा विहरंति ?, ता से जहाणामए केइ पुरिसे पढमजुव्वणुट्ठाणवलसमत्थाए भारियाए सद्धिं अचिरवत्तवीवाहे अत्थगवेसणताए सोलसवासविप्पवसिते ता से णं तता लद्धट्टे कयकज्जे अणहसमग्गे पुणरवि सयं गिहं हव्वमागते ण्हाए जाव सरीरे मणुण्णं थालीपागसुद्धं अट्टारसवंजणाउलं भोयणं भुत्ते समाणे तंसि तारिसगंसि वासघरंसि अब्भित्तकम्मे बाहिरतो दूमियघट्टमट्टे विचित्तउल्लोयचिल्लिगतले मणिरयणपणासियंधयारे बहुसमरमणिज्जभूमिभागे पंचवण्णसरससुरभिमुक्क (पुप्फ) पुंजोवयारकलिते कालागरूपवरकुंदुरूक्कधूवमघमघंतगंधुद्धुयाभिरामे सुगंधवरगंधिए गंधवट्ठिभूते तंसि तारिसगंसि सयणिज्जंसि सालिंगणवट्टिए उभतो बिब्बोयणे दुहतो उण्णए मज्झेणयगंभीरे गंगापुलिणवालुउद्दालसालिसते उवचियसोमदुगुल्लपट्टपडिच्छायणे सुविरइयरयत्ताणे रत्तंसुयसंवुडे आयिणगरूयबूरणवणीततूलफासे गंधवरकुसुमचुण्णसयणोवयारकलिते ता एयारिसियाए सिंगारागारचारूवेसाते संगय जाव जोव्वणविलासकलिताए अणुरत्ताए अविरत्ताए मणोणुकूलाए भारियाए सद्धिं इट्टे सद्धफरिसरसरूवगंधे पंचविहे माणुस्सए कामभोगे पच्चणुभवमाणे विहरेज्जा, ता से णं पुरिसे विउसमणकालसमयंसि केरिसतं सातासोक्खं पच्चणुभवमाणे विहरति ?, तं उरालं णं समणाउसो !, तस्स णं पुरिसस्स कामभोगेहिंतो वाणमंतराणं देवाणं एत्तो अणंतगुणविसिद्धतरगा चेव कामभोगा, वाणमंतराणं देवाणं कामभोगेहिंतो असुरिंदवज्जियाणं भवणवासीणं देवाणं एत्तो अणंतगुणविसिद्धतरगा चेव कामभोगा, असुरेदवज्जिताणं० एत्तो अणंत० गहगणणक्खत्त जाव कामभोगेहिंतो चंदिमसूरियाणं जोतिसियाणं जोतिसराईणं इत्तो अणंतगुणविसिद्धतरगा चेव कामभोगा, ता चंदिमसूरिया णं जोतिसिंदा जोइसरताणो एरिसते कामभोगे पच्चणुभवमाणे विहरंति ११०५। तत्थ खलु इमे अट्टासीती महागहा पं० तं०-इंगालए वियालए लोहितक्खे सणिच्छरे आहुणिए पाहुणिए कणते कणो कणकणए कणवियाए १० कणगसंताणए सोमे सहिते

आसासणे कज्जोवए कत्थु (व्व) एण अयगरए दुंदुभए संखे संखणाभे २० संखवण्णाभे कंसे कंसणाभे कंसवण्णाभे रूप्पी रूप्पोभासे नीलो नीलोभासे भासे भासरासी ३० दगे दगवण्णे तिले तिलपुप्फवण्णे काए कागं (वं) धे इंदग्गी धूमकेतू हरि पिंगलए ४० बुद्धे सुक्के बहस्सती राहू अगत्थी माणवते कामफासे धुरे पमुहे वियडे ५० विसंधी कप्पेल्लए पइल्ले जडिलए अरूणे अगिल्लए काले महाकाले सोत्थिए सोवत्थिए वद्धमाणए ६० पलंबे णिच्चालोए णिच्चुज्जोए सयंपहे ओभासे सेयंकरे आभंकरे पभंकरे अरए ७० विरए असोणे वीयसोणे विवत्ते विवत्थे विसाले साले सुव्वते अणियट्ठी एकजडी ८० दुजडी करे करिए राय अगले भावे केऊ पुप्फकेतू (सूर्य० गाथा ८९-९७) ।१०६॥२० पाहुडं ॥ 'इय एस पागडत्था अभव्वजणहिययदुल्लभा इणमो । उक्कित्तिया भगवती जोइसरायस्स पन्नत्ती ॥९८॥ एस गहियावि संती थद्धे गारवियमाणपडिणीए । अबहुस्सए न देया तव्विवरीए भवे देया ॥९९॥ धिइउट्ठाणुच्छाहकंमबलविरियपुरिसकारेहिं । जो सिक्खिओवि संतो अभायणे पकिखविज्जाहि ॥१००॥ सो पवयणकुलगणसंघबाहिरो णाणविणयपरिहीणो । अरहंतथेरगणहरमेरं किर होइ वोलीणो ॥१॥ तम्हा धिइउट्ठाणुच्छाहकम्मबलविरियसिक्खियं णाणं । धारेयव्वं णियमा ण य अविणीएसु दायव्वं ॥२॥ वीरवरस्स भगवतो जरमरणकिलेसदोसरहियस्स । वंदामि विणयपणतो सोक्खुप्पाए सया पाए ॥१०३॥ गाथा ।१०७।

श्रीचंद्रप्रज्ञप्त्युपांगमुत्कारितं॥